

Papa A'kwaru Nukupu'pu Sises Nennoko'san Itekare Ekamai' Yawiri Ekamanin

Papa A'kwaru Nukupu'pu Sises Nennoko'san Itekare Ekamai' Yawiri esi itekare Ūru' nūmenuka'pu pu'ku pe ri. Inkupunu kuru esi, wapiyaro' kon Sises pikiron kon uya iku'to' pe Waku A'kwaru uya to' kupu'pu Waku Itekare ato' pe to' uya Sises pi', "Surusiran awiri, miri awonsi'ki Isutiya, Sameriya awiri'ne ri, siya ri non u'matu pu'ku pona ri" (1:8). Sises pikiron kon pantomu pe iyese Esuweru amu' koro'tau iye'sara'ti'pu tanporon kon pata emu' kaisaron kon uya apurito' pe. Imenukanin esi'pu tūnmenuka'pu ennin nan uya i'tuto' pe Sises pikiron kon esi Roman amu' esi pata epuru pe enari'panin pe pen, Sises pikiron kon napurinu esi Esuweru amu' enuriku'pu ipi' a'ku'tinin pe.

Inkupu'pu ekanpai iyese osoruwau eke ton ite'ma yau, enei'ma nai awiri Sises pi', Waku Itekare usekama'pu so'si e'sara'ti'pu utin pi' mi awiri: 1) Sises pikiron kon nukupunu e'sara'ti'pu Surusiran po Sises enuku'pu e'ma'pu pe; 2) Parestin pu'ku ton ni ti'ma'kapi'se iyepamu'pu; 3) miyari ri iyepamu'pu Mete'teriyā nono poro ri Ron ni tepose.

Usennakan pari pen esi miri *Inkupu'pu* iye'sa' ru'pu tūmeruntiru ke Sises apurinin nan pona Surusiran po Penti'kas weyu a'tai, miripan ni esi miyari ri so'si esa' pe imeruntitanuku pi' ri

miri awonsi'ki itepuru ton ni, iye'ku'pi'sa' useka-masa' na'ne' awiri kareta yau. Iye'sara'ti a'taino kon Sises pikiron kon ekareei amaranu'sa' to'ken esi miri tu'kan ni to' nekamapitu'pu itekare yau, iye'ku'sa' ru'pu e'menukasa' na'ne' iye'ku'sa' ru'pu uya ri ekama merunti pe itekare esi'pu Sises apurinin nan yau miri awonsi'ki so'si tawon kon yau ri.

Iyawon Ekamanin

Ekonekan ensa' ru'pu ekamanin pe (1:1-26)

a. Te'nonka pe Sises usauroku'pu (1:1-14)

b. Isutas pata'pu iyakan anamu'pu (1:15-26)

Surusiran po tunene'pu kon ekama'pu enno'sa' kon uya (2:1–8:3)

Isutiya, Sameriya po tunene'pu kon ekama'pu enno'sa' kon uya (8:4–12:25)

Paaru e'turawasoma'pu (13:1–28:31)

a. Iye'sara'ti pe itekare ekamai' iti'pu (13:1–14:28)

b. Surusiran po eke pe mitin pi' to' esi'pu (15:1-35)

c. Iyakon ite'kwa pe itekare ekamai' iti'pu (15:36–18:22)

d. Itosoruwano ite'kwa pe itekare ekamai' iti'pu (18:23–21:16)

e. A'sisa' pe Paaru esi'pu, Surusiran, Sisariya, miri awonsi'ki Ron po (21:17–28:31)

Sises Enu'ku'pu Epun Pona

¹ Eke Tiyo'peras, wapiyaro' ukaretaai yau imenukasa' uya man, tanporon ni Sises nukupu'pu miri awonsi'ki to' enupa'pu iya ru'pu

2 iyenuku pona ri Epuḅ pona. Miri rawiri, Papa meruntiru ke tḅuta'kwaru'tii', tḅneporo'san tḅnenno'ton kon pe itekare ekamai' apiyo'ma'puḅ iya tḅtḅrawasooi kon ku'to' pe to' uya.

3 Sises ekota'ma'puḅ, miri awonsi'ki iyeriku'puḅ tḅpo kurusu' po, to' piya' isenpoikapitu'puḅ inke ite'kwa ri, to' uya te'mu'sa'kasa' apurito' pe. Inke ri to' piya' isenpoikapitu'puḅ 40 kaisa ri wḅi ton u'matu koro'tau teriku tḅpo te'mu'sa'kasa' a'tai, miripan usauroku'puḅ Papa e'to' esa' wanni pe pi'.

4 Tḅron ni a'tai to' piyau tesi koro'tau, to' auro'ka'puḅ iya, “Surusiran apai kutitḅu, e'tane ukḅipḅḅḅḅ usauro'sa' ru'puḅ ipi' enupikiri me'tai' usauroku ri metata'taine'nokon ipi'.

5 Isaan uya ka'pon amḅ' pa'taisimapitu'puḅ tuna ke, e'tane seri pe iwa'ne ri Papa uya apa'taisimapitu kon miri Wakḅ Ta'kwarḅ ke,” ta'puḅ iya.

6 Sises pokon pe kanan tamḅrasa' kon a'tai, to' uya ekama'po'puḅ, “Ina epuru, seri a'tai pe' uri'nokon Esuwerḅ amḅ' e'to' itesa' pe na'po auya seri?” ta'puḅ to' uya.

7 Miripan uya ta'puḅ to' pi', “Iweyu i'tuto' auya'nokon kuru puḅa ri iyesi. Ukḅipḅḅḅḅ uya ikoneka miri tḅweyu a'tai ri.

8 E'tane Wakḅ A'kwarḅ uye'sa' a'tai ipona'nokon, merunti pe iyena kon miri, miripan uyekareei ekama auya'nokon miri Surusiran po, Isutiya po, Sameriya po, miri awonsi'ki siya ri non emḅ'kaisa ri,” ta'puḅ iya.

⁹ Seri ta'pɛ iya tɛpo, itanɛmɛ'pɛ to' enu airi ri, miripan onamɛ'pɛ kapuru' uya to' enu apai.

¹⁰ To' esi'pɛ ka'ta' tenu kon tutɛse enpitɛ pi' iyenu'tane. Miri koro'tau, ite'kwanau pɛra ri, asa'ron kon inserɛ amɛ' e'soto'kasa' esi'pɛ to' piyau.

¹¹ “Imiri'nokon, Kiyarari pon kon, i'ri pi' seri yau iye'soto'pi'sa' kon uya ka'ta' iyenu kon tɛpitɛ? Pɛse ri Sises enuku menyatɛine' Epɛn pona uye'to' oton, iti ene'pɛ auya'nokon kasa ri,” ta'pɛ to' uya.

Ma'tayas Ena'pɛ Isutas Pata'pɛ Yakan Pe

¹² Miri tɛpo, enno'sa' kon enna'po'pɛ Surusiran pona Are' Wɛpɛ poi, inni kuru pɛra ri, 1 mayirɛ o'koi' ri pata pona.

¹³ Pata eposa' tɛuya'nokon a'tai, pata tɛto' tɛuya'nokon itau, ka'tawon iuti ta' to' uti'pɛ. Pɛsamoro iyamɛrasa' kon esi'pɛ; Pi'ta, Isaan, Isens, Anturu, Piri', Tamas, Pa'taramiu, Ma'siu, Isens (Arɛ'piyas mu), Saiman (Usara' tukai' tesa'sen*), miri awonsi'ki Isutas (tɛron ni Isens mu).

¹⁴ To' amɛrapitɛ'pɛ isewenapai ri ipɛremai'. Uri'sami'si amɛ', Sises san Meri, miri awonsi'ki Sises akon non esi'pɛ to' koro'tau.

¹⁵ Miri a'tai, Pi'ta e'mɛ'sa'ka'pɛ tɛtonpa ton Sises apurinin nan koro'tau. 120 kaisaron kon esi'pɛ miri yau.

¹⁶ “Utonpa ton, kin Tepi' poro Wakɛ A'kwarɛ usau'ro'sa' rɛ'pɛ Isutas pi' si uta'ku'tisa' man. Sises a'si ton kon anin pe iyena'pɛ.

1:9 Ma' 16:19; Ɔru' 24:50-51 * **1:13** Usara' - Roman amɛ' enapai temo'ka kon i'sero'. **1:13** Ma'siu 10:2-4; Ma' 3:16-19; Ɔru' 6:14-16

17 Isutas esi'p_u anansa' r_u'p_u ina tonpa pe itekare ekama pi' iye't_urawasomato' pe," ta'p_u Pi'ta uya.

18 (fri eseru ku'sa' t_uuya epe'p_u ke Isutas uya non e'ma'p_u, miripan yau ita'mo'ka'p_u, iye'toi'kwa'p_u t_uwenu'pi takanu'se.

19 Tanporon kon Surusiran pon kon uya itekareei eta'p_u, miripan kon uya miri non ese'ti'p_u A'ketama tukai', Mun Pata'se' ta e'kwa pe.)

20 Miyari ri Pi'ta usauroku'p_u, "Iye'menukasa' man Eren yau,

“Tiwi itawon p_ura itiw_u' nesii,

inu' ri kuse'nin itau,'†

miri awonsi'ki,

“Tiwi taron ni itepuru pe te'ton ipata'p_u anam_u,‡ tukai'.

21 Miri pe iyese pi', Isutas pata'p_u iyakan epapai'nokon, pena ri Sises a'tai uya'kiri'nokon iye'sa' r_u'p_u,

22 Isaan uya epa'taisiman ekareei ekama'p_u si'kiri miri awonsi'ki Sises enuku p_u'k_u pona ri iye'sa' r_u'p_u, miripan e'to' pe utonpa kon pe Sises e'm_u'sa'kasa' ene'p_u t_uuya ekamanin pe," ta'p_u iya.

23 Miripan kon uya asa'ri ka'pon am_u' anam_u'p_u; Isole', Parasapas tukai' to' nesak_un_u, Isu'su'tas tato' to' uya ipi', miri awonsi'ki Ma'tayas.

24 Miripan tanporo miri yau te'san ip_urema'p_u, "Ina epuru, tanporon kon usenuminkato' i'tu auya. Ap_une ekamaki nai kuri rupi anansa' auya p_usamoro asa'ron kon ka'pon am_u' apai

²⁵ enno'sa' pe iye'to' pe, Isutas pata'pu iyakan pe. Isutas uya ina nonkasa' man tɔpata'se' ya' tɔuti pi'," tukai' to' ipurema'pu.

²⁶ I'tun nito' ike ke to' i'tu'pu to' uya, miripan i'ki'ma tane to' uya ita'mo'ka'pu Ma'tayas winikai', miripan Ma'tayas ena'pu 11 pan kon enno'sa' kon tonpa pe.

2

Papa A'kwaru Uyee'pu Sises Poitoru Ru'san A'kwaru'tii'

¹ Penti'kas tato' weyu e'seposa' a'tai,* tanporo Sises apurinin nan amurasa' esi'pu tikin ni ipata Surusiran po.

² Miri yau, ite'kwanau para ri, pata a'merumu'pu, eke pe a'setun kasa, ka' winipai, miripan ewomu'pu to' iwu' ta',

³ miripan kon uya apo' waraino ene'pu, miripan e'ta'naku'pu to' kaisa ri to' i'pai pona'ne ereutai'.

⁴ Tanporo to' uta'kwaru'ti'pu Waku A'kwaru ke, miripan kon e'sara'ti'pu usauro'ni pi' taron kon ka'pon amu' maimu† yau'ne, Iya'kwaru uya tusauro'to' kon pe takupu kon pi'.

⁵ Miri a'tai, Esuweru amu' amurasa' esi'pu mi awiri'nan ni, pata emu' apaino kon Surusiran pona.

⁶ Pata a'merumu tetai', to' amura'pu Sises apurinin nan pata'se' ya'. To' usewansiuka'pu

2:1 E'sotas 23:16; 34:22; Ripaiti'kas 23:15-21; Isu'taronomi 16:9-12 * **2:1** Penti'kas—To' Epoi Iti'pu Weyu Ru'pu pe, 50 pe wui tɔpo Esuweru amu' amurasa' ti'kiyari kon a'nai' aku'pusa' anumu tɔuya'nokon weyu pi'. † **2:4** maimu, miri pe para ani Kiri' maimu yau.

tumaimu kon tau'ne to' usaurok_u eta t_uuya'nokon pi'.

⁷ Ipan pe to' usewansiuka'p_u, miripan kon uya ta'p_u, “P_usamoro n_usauro'ai'ne' nan sa'ne Kiyarari ko' am_u' ko!

⁸ I'ri kasa ken si umaimu kon tau'ne to' usaurok_u eta seri?

⁹ T_uron kon sa'ne uye'pi'sa' man ko, Pa'tiya winipai, Metiya winipai, miri awonsi'ki Eran winipai, miri awonsi'ki t_uron kon kanan Me'sa'po'temiya, Isutiya, Ka'pato'siya, Pontas, Eisa M_ure'p_u,

¹⁰⁻¹¹ P_urekiya, Panperiya, Isi', Ripiya miri awonsi'ki Ron piyaworo' nan ni uye'sa' man ko, Esuwer_u am_u' miri awonsi'ki Esuwer_u am_u' pen e'tane, Esuwer_u am_u' napur_un_u apur_unin nan. T_uron kon kanan K_uri' winipaino kon miri awonsi'ki Arepiya winipaino kon, e'tane si umaimu kon tau'ne to' usaurok_u eta'nokon, eke ri Papa n_ukup_u'p_u ekareei pi'!” ta'p_u to' uya.

¹² Tanporon kon usewansiuka'p_u, i'tu t_uuya'nokon p_ura iyesi pi'. “I'ri ekamanin pe seri esi?” tukai' to' usekama'popit_u'p_u.

¹³ E'tane t_uron kon uta'kir_u'p_u to' pi' to' sapema pe ri. “To' e'taripasa' man,” ta'p_u to' uya.

Pi'ta Uya Itekare Ekama'p_u

¹⁴ Miri a'tai, Pi'ta e'm_u'sa'ka'p_u 11 pan kon t_utonpa ton pokon pe, anp_usin ka'pon am_u' koro'tau, miripan usaurok_u'p_u eke pe, “Utonpa ton, Esuwer_u am_u' t_uron ni pata wini'nan miri awonsi'ki Surusiran po t_uko'mansan, ap_une etati'! I'ri ta e'kwa pe seri e'ku'sa' tukai' ekama uya.

15 Ipoken p̄ara ri ìsenuminka kon ina e'taripasa' tukai'. Awanak̄i' ri mari pata man, 9 a'k̄ara' ri mari. In̄a' e'taripa p̄ara ri iyese miri a'tai.

16 E'tane pu'kena' Isower̄ nekama'p̄u r̄u'p̄u uta'ku'ti seri,

17 “ Papa uya se kasa tasa': Se ton kup̄u uya miri non weyu u'mat̄u a'tai:

Uya'kwar̄ enno'to' uya oton tanporon kon pona.

Imu kon miri awonsi'ki iyensi kon am̄u' uya umaimu ekamato' oton,

moineri'san enu uta'kwakasa' uya ento' oton, miri awonsi'ki k̄iyi' am̄u' e'ne'pi'to' oton.

18 Miri riken pe p̄ara, upoitor̄ ton, warawoti'si am̄u' miri awonsi'ki uri'sami'si am̄u' pona

uya'kwar̄ enno'to' uya oton ni mari, miripan kon uya umaimu ekamato' oton.

19 A'kwar̄api'nin ku'to' uya oton ka' yau, miri awonsi'ki i'tuto' ipi' non po kanan.

Miri a'tai, miri yau m̄an e'to' oton, apo' miri awonsi'ki ipun pe ikirisin e'to' oton.

20 W̄ai enu ewarumanto' oton,

miri awonsi'ki kap̄ai usuitato' oton m̄an kasa.

Eke ri, miri awonsi'ki wak̄u ri Itepuru Weyu uyep̄u rawiri tanporo seri ton e'ku'to' oton.

21 In̄a' ri k̄ari ri Itepuru ekama'ponin n̄u'p̄u t̄upika'tinin pe,

epika'tito' oton tasa' iya, †

ta'p̄u r̄u'p̄u Isower̄ uya.

22 “Imiri'nokon Esuwer̄ am̄u', seri umaimu etati'! P̄use ri Sises, Nasare' pon, i'koro'tau'nokon

† 2:21 Isower̄ 2:28-32

iyesi'p# Papa nennoko'p#. Tu'kan ni eke Papa t#rawasooi, a'kwar#pi'nin, miri awonsi'ki i'tuto' ipikiri ri ku'to' pe iya iyena'nokon. Papa uya enpoika'p# iyena'nokon inkup#n# wini, Papa nennoko'p# tukai' i'tu kon pa, mi'tuyat#i'ne' kasa ri.

23 Pena ri Papa uya iku'sa' esi'p# iyena'nokon ituto' pe t#uya, miripan t#r#p# auya'nokon iri ton ena' to' uya kurusu' pona ipokapi'to' pe, iyeri'to' pe.

24 E'tane Papa uya i'm#sa'ka'p# eri'nito' meruntir# apai, eri'nito' uya a'sisa' ko'man#k# namai'.

25 Pena Tepi' uya Itepuru maimu ekama'p#,
“Papa, Itepuru ene uya inke ri upiyau.

Miri uriya', usi'n#k# pen.

26 Miri pe iyese pi', pori' pe uyewan yau esii'ma, uyesen uya epori'mato' enpoika.

Ayapuri uya, Papa,
eri'sa' ri e'tane,
upun uko'mam# te'ku'to' yau,

27 ap#ne p#ra uruwai' yau esi i'se p#ra iwesi pi',
miri awonsi'ki wak#, uri ipoitor# ukita i'se
p#ra iwesi.

28 Iko'manse'na utito' e'ma enpoikasa' auya man;
pori' pe uku'to' auya oton, ap#ne p#ra tiwi ri
upiyau iwesi pi',
§
ta'p# Tepi' uya,” ta'p# iya.

29 Pi'ta usaurok#p# tipiyi'se p#ra, “Utonpa ton, eke utamokori kon Tepi' erik#p#, miripan uruwasi esi seri pona ri.

30 Tepi' esi'p_u pu'kena', miripan uya Papa uya, 'Tku_u uya kuru ri miri,' tukai' tauro'ka'p_u r_u'p_u si i'tu'p_u: tiki_n ni ipayan am_u' tonpa ku'to' oton Papa uya itepuru pe, Papa munki am_u' esa' pe, Tepi' esi'p_u to' esa' pe kasa, tawon.

31 Miri pe iyese pi', Tepi' uya nin si K_urai* e'm_u'sa'kato' oton i'tusa' t_uuya pi' ekama'p_u, uruwai' yau iko'manto' oton pen ni, miri awonsi'ki ipun ukita pen ni, tukai'.

32 "P_use ri Sises, iyeri'sa' r_u'p_u i'm_u'sa'ka'p_u Papa uya. Ina si iya'kiron kon n_u'san uya iye'm_u'sa'kasa' ene'p_u.

33 Papa uya eke pe kuru ikup_u'p_u, miripan ereutan_u'sa' iya tenwo'net_u wini, miripan uya apiyo'ma'p_u ta'kwar_u enno'to' pe iya t_upoitor_u ton pona, t_usaurok_u'p_u awiri ri. Sises uya si eke pe kuru ri ina repasa' Wak_u A'kwar_u ke menyat_u'ne' miri awonsi'ki metayat_u'ne'.

34 Tepi' enu'sa' p_ura iyese t_upun yau Ep_un pona, e'tane Tepi' uya ta'p_u,

“Itepuru uya ta'p_u uyepuru pi';

“Uyenwo'net_u wini'ki' ereutatan_u'ki Itepuru pe iwesi pa,

35 ap_une iyeyaton non entai iwesi pa iku'tane uya to' esa' pe iwesi pa,” †

tasa'.

36 “Imiri'nokon miri awonsi'ki tanporo ri Es-uwer_u am_u' uya i'tu i'se esi i'napai ri kuru iyese tukai': P_use ri si Sises inwini'p_u kon ku'sa' Papa

2:30 Eren 132:11; 2 Sanwer_u 7:12-13 * 2:31 K_urai (Kiri' maimu yau), miri pe p_ura Me'saya (Ipuru maimu yau), asa'ri ri mari iyese, Papa Nan_ut_un_u ta e'kwa pe; v. 36 kanan. † 2:35 Eren 110:1

uya man Itepuru pe miri awonsi'ki Kərai pe," ta'pə Pi'ta uya.

³⁷ Ka'pon amə' uya seri etasa' a'tai, ipan pe to' ewan poka'pə iya, miripan kon uya Pi'ta miri awonsi'ki itonpa ton ekama'po'pə, "Ina tonpa ton, i'ri ken si kupə ina uya seri?" ta'pə to' uya.

³⁸ Pi'ta uya to' maimu eikə'pə, "Imiri'nokon tikin pa'ne me'atəi'ne' kaisa ri amakooi kon apai era'titi', ina uya apa'taisimato' kon pe Sises ese' yau amakooi kon pi' usentu'man nito' pe, miripan uya Wakə A'kwarə ke irepa kon miri.

³⁹ Papa uya təusaurokə'pə kupə miri ipi'nokon, apayan kon nə'san pi', miri awonsi'ki sunwaron kon pi' niri, tanporon kon Itepuru, itese' pi' e'nito' Papa nəki'manə ton pi' ri niri," ta'pə Pi'ta uya.

⁴⁰ Miyari ri Pi'ta usaurokə'pə to' emiya'pontinin pe, "Epika'titi' iri ton seri a'taino kon piyapai," ta'pə iya.

⁴¹ Pi'ta maimu apurinin nə'san pa'taisima'pə enno'sa' kon uya, miripan 3,000 kaisaron kon ena'pə to' tonpa pe.

⁴² Inke ri tenupato' kon awiri kuru ri to' e'pitu'pə, təusi'nənkə kon ke to' amərapitu'pə, to' uta're'tipitu'pə‡ miri awonsi'ki to' ipəremapitu'pə a'samətə yau.

Enno'sa' Kon Uya I'tuto' Ipikiri Ku'pitu'pə

⁴³ Tu'ke ri a'kwarəpi'nin miri awonsi'ki i'tuto' ipikiri kupə'pə enno'sa' kon uya, miripan pi' tanporon kon enari'nəmə'pə.

‡ 2:42 to' uta're'tipitu'pə; miri pe pəra, to' enta'napitu'pə Itepuru enta'na'pə eseru rə'pə yau; miri pe pəra, to' enta'napitu'pə Itepuru tenupa'pə kon awiri.

44 Tanporo Sises apurinin nan amurapitu'pu a'samutu yau, miripan kon e'rerapitu'pu tanporon ke ri tutonpa kon pokon pe,

45 miripan kon uya tunono kon miri awonsi'ki timamin kon tonpa karupo'pomapitu'pu. Miri epe'pu ke tutonpa kon repapitu'pu to' uya i'se iye'to' airi.

46 Wui kaisa ri to' amurapitu'pu Esuweru amu' use'mato', iparemato' iwu' pu'ku ta', tanporo tamurapi'se to' uta're'tipitu'pu tiwu' kon tau'ne pori' pe, amure' pe para to' usekanpitu'pu.

47 Papa apuripitu'pi' to' esi'pu, miripan taron kon ka'pon amu' esi'pu pori' pe to' pi'. Wui kaisa ri Itepuru uya tunkoneka'san ke to' tonpa'ti'pu.

3

Pi'ta Uya Ise'mesa' Epi'ti'pu

1 Taron ni wui a'tai, Pi'ta miri awonsi'ki Isaan pokon uti'pu Esuweru amu' use'mato', iparemato' iwu' ta' ipureman weyu a'tai, ko'mamu pe, 3 a'kura'.

2 Miri yau, ka'pon esi'pu ise'mesa' iyentu'pu si'kiron ni to' napitunu "Akorawan Mura'ta" tukai' to' nesakunu Esuweru amu' use'mato', iparemato' iwu' purorooi mura'ta na'. Miri yau, to' uya inonkapitu'pu tumpurataai oton ekama'poto' pe iya ka'pon amu' tewonsan pi'.

3 Pi'ta miri awonsi'ki Isaan pokon ewontane tumpurataai oton pi' to' ekama'po'pu iya.

4 Pi'ta miri awonsi'ki Isaan uya to'sa ri ene'pu. "Apune, ina enki," ta'pu Pi'ta uya ipi',

5 miripan kon ene'p_u iya, p_urata ke to' uya t_urepa tukai'.

6 Pi'ta uya ta'p_u, “P_urata p_ura man, e'tane itesa' pe ri e'ai'ne' ke irepa uya: Sises K_urai Nasare' pon ese' yau, e'm_u'sa'ka', miri awonsi'ki asaki,” ta'p_u iya ise'mesa' pi'.

7 Itenwo'net_u wini itemekon a'si'p_u iya iye'm_u'sa'ka tane, miripan i'ta ton miri awonsi'ki ip_urakon am_u' ena'p_u pana' pe inke p_ura ri.

8 Miripan e'san_um_u'p_u iye'sara'ti'p_u usarin pi'. To' a'kiri iyewom_u'p_u Esuwer_u am_u' use'mato', ip_uremato' iw_u' ta', iye'san_unpit_u'p_u Papa apuripit_u pe.

9 Tanporo ka'pon am_u' miri yau te'san uya isari ene'p_u Papa apuripit_u pi',

10 miripan k_uri ri teta'kwan_unsen tukai' to' ni'tun_u Akor_uwan M_ura'ta tato' yau Esuwer_u am_u' use'mato', ip_uremato' iw_u' m_ura'ta nau te'sen pe ti'tuse, ipan pe to' usewansiuka'p_u, iye'ku'sa' na'ne' ipi' pi'.

“Sises Uya Ka'pon Epi'tisa',” Ta'p_u Pi'ta Uya

11 P_use ri si ka'pon uta'sisa' esi'p_u Pi'ta miri awonsi'ki Isaan pokon pi', miripan ka'pon am_u' usewansiukasa' eka'tum_u'p_u to' piya' Saraman Epa'kato' Iya' tato' ya'.

12 Ka'pon am_u' ensa' Pi'ta uya a'tai, ta'p_u iya to' pi', “Utonpa ton, Esuwer_u am_u', i'ri pe iyese pi' iusewansiukasa' kon seri pi'? I'ri pe iyese pi' ina enpit_u auya'nokon? T_umeruntir_u kon ke miri awonsi'ki Papa pori'manin nan pe tesi kon pi' ina uya epi'tisa' pen miri.

13 Utamokori kon amu' Epura'an, Aisi', miri awonsi'ki Seko' e'to' itese' pi' Papa uya tupoitoru Sises ku'sa' eke pe, miripan Paire' piya' inee'pu auya'nokon iwito' pe iya. Inonka tane iya ri, 'Sises i'se pura ina man,' ta'pu auya'nokon Paire' pi'.

14 Sises esi'pu waku, ipokena' ri e'tane, 'I'se pura ina man,' ta'pu auya'nokon. Sises innonkapai Paire' esi'pu, e'tane ka'pon amu' wipi'nin nu'pu enna'pu auya'nokon inonkato' pe iya.

15 Inke ka'pon amu' uko'manto' sara'tinin nu'pu wini'pu auya'nokon e'tane, Papa uya i'mu'sa'ka'pu iyeri'sa' apai. Ina esi seri ennin nu'san pe miri awonsi'ki ekamanin nan pe.

16 Ina miri awonsi'ki puse ri ka'pon uya Sises apuri uriya' puse ri e'mu'sa'kasa' pana' pe. Sises apuri ina uya uriya', puse ri ise'mesa' usepi'tisa' tanporon kon pe menyatui'ne'.

17 "Imiri'nokon miri awonsi'ki itepuru ton uya seri kupu'pu Sises pi' inkupunu kon i'tu auya'nokon pura iyesi pi'.

18 E'tane pura ri, Papa uya pu'kena' amu' auro'kasa' ru'pu pena ri awiri seri e'kupu'pu, puse ri Kurai* ekota'mato' oton tawon.

19 Miri pe iyesi pi', amakooi kon inonkati', Papa winikui' era'titi'. Miri a'tai, Papa usentu'ma ipi'nokon uya tanporo amakooi kon korukato' pe. Miri a'tai, waku pe ri Papa uya imeruntitanuku kon miri,

20 miri awonsi'ki Kurai, Papa Nanumu'pu ennoko iya miri—Sises ri.

3:13 E'sotas 3:15 **3:14** Ma'siu 27:15-23; Ma' 15:6-14; Uru' 23:13-23; Isaan 19:12-15 * **3:18** Kurai, miri pe pura *Me'saya—Papa Nanumu'pu* ta e'kwa pe; v. 20 airi ri mari.

21 Puse ri Sises si e'to' oton Epun po Papa uya tanporon koneka emenna' pe pona ri, pena ri tusauroku'pu kasa waku ton pu'kena' amu' yai.

22 Apune para Mosi' uya ekama'pu, 'Papa, Itepuru uya pu'kena', uwaraino anunto' oton itonpa kon ni. Tanporon inekamanu main awiri me'tai'.

23 Kari ri si pu'kena' maimu awiron pen esi a'tai, Papa uya ima'tanu'to' oton tumunki amu' koro'tapai,'†" ta'pu Pi'ta uya to' pi'.

24 Miyari ri Pi'ta usauroku'pu, "Seri pe si ne'ku'ai'ne' esi penaro' ri tanporon kon pu'kena' amu' nekama'pu Sanweru esi'pu si'kiri ri.

25 Papa uya ta'pu ru'pu atamokori kon pi' pu'kena' amu' awiri tanku'ton kuru pi'. To' uya si eporo'pu, imiri'nokon uya ri niri kanan eporo. Epura'an auro'ka'pu Papa uya i'tuti': 'Tanporon kon ka'pon amu' parema uya miri apayan nu'san poro,'‡ tasa' iya ru'pu," ta'pu iya.

26 Te'nonka pe, Pi'ta uya ta'pu, "Papa uya, taron kon piya' ennoko tuya wapiya kuru, tani'mu'sa'ka'pu, tupoitoru ennoko'pu ipiya'nokon, iparema kon pe, iri iyaseru kon tnonkai' iwesi kon pa," ta'pu Pi'ta uya to' pi'.

4

Pi'ta Miri Awonsi'ki Isaan Esi'pu Konsuru Amu' Piyau

1 Papa ena' use'man nito' turawasomanin nan, Esuweru amu' use'mato', iparemato' iwu' erasu ton epuru, miri awonsi'ki Satu'si amu' uyee'pu,

† 3:23 Isu'taronomi 18:15, 18-19 ‡ 3:25 Iseneses 22:18; 26:4

Pi'ta miri awonsi'ki Isaan pokon ni mari usauroku koro'tau.

² Miri a'tai, to' usakorota'pu se kasa iyese pi', asa'ron kon enno'sa' kon uya ka'pon amu' enupa esi'pu Sises e'mu'sa'ka'pu pi' teri'sa' apai. Seri enta', iyeri'sa' kon e'mu'sa'ka ekamanin pe.

³ Pi'ta miri awonsi'ki Isaan a'si'pu to' uya pariki'si ta'; pata uko'mansa' pi', taron ni wui emaku pu'ku pona ri.

⁴ E'tane tu'kan kon ka'pon amu' uya itekare etaka'sa' esi'pu, miripan kon uya apuri'pu, miripan kon e'tonpa'tisa' esi'pu 5,000 kaisa ri.

⁵ Miri ema'sa' yau, Esuweru amu' epuru ton miri awonsi'ki Main pi' enupanin nan amura'pu Surusiran pona.

⁶ Miri yau, Anas, Papa ena' use'man nito' tarawasomanin nan epuru pe te'sen esi'pu, Kaya'pas a'kiri te'san, Isaan, Arisanta miri awonsi'ki taron kon ni esi'pu itepuru tonpa ton pe te'san.

⁷ Tupiya'nokon Pi'ta miri awonsi'ki Isaan nepu'pu to' uya to' ekama'popi'to' pe tuya'nokon, "Nai kasa ikupu'pu auya'nokon? Inu' meruntiru yau, inu' ese' yau ikupu'pu auya'nokon?" tukai'.

⁸ Miri a'tai, Pi'ta, uta'kwaru'tisa' Waku A'kwaru ke uya ta'pu to' pi', "Eke ton ka'pon amu' epuru ton,

⁹ seri pe ina ekama'po auya'nokon ise'mesa' epi'tisa' ina uya pi', i'ri kasa isepi'tisa' tukai'.

¹⁰ Seri i'tuti' imiyamoro ka'pon amu' Esuweru amu'; Nasare' pon, Sises ese' uya pu'se ri warawo' epi'tisa' e'mu'sa'kasa' esi ipiyau'nokon. Inpokapitu'pu kon kurusu' pona iyeri'to' pe i'mu'sa'kasa' Papa uya.

11 Papa Maimu uya tasa' na'ne' Sises pi',
 “Seri ti' imiri'nokon aminin nan newaruma'ti'p_u
 enasa' man aminin nan uya amito' apon pe
 kuru,*

tasa'.

12 Makooi apai epika'tin nito' e'seposa' Sises poro
 riken, tanporo seri non po in_u' ri Papa nat_uru'p_u
 pika'tinin wann_i pe p_ura ri iy_esi miri,” ta'p_u Pi'ta
 uya.

13 Itepuru ton usewansiuka'p_u, ipiyi'ke' pe p_ura
 Pi'ta miri awonsi'ki Isaan ene t_uuya'nokon pi' sepa'
 nan ni miri awonsi'ki isenupasa' kon pen ni, e'tane
 to' uya to' to'ka'n_uk_u'p_u Sises a'kiron kon n_u'san pe.

14 E'tane si ka'pon to' nepi'ti'p_u e'm_u'sa'kasa'
 ene'p_u to' uya to' piyau. Miri a'tai, i'ri ri tato' to' uya
 p_ura iy_esi'p_u Pi'ta miri awonsi'ki Isaan pi'.

15 Kons_uru am_u' uya to' enpa'ka'p_u tiw_u' kon
 tapai, miripan kon e'sara'ti'p_u usauro'ni pi'
 t_utonpa kon am_u' pokon pe,

16 “I'ri pe to' kup_u seri, tanporon kon Surusiran
 po t_uuko'mansan uya ri tanporo to' n_ukup_u'p_u i'tu,
 miripan wapu'ti poken p_ura iy_esi.

17 E'tane seri ereutan_u'pai iy_esi iye'ta'n_u'kap_u
 wapiya ka'pon am_u' koro'tawiri. To'
 enari'papai'nokon, miri entakasa' auya'nokon
 a'tai ikota'ma kon miri tukai,” ta'p_u to' uya.

18 Miri a'tai, to' kanan ki'makaa'p_u to' uya. Ta'p_u
 to' uya to' pi', “Seri t_upo in_u' ri k_usauro'kat_u,
 k_usenupatu Sises ese' pi',” ta'p_u to' uya.

19 E'tane Pi'ta miri awonsi'ki Isaan pokon uya to'
 maimu eiku'p_u, “Imiri'nokon pe i'tuti', ipoken pe'

* 4:11 Eren 118:22

iwesi kon Papa enu yau, amaimu kon awiri e'ni yau Papa Maimu tentakai'?

²⁰ Ina e'pakar_u poken p_ura man ina nene'p_u ton, miri awonsi'ki ina neta'p_u ekamato' t_uuya'nokon piyapai," ta'p_u to' uya.

²¹ Ipan pe to' enari'pa t_uuya'nokon t_upo, Kons_ur_u am_u' uya to' nonka'p_u. Nai kasa to' kota'mato' t_uuya'nokon tukai' to' uya i'tu p_ura ri iyese'p_u, ap_une p_ura tanporon kon uya ri Papa apuripit_u pi' iye'ku'sa' r_u'p_u pi'.

²² Warawo' isepi'tisa' na'ne' esi'p_u 40 kaisaron entaino ri iw_uaiiyaai.

Pi'ta Miri Awonsi'ki Isaan Pokon Ip_urema'p_u

²³ T_unonkasa' kon a'tai, Pi'ta miri awonsi'ki Isaan enna'po'p_u t_utonpa kon am_u' koro'ta', ekamase'na tanporon ni use'man nito' t_urawasomanin nan epuru ton eke ton kuru miri awonsi'ki itepuru ton uya ta'p_u t_upi'nokon n_u'p_u.

²⁴ Ser_u etasa' t_uuya'nokon a'tai, to' ip_urema'p_u isewan ya' tenai' Papa pi'. “Itepuru, Imiri n_ukoneka'p_u Ep_un miri awonsi'ki non miri awonsi'ki parau miri awonsi'ki tanporon ni miri yawon.

²⁵ Ausaurok_u'p_u Wak_u A'kwar_u awiri ina tamokori, ipoitor_u Tepi' poro ri, se kasa tukai':

“T_uri pi' Esuwer_u am_u' pen usakorota;

i'ri pi' ka'pon am_u' e'kama, epoton kon kasa ri?

²⁶ Kin am_u' e'kama,

miri awonsi'ki non esanon ni am_ura isipokon pe,

Papa, Itepuru miri awonsi'ki inanumu'pu,
 Kurai† ewa'nomase'na,‡
 tukai'.

27 Inapai ri Era' miri awonsi'ki kopuna Ponsiyas Paire' pokon amura'pu Esuweru amu' pen ka'pon amu' Esuweru pon kon pokon pe seri pata yau, waku ayapiyo' Sises ananumu'pu ewa'noma pi' te'to' kon pe ekonekai'.

28 To' amurasa' tanporon ni imeruntiru miri awonsi'ki iyaseru awiri iye'ku'to' pe inkupu'pu ku'se'na.

29 Miripan, seri pe si enki, Papa: ina enari'pa to' uya; ina, ipoitoru ton iku'ki waku pe, tepiyi'se pura amaimu ekamato' pe ina uya.

30 Iyemiyatu tinkai' ri usepi'tin iku'ki, tiwi i'tuto' ipikiri miri awonsi'ki a'kwarupi'nin niri iku'ki, waku ipoitoru Sises ese' yau," tukai' to' ipurema'pu.

31 Tuwipurema kon tupo, to' e'nonkasa' a'tai, to' e'to' yau usi'ki'ma'pu. Tanporo to' uta'kwaru'ti'pu Waku A'kwaru ke, miripan kon uya Papa Maimu ekama'pu tepiyi'se pura.

Sises Apurinin Nan Esi'pu Amure' Ton Pen

32 Sises apurinin nan esi'pu tikin ni ri isenu-minkato', tikin ni ri itewan. Inu' uya ri uiwano' seri ta pura ri, e'tane tiwano' kon ke ri te'repasan pe to' esi'pu.

33 Merunti pe kuru esii'ma enno'sa' kon uya Itepuru Sises e'mu'sa'ka'pu teriku'pu apai

† 4:26 *Kurai* (Kiri' maimu yau), miri pe pura *Me'saya* (Ipuru maimu yau), asa'ri ri mari iyese, *Papa Nanumun* ta e'kwa pe. ‡ 4:26 Eren 2:1-2 4:27 Ma'siu 27:1-2; Ma' 15:1; Uru' 23:1; Isaan 18:28-29

4:32 Inkupu'pu 2:44-45

ekama'pu, miripan kon pona eke pe ri waku nonkasa' tanporo to' pona.

³⁴ Inu' ri tekota'masen kuru ri para iyese'pu to' koro'tau, kamoro tumainaru ke, tiwu' ke ri te'san uya ikurupo'pomapitu'pu, miripan epe'pu ru'pu ne'pitu'pu to' uya

³⁵ enno'sa' kon ena', miripan ekanpitu'pu to' uya to' kaisa ri ipara kuru to' esi pi' tense.

³⁶ Miri kasa si, Ilose' esi'pu miri, Ripai pa ru'pu pe te'sen, Sai'paras po iyentusa' ru'pu, Panapas tukai' enno'sa' kon nesakunu (Pori'mapi'nin ta e'kwa pe).

³⁷ Tumainaru kurupo'poma'pu iya, miripan epe'pu nee'pu iya enno'sa' kon ena'.

5

Ananayas, Ino'pu Sa'paira

¹ Ananayas, ino'pu Sa'paira uya kanan tunono kon kurupo'poma'pu.

² Itepe'pu tonpa'ka'pu to' uya tuno'pu ya' ri esii'ma tiwano' kon pe iye'to' pe, miripan tonpa'pu nee'pu iya enno'sa' kon ena'.

³ Miri a'tai, Pi'ta uya ta'pu, “Ananayas, i'ri pe iyese pi' iri ri Se'tan* ewonsa' iyewan ya', kasi pe ri Waku A'kwaru enku'ti pa, miri awonsi'ki itonpa ri kupu'pu esii'ma ipiyau?

⁴ Ikurupo'poma auya wapiya pe' iiwano' pe iyese'pu pen miri? Miri awonsi'ki ikurupo'poma tupo, itepe'pu esi'pu iiwano' pe pen ni pe' miri? I'ri pe iyese pi' tuku'sen pen ni kupu'pu auya? Ka'pon amu' pi' pe' kasi pe iwe'sa' pe ekama auya e'tane, kasi pe iwe'sa' Papa pi',” ta'pu iya.

* **5:3** *Se'tan*—Makoi ese' isakon, *Papa eseru ewaruma'tinin* ta e'kwa pe.

⁵ Serì etasa' tũyua a'tai, Ananayas uta'mo'ka'pũ eke' pe, mirì awonsi'ki ipan pe ri serì etanin nũ'san enari'nũmũ'pũ iye'ku'sa' rũ'pũ pi'.

⁶ Mirì tũpo, moine ton warawo' amũ' uyee'pũ itekepu ontise'na, mirìpan enpa'ka'pũ to' uya iu'na'tito' pe tũyua'nokon.

⁷ Osorũwau ite'kwa kũra' emiya era'tisa' tũpo'ne ri, ino'pũ uyee'pũ, i'ri e'ku'sa' tukai' i'tu iya pũra iyesi'pũ.

⁸ Pi'ta uya ekama'po'pũ, “Serì riken pe' Ananayas ya'inono kon epe'pũ pe ineporo'pũ kon?” ta'pũ iya. “Ewai', mirì riken itepe'pũ,” ta'pũ iya.

⁹ Pi'ta uya ta'pũ ipi', “I'ri pe iyesi pi' Itepuru A'kwarũ i'tupitũ kon pa iyekoneka'pũ kon?” ta'pũ iya. “Apũne enki, ataan'pũ u'na'tinin nũ'san ni mari esi moro mũra'ta nau, mirì awonsi'ki to' uya ri mari iyenpa'ka mirì,” ta'pũ iya.

¹⁰ Mirì a'tai ri, ipiyau ita'mo'ka'pũ eke' pe, mirìpan moine ton warawo' amũ' ewomũ'pũ itekepu ekare pi'. Itekepu ari'pũ to' uya iu'na'tito' pe itaan'pũ piyau ri.

¹¹ Mirì pi', ipan pe ri Sises apurìnin nan mirì awonsi'ki tanporon kon serì etanin nũ'san enari'nũmũ'pũ.

Enno'sa' Kon Uya E'ne' Ton Epi'ti'pũ

¹² Enno'sa' kon uya tu'kan ni i'tuto' ipikiri mirì awonsi'ki a'kwarũpi'nin kupũ'pũ ka'pon amũ' koro'tau, mirì awonsi'ki tanporon kon Sises apurìnin nan pe te'san esi'pũ pũroroi po, Saraman Epa'kato' Iya' tato' tau.

13 Tanporon kon ni esi'pɛ ipiyi'ke' pe to' koro'ta' enapai pɛra, ka'pon amɛ' uya ipan pe ri to' nama tane.

14 Miri koro'tau ri, tu'kan kon warawoti'si amɛ' miri awonsi'ki uri'sami'si amɛ' uya ri Itepuru apuri'pɛ, miri awonsi'ki to' tonpa pe to' era'ti'pɛ.

15 Miri pe iyesi pi', ka'pon amɛ' uya e'ne' ton nepɛ'pɛ, asanta ta' to' nonka'pɛ to' uya to' e'kwe' po'ne to' apon po'ne ri, Pi'ta uti a'kwarɛ'pɛ uya ri to' epi'tito' pe.

16 Anpisin ka'pon amɛ' Surusiran woi tɛuko'mansan uya e'ne' ton, makoi a'kwarɛ yen ton ni nee'pɛ, miripan kon usepi'ti'pɛ.

Enno'sa' Kon Ekota'ma'pɛ

17 Miripan Papa ena' use'man nito' tɛrawasomanin nan epuru miri awonsi'ki tanporon kon iya'kiri te'san Satu'si amɛ' tonpa ton ikintato' esi'pɛ ipan pe to' pi'.

18 To' uya enno'sa' kon a'si'pɛ, miripan kon uya to' tɛrɛ'pɛ pariki'si ta'.

19 E'tane ewarupi nau, Papa inserɛɛi uya pariki'si mɛra'taai a'koka'pɛ, miripan uya to' enpa'ka'pɛ.

20 “Esuwerɛ amɛ' use'mato', ipɛremato' iwɛ' ta' entanti', ka'pon amɛ' pi' tanporo seri main eka-matanti' emenna' pe uko'man nito' ekareei,” ta'pɛ iya.

21 Pata ema'sa' a'tai, to' ewomɛ'pɛ Esuwerɛ amɛ' use'mato', ipɛremato' iwɛ' ta' tauro'ka'pɛ kon awiri ri, miri awonsi'ki to' e'sara'ti'pɛ ka'pon amɛ' enupa pi'.

Papa ena' use'man nito' tɛrawasomanin nan epuru miri awonsi'ki itonpa ton uye'sa' a'tai,

Esuweru amu' Konsurui ton ki'ma'pu to' uya—tanporo Esuweru amu' epuru ton—to' amarato' pe. To' uya Esuweru amu' use'mato', ipuremato' iwu' erasu pe te'san ennoko'pu pariki'si ta' a'sisa' ru'san enpa'kase'na.

²² E'tane to' utisa' pariki'si ta' a'tai, to' eporo to' uya pura iyese'pu. Miri pi' to' enna'po'pu isekamase'na,

²³ “A'kopi'sa' pe kuru ri pariki'si eporo'pu ina uya iterasu ton ni e'soto'pi'sa' esi'pu mura'ta nau, e'tane ina uya a'kokasa' a'tai, inu' pura iyese'pu itau,” ta'pu to' uya.

²⁴ Seri tawon eta tuuya a'tai, Esuweru amu' use'mato', ipuremato' erasu ton epuru miri awonsi'ki Esuweru amu' use'mato', ipuremato' epuru ton usenu'mere'ma'pu miri, “I'ri ri si e'kupu'pu seri ko? I'ri pe to' esi'pu?” tukai'.

²⁵ Miripan e'tane, ka'pon uyee'pu, “Apune enti', pariki'si ta' ana'si'pu kon amu' e'soto'pi'sa' use'man nito', ipureman nito' iwu' tau ka'pon amu' enupa pi',” tase'na.

²⁶ Miri a'tai ri, erasu ton epuru uti'pu tutonpa ton pokon pe enno'sa' kon ne'se'na. To' ta'kwarakai' to' inne'pai pura to' esi'pu, apune pura ka'pon amu' uya tuwini kon ti' ke tukai' to' usenari'pa'pu.

²⁷ Enno'sa' kon nepu'pu to' uya Esuweru amu' Konsurui ton piya', Papa ena' use'man nito' turawasomanin nan epuru uya to' ekama'popi'to' pe.

²⁸ “E'se'ne' pe ina uya ta'pu ipi'nokon, ‘Sises ese' pi' ka'pon amu' kusenupatu,’ ta'pu e'tane ri, pata Surusiran emu' wisa' auya'nokon enupan nito'

auya'nokon ike ke miri awonsi'ki tumakooi ke ina esi puse ri munu uriya' ta auya'nokon," ta'pu iya.

²⁹ Pi'ta miri awonsi'ki itonpa ton uya imaimu eiku'pu, "Papa Maimu awiri ina e'to' pe iyese, ka'pon maimu awiri pen.

³⁰ Papa, ina tamokori ton e'to' itese' pi', Sises i'mu'sa'kanin nu'pu iyeri'sa' apai inwini'pu kon tupokapi'se yui pona.

³¹ Papa uya i'mu'sa'kasa' tenwo'netu wini, iku'sa' iya esa' wanni pe miri awonsi'ki pika'tinin pe, Esuweru amu' ra'tinin pe, to' makooi pi' isentu'ma ke.

³² Seri e'kupu ennin nu'san ina, Waku A'kwaru uya ri niri ene'pu, Papa nuturu'pu tumaimu awiron kon ena'," ta'pu to' uya.

³³ Seri eta tauya'nokon a'tai, ipan pe ri to' usakoro'ta'pu, miri awonsi'ki to' ri inwipai to' ena'pu,

³⁴ e'tane Pari'si, Main pi' enupanin nan tonpa, Kamariyeru itese', ka'pon amu' nunamanu ri e'soto'ka'pu to' piya', "Apune ru'kwi, kamoro warawo' amu' enpa'kati' aka'ne' pe," ka'se'na.

³⁵ Miripan uya to' auro'ka'pu, "Esuweru amu', inkupunu kon ti'tui' e'ti' pusamoro ka'pon amu' pi'.

³⁶ Pena sa'ne Tiyotas itese' ka'pon esi'pu inu' pe ri e'kupu i'se. Tu'kan kon ni ka'pon amu', 400 kaisaron kon era'ti'pu ipoitoru pe. Iwini'pu to' uya, miripan poitoru ton nu'san e'ta'nu'ku'pu, miri awonsi'ki i'ri para ri iyese'pu.

³⁷ Kuri ri e'ma'pu ta', Isutas, Kiyarari ko' kanan esi'pu, ka'pon amu' ese' menukapi'to' a'tai, miri awonsi'ki ka'pon amu' kanan anin pe iyese'pu. Kuri

ri kanan wini'pu to' uya, miripan poitoru ru'san e'ta'naku'pu.

³⁸ Miri pe iyese pi', seri pe na'ne' pi' kapai e'ai' ipi'nokon: tiwi p̄samoro warawo' am̄u' nesii; tiwi to' nutii. Seri te'ku'sen esi a'tai ka'pon eseru pe, iye'kupu p̄ra iyese miri.

³⁹ E'tane Papa winon pe iyese a'tai, inu' uya ri p̄samoro ereutanaku p̄ra ri iyese. Papa ewa'noma auya'nokon pe ri iye'to' oton," ta'pu iya.

⁴⁰ Seri ta iya pi', "Ewai' ri ka'wa," ta'pu to' uya. Enno'sa' kon ki'ma'pu to' uya, miripan kon ari'po'pitu'pu to' uya, miripan kon uya ta'pu to' pi', "Sises ese' yau kasauro't̄u seri t̄po," ta'pu to' uya. To' utito' pe to' nonka'pu to' uya.

⁴¹ Enno'sa' kon uti'pu Esuweru am̄u' Konsuruui ton piyapai. Pori' pe to' esi'pu, ap̄ne p̄ra Papa pona wak̄u pe ri iyese pi' to' ekota'ma Sises ese' wenai.

⁴² Miri awonsi'ki w̄u kaisari ri Esuweru am̄u' use'mato', ip̄remato' iw̄u' tau, ka'pon am̄u' iw̄u' tau'ne tereutai' p̄ra ri, Sises pi' to' enupa pi' to' esi'pu, wak̄u itekare ekama pi' to' esi'pu, Sises esi Papa Nan̄m̄u'pu, tukai'.

6

7 Kaisaron Kon Utan̄m̄u'pu

¹ Miri a'tai, tu'ke ri Sises apurinin nan tu'kanoro epirik̄u'pu. Kiri' pe t̄usauro'san Esuweru am̄u' miri awonsi'ki patawon am̄u' Esuweru am̄u' pokon pe to' e'manenpato' esi'pu, kiyari ke t̄tonpa kon uri'sami'si am̄u' itaan'pu ima'tasa' kon ini to' uya pi'.

2 Miri pi' si ka'pon amu' amuranuku'pu 12 kaisaron kon uya tanporon kon Sises apurinin nan, miri awonsi'ki ta'pu to' uya, "Iye'to' pe para iyese miri upona'nokon Papa Maimu tekamai' para taron ni pi' e'ni a'tai usekan ni pi' ri.

3 Utonpa ton, 7 kaisaron kon ka'pon amu' epoti' i'koro'tapai'nokon, i'tunin nan pe kuru ka'pon amu' ni'tunu ton, Waku Akwaru ke ita'kwaru'tisa' kon, seri i'se e'nito' tarawasomanin pe te'ton kon,

4 ipureman pi' pari ina e'to' pe ka'pon amu' enupa pi' Papa Maimu ke," ta'pu to' uya.

5 Tanporon kon epori'ma'pu enno'sa' kon maimu pi', miripan kon uya si Si'tipun anamu'pu Papa Maimu apurinin ye' kuru, Waku Akwaru yen; Piri' ri kanan to' tonpa pe; taron kon Puro'koras; Ni'kanoru; Timon; Parumenas; Ne'koras, Antiyo' winon, iyera'tisa' ru'pu Esuweru amu' tonpa pe.

6 To' uya si pusamoro anansa' kon nu'san taru'pu enno'sa' kon piya', to' paremato' pe si to' uya, tarawasooi kon si ku'to' pe to' uya.

7 Miripan Papa Maimu usekama'pu miyari ri tu'kan kon pi' ri tu'ke ri Sises apurinin nan tu'kanoro epirik'pu Surusiran po. Use'man nito' tarawasomanin nan ni era'ti'pu tu'ke kuru ri Sises uya enupan nito' awiri te'to' kon pe.

Si'tipun A'si'pu To' Uya

8 Si'tipun, eke ri Papa uya waku nonkasa' esa' miri awonsi'ki tameruntiru kenan uya, eke pe ri a'kwarupi'nin miri awonsi'ki i'tuto' ipikiri ri kupu'pu ka'pon amu' koro'tau.

9 E'tane taron kon ka'pon amú' Esuwerú amú' usenupato' iwú' tau te'san tonpa ton Inonkasa' Kon tukai' tesa'san, Esuwerú amú' pe ri te'san, Sairini miri awonsi'ki Arisantiriya winon kon ena'pú ewa'noma pi'. Kamoro miri awonsi'ki Esuwerú amú' Siri'siya miri awonsi'ki Eisa Mure'pú winon kon pokon pe te'sepose Si'tipún pokon pe to' e'sei'pítú'pú.

10 E'tane ipoken púra ri iyesei tato' ipikiri púra ri iyesei'pú, apúne púra isaurokú pi' i'tunin pe kuru Iya'kwarú uya iku'sa' ke.

11 Miripan kon uya ama'ai ka'pon amú' anamú'pú eseru'tinin nan pe, "Si'tipún eta'pú ina uya Mosi' miri awonsi'ki Papa sapema pe ri isaurokú'pú," taton kon.

12 Miripan kon uya ka'pon amú', Esuwerú amú' epuru ton miri awonsi'ki Main pi' enupanin nan ni tũnka'pú. To' uya Si'tipún a'si'pú, miripan nepú'pú to' uya Esuwerú amú' Konsurúú ton piya'.

13 To' uya kasi pe ri Si'tipún eseru'tisa' tũyua'nokon nũ'pú ekama'pú Konsurú amú' pi'. "Iyereuta púra ri púse ri usauro'ni pi' man iri pe use'man nito', ipureman nito' iwú' pi' miri awonsi'ki Main, Mosi' winon pi'.

14 Ina uya etasa' man ta iya púse ri Sises, Nasare' pon uya seri pata ma'tanukú tawon. Miri awonsi'ki ensima iya uko'man ni eseru Mosi' natũrú'pú uyena'nokon," ta'pú to' uya.

15 Tanporo ense'na iyamúrasa' kon Esuwerú amú' Konsurúú ton iwú' ta' uya enpítú'pú itemú' poi ri, miripan kon uya itemú' ene'pú inserú emú' kasa ri.

7

Si'tipun Uya Esuweru Amu' Konsurui Ton Auro'ka'pu

¹ Miri a'tai, use'man nito' tarawasomanin nan epuru uya Si'tipun ekama'po'pu, "T'napai ri pe' ka'pon amu' nusauro'ai'ne' ipi' esi?" tukai'.

² Si'tipun uya imaimu eiku'pu, "Imiri'nokon, tnamasan itepuru ton, apune etati'. Papa usenpoika'pu Epura'an piya' Me'sa'po'temiya po Eran pona iti rawiri.

³ 'Apata'se' miri awonsi'ki itonpa ton ininki, itiki miri non sekamayai'ne' ya',* ta'pu Papa uya ipi'.

⁴ "Miripan uya Karutiya pon kon nimi'pu. Eran po iyepatama'pu. Ikuipunu uma'ta'pu tupo, Papa uya ennoko'pu seri mako'manyatai'ne' ya'.

⁵ E'tane inturunu pe te'sen itimamin tusa' iya pura iyesi'pu, e'tane Papa usauroku'pu iku'to' pe uya tukai', 'Imiri, miri awonsi'ki apayan nu'san, Esuweru amu' uya non epoto' oton.' Miri a'tai, imare pura Epura'an esi'pu.

⁶ Miri tupo, Papa usauroku'pu, 'Apayan nu'san, Esuweru amu' e'to' oton ka'kuran pe taron kon pata yau. Miri yau, tapiyo' kon pe to' e'tane, to' kota'mato' oton to' uya 400 kaisa ri wai'piya,

⁷ e'tane uri uya miri eke pata kota'mato' oton. To' epa'kato' oton miri eke pata yapai, seri pata ya' uyapuripi'se'na,† ta'pu Papa uya.

⁸ Miri a'tai, Papa uya Epura'an auro'ka'pu tanporo warawo' amu' uya tuyun kon pi'pi puturakapi'to' pe, tamunki pe to' esi ekamanin

* 7:3 Iseneses 12:1 7:4 Iseneses 11:31; 12:4 7:5 Iseneses 12:7; 13:15; 15:18; 17:8 † 7:7 Iseneses 15:13-14; E'sotas 3:12

pe. Miri a'tai, Aisi', Epura'an mu entu'pɛ, 8 kaisa ri wɛi tɛpo, itun pi'pi puturɛka'pɛ iya. Miri tɛpo, Aisi' mu, Seko' entu'pɛ, miripan yun pi'pi puturɛka'pɛ iya. Seko' uya niri 12 kaisaron kon tɛmunki amɛ' yun pi'pi puturɛkapitɛ'pɛ.

⁹ “Isole' esi'pɛ to' tonpa pe. Irunan ni ikinta'pɛ Isole' pi', miripan kon uya ikɛrɛpo'poma'pɛ Isi' yawon kon poitorɛ pe. E'tane Papa esi'pɛ iya'kiri,

¹⁰ miripan uya ipika'ti'pɛ tanporo ewankamanin apai. Isole' repa'pɛ iya ipu'ketɛ ke, miripan uya iku'sa' esi'pɛ wakɛ pe kin Peero ewakiri pe. Miri a'tai, Peero uya Isole' kupɛ'pɛ tanporo Isi' miri awonsi'ki tɛpata'se' epuru pe.

¹¹ “Miri a'tai, iwankan uta'mo'ka'pɛ tanporo Isi' miri awonsi'ki Kenan pata pona. Miri a'tai, ka'pon amɛ' apɛ'kaa'pɛ iwan pi', utamokori kon amɛ' ri enta'nato' ipi' pɛra iyesi'pɛ, miripan uya eke ri ewankamanin nee'pɛ.

¹² Seko' uya eta'pɛ, ‘Kiyari esi Isi' po,’ tawon, miripan uya tɛmunki amɛ', utamokori kon amɛ' ennoko'pɛ kiyari ennase'na.

¹³ Iyakon ite'kwa pe to' utisa' a'tai, Isole' usekama'pɛ tɛrui ton pi'. Miri a'tai si, Peero uya Isole' tonpa ton i'tu'pɛ miri.

¹⁴ Seri tɛpo, Isole' uya tɛmaimu ennoko'pɛ tɛkupɛnɛ uye'to' pe tanporo tɛtonpa ton pokon pe Isi' pona. 75 kaisa ri tanporo to' esi'pɛ.

¹⁵ Miri a'tai, Seko' uti'pɛ Isi' pona, miripan uma'ta'pɛ. Imunki amɛ' ri niri uma'tapitɛ'pɛ miri

7:8 Iseneses 17:10-14; 21:2-4; 25:26; 29:31–35:18 **7:9** Iseneses 37:11-28; 39:2, 21 **7:10** Iseneses 41:39-41 **7:11** Iseneses 42:1-2
7:13 Iseneses 45:1-16 **7:14** Iseneses 45:9-10, 17-18; 46:27

yau.

16 To' ekepu nee'pu to' uya Si'ken pona, miripan kon u'na'tipitu'pu to' uya Epura'an ne'ma'pu yau Amoru munki amu' wini, Si'ken po.

17 “A'ko pe iweyu uyepu koro'tau, Papa uya tusauroku'pu ku'to' pe Epura'an pi', tu'ke kuru utonpa kon amu' epansa' esi'pu.

18 Miri a'tai, taron ni kin, Isole' i'tunin pen ena'pu Isi' epuru pe.

19 Kari ri e'kupu'pu to' wanmura iri pe to' ma'tanuku pi', uri'nokon tamokori ton kota'ma'pu to' uya. To' apiyo'ma'pu to' uya tentusan mare amu' eno'mato' pe to' uya, to' uma'tato' pe.

20 “Miri koro'tau, Mosi' entu'pu. Waku pe ru'kwi iyese'pu, mare e'pi'to' kasa pura. Osorawau kapui to' uya imainanpa'pu ikupunu iwu' tau.

21 To' uya enpa'kanu'sa' a'tai, Peero ensi uya anumu'pu, miripan emo'ka'pu iya tamare kasa kuru ri.

22 Mosi' usenupasa' esi'pu tanporo Isi' pon kon eseru yau. Imaimu, miri awonsi'ki inkupunu esi'pu merunti pe.

23 “40 kaisa ri iwaiyiyai Mosi' enasa' a'tai, tatonpa ton ka'kuranpa pi' iye'kupu'pu.

24 To' tonpa Esuweru pon wipitu Isi' ko' uya ene'pu iya, miripan uti'pu Esuweru pon pika'tise'na. Miripan e'ma'pu Mosi' uya, Isi' ko' tawise.

7:15 Iseneses 46:1-7; 49:33 7:16 Iseneses 23:3-16; 33:19; 50:7-13;

Isa'suwa 24:32 7:18 E'sotas 1:7-8 7:19 E'sotas 1:10-11; 22

7:20 E'sotas 2:2 7:21 E'sotas 2:3-10

25 Mosi' usenuminka'pɯ tɯtonpa ton uya tɯto'ka'nɯkɯ tukai' Papa uya tɯku'sa' to' pika'tinin pe tukai', e'tane to' uya ito'ka'nɯkɯ pɯra iyesi'pɯ.

26 Miri' ema'sa' yau, Mosi' uya asa'ron kon Es-uwerɯ pon kon epanta'ma ene'pɯ, to' epanta'ma ereutanɯkɯ i'se iyesi'pɯ. Ta'pɯ iya to' pi', 'Warawo' amɯ' isitonpa pe iwesi kon miri. Itonpa kɯ'wipitɯi, ta'pɯ iya to' pi'.

27 "E'tane warawo' tɯtonpa wipi'nin uya Mosi' a'tu'ma'pɯ, 'Inɯ' uya iku'sa' ina epuru pe, miri pe pɯra ina eseru aimenkanin pe?

28 Uwipai pe' iwesi Isi' ko' wini'pɯ auya kasa ko'mamiyau?' tai'ma.

29 Mosi' uya miri etasa' a'tai, iyapɯrɯmɯ'pɯ Metiyan pona. Miri yau, iko'mamɯ'pɯ ka'kɯran pe. Miri yau, asa'ri imu'ta'pɯ.

30 "40 kaisa ri wɯipiya tɯpo, inserɯ usenpoika'pɯ Mosi' piya' yu' epo'ti yau, rimono' tau, a'ko pe Sainai Wɯpɯ piyau.

31 Miri ensa' tɯuya a'tai, ipan pe isewansiuka'pɯ yu' epo'ti pɯra iyesi pi'. A'ko pe iwini'kɯi' iti koro'tau, Papa maimu eta'pɯ iya:

32 'Papa uri, atamokori kon Epɯra'an, Aisi', miri awonsi'ki Seko' e'to' itese' pi'.‡ Mosi' enari'namɯ e'tititi'ka'pɯ, inenpai pɯra.

33 Miri a'tai, Papa uya ta'pɯ ipi', 'Asapatooi imo'kaki! Miri iye'mɯ'sa'kasa' na'ne' yau esi wakɯ pe.

34 Umunki amɯ' ekota'ma ensa' uya man Isi' po. To' a'namɯ etasa' uya man. Miri pi' uye'sa' man to'

7:29 E'sotas 2:11-15; 18:3-4 ‡ 7:32 E'sotas 3:6

mo'kase'na. Inke p̄ra isi'ki; iyennoko uya ser̄i Isi' pona' ta'p̄u iya ip̄i'.

35 “P̄use ri Mosi' Esuwer̄u am̄u' newaruma'ti'p̄u, 'Inu' uya iku'sa' ina epuru pe, ina eseru aimenkanin pe?’ ta'p̄u ip̄i' r̄u'p̄u, k̄ari ri ennoko'p̄u Papa uya to' epuru pe, to' pika't̄inin pe n̄iri, inser̄u wini isenpoikasa' r̄u'p̄u yu' yau.

36 Mosi' k̄ari ri utamokori kon am̄u' anin n̄u'p̄u inni Isi' apai, a'kwar̄u'pi'nin miri awonsi'ki i'tuto' ip̄ikiri ri kup̄u'p̄u iya, Papa uya imerunt̄ii t̄usa' esi'p̄u. Miri ton kup̄u'p̄u iya Isi' po, Isuweyu Parau kau miri awonsi'ki rimono' tau n̄iri 40 kaisa ri w̄u'piya yau.

37 “P̄use ri Mosi', Esuwer̄u am̄u' auro'kanin n̄u'p̄u, 'Papa uya pu'kena' an̄anto' oton i'koro'tapai'nokon uwaraino,' tawon n̄u'p̄u. §

38 P̄use ri Mosi' esi'p̄u to' koro'tau rimono' tau. Inser̄u, Papa winon uya auro'ka'p̄u Sainai W̄u'p̄u po. Main, uko'man n̄ito' ip̄i' ekama'p̄u iya ip̄i'.

39 “E'tane utamokori kon am̄u' uya apuri p̄ra iyesi'p̄u. To' uya inurunpa'p̄u. Tewan kon yau, enna'popai to' esi'p̄u Isi' pona.

40 Eran auro'ka'p̄u to' uya, 'Papa tato' ip̄i' pe ika'sa' inkoneka', uyanin kon pe te'ton. P̄use ri Mosi', une'nin n̄u'p̄u kon Isi' apai e'tane, i'ri pe ri nawon iyesi'p̄u tukai' ina uya i'tu p̄ra man!' ta'p̄u to' uya.*

41 Miri a'tai, to' uya papa tato' pe ip̄i' ika'sa' koneka'p̄u paka m̄are kasa, t̄ause'mato' kon

7:34 E'sotas 3:5, 7-8, 10 7:35 E'sotas 2:14 7:36 E'sotas 7:3; 14:21; Nonpa 14:33 § 7:37 Isu'taronomi 18:15, 18 7:38 E'sotas 19:1–20:17; Isu'taronomi 5:1-33 * 7:40 E'sotas 32:1

nee'pɛ to' uya ipiya', miripan kon userenka'pɛ, to' umanum'pɛ tɛnkoneka'pɛ kon nama tɛuya'nokon ekamanin pe.

⁴² E'tane Papa usakorotasa' era'ti'pɛ to' piyapai, apɛne pɛra papa tato' ipi' ika'sa' konekasa' to' uya wenai. To' nonka'pɛ iya to' ipɛremato' pe wɛi enu, kapɛi, miri awonsi'ki siriki amɛ' pi'. Seri e'menukasa' esi'pɛ pu'kena' karetaai yau:

“Esuwerɛ amɛ' rɛ'kwɛi, seri iuse'mato' kon nepɛ auya'nokon pɛra iyesi'pɛ uyena'
40 kaisa ri wɛipiya rimono' tau iwesi kon a'tai.

⁴³ Papa tato' pe ipi' ika'sa' More' iwɛ' apɛtɛ'pɛ auya'nokon,
siriki pe ika'sa' ka'pon amɛ' nesakɛnɛ Re'pan tukai'.
Ika'sa' iwipɛremato' kon ipi'.
Miri pe iyesi pi', iyenno'to' uya 'nokon oton inni'† Paperan enta'.

⁴⁴ “Utamokori kon amɛ' piyau Papa uya amɛranɛ'nito' ita' esi'pɛ rimono' tau. Iyekonekasa' esi'pɛ Mosi' pi' Papa nekama'pɛ awiri. Ikonekato' ipi' pe tɛnene'pɛ kasa.

⁴⁵ Utamokori kon amɛ' uya miri amɛranɛ'nito' ita' eporo'pɛ tɛkɛipɛnɛ kon wini, miripan ari'pɛ to' uya ta'kiri'nokon Isa'suwa a'kiri tɛuti kon a'tai non mo'kai'. Miri non mo'ka'pɛ to' uya tɛron kon ka'pon amɛ' enapai. Papa uya to' ainɛnpa'pɛ Esuwerɛ amɛ' uya non mo'kato' pe. Iko'mamɛ'pɛ miri pata yau Tepi' weyu e'seporo pona ri.

7:41 E'sotas 32:2-6 † **7:43** Emos 5:25-27 (LXX) **7:44** E'sotas 25:9, 40 **7:45** Isens 3:14-17

46 Kuri ri Papa ewakiri pe iye'sa' ru'pu, miripan uya Papa ekama'po'pu iuti amito' pe tauya tumiri pe.

47 E'tane Saraman uya kuru iuti ami'pu.

48 “Miripan e'tane, Papa esi eke pe ka'pon nami'pu tau tuko'mansen pen. Pu'kena' amu' tonpa uya tasa',

49 “ ‘Epu' esi uyapon pe,
non esi u'ta apon pe.

I'ri warai iuti ami auya'nokon uiwu' pe?

ta Itepuru uya.

Miri pe pura nai yau umoronka'to' pata'se' esi?

50 Unkoneka'pu ton pen pe' se ton tanporon ni?‡

51 “Imiri'nokon iri ton ni, sa'man ton ni iyewan kon! Imiri'nokon e'makoima atamokori kon amu' esi'pu kasa. Iuko'mamu kon Waku Akwaru ewaruma'ti pi'.

52 Atamokori kon uya wapiyaro' kon pu'kena' amu' kota'ma'pu. To' uya ri Ipokena' Ka'pon uyepu ekamanin nan tu'ka'pu. Seri pe si eparanka'pu auya'nokon iteyaton non ena' to' uya iwito' pe.

53 Imiri'nokon uya Papa Maimu eporo'pu miri, Papa nuturu'pu atamokori kon ena'. Inseru amu' uya miri turu'pu atamokori kon ena'. Miri e'tane, iyawiri pura iwesi kon,” ta'pu Si'tipun uya to' pi'.

Ti' Ke Si'tipun Wini'pu To' Uya

54 Esuweru amu' Konsurui ton uya puse ri Si'tipun maimu etasa' a'tai, ipan pe to' usako-rotapu. Miri a'tai, to' uya tui kon kititi'mapu, ipan pe tusakorota kon pe.

7:46 2 Sanweru 7:1-16; 1 Karono'kuru 17:1-14 7:47 1 Kin Amu' 6:1-38; 2 Karono'kuru 3:1-17 ‡ 7:50 Aisaya 66:1-2 7:51 Aisaya 63:10

55 E'tane, Si'tipun uya eke pe Waku Akwaru eposa' esi'pu, ka'ta' tenu turu'pu iya. Miri a'tai, Papa a'kwarii ene'pu iya. Miri a'tai, Sises e'mu'sa'kasa' ene'pu iya Papa enwo'netu wini.

56 “Apune enti', Papa uya Epun mura'taai a'kokasa! Sises e'mu'sa'kasa' esi Papa enwo'netu wini!” ta'pu Si'tipun uya.

57 Eke pe to' uki'pi'nunpitu'pu. Tanporo to' uti'pu itekare pi', temiyatu kon tupa'pu to' uya tupa'pu kon pona imaimu eta tuuya'nokon namai'.

58 To' uya tupa'si'se enpa'ka'pu pata yapai, miripan kon e'sara'ti'pu eke ton ti' ma'kiri pi' ipona, iwini'pu to' uya. Ka'pon amu' iwinin nan uya tupa'pu kon pu'ro'pon kanka'pu, miripan nonka'pu to' uya non pona moineri'pi, Saaru piyau.

59 Ti' ke to' uya tuwini koro'tau, Si'tipun ipurema'pu, “Uyepuru, Sises, uya'kwaru ananki!” ta'pu iya.

60 Tese'mu po ita'mo'ka'pu, eke pe iyipurema'pu, “Uyepuru, to' ku'kota'mai to' uya uwini pi'!” ta'pu iya. Miri ta tupo, iyeriku'pu.

8

¹ Saaru esi'pu miri yau iwiti' ri ta pi'.

Saaru Uya Sises Apurinin Nan Kota'mapitu'pu

Miri a'tai, ka'pon amu' e'sara'ti'pu ipan pe Sises apurinin nan kota'ma pi' Surusiran po tu'uko'mansan. Miri a'tai, tu'kan kon Sises apurinin nan apuramu'pu Isutiya miri awonsi'ki Sameriya pona. Enno'sa' kon niken e'ninsa' esi'pu Surusiran po.

² Papa uya tasa' kasa warawo' amu' uya Si'tipun u'na'ti'pu, eke pe tauta'kwarakai' to' ukaramu'pu iwenai.

³ Miri koro'tau, Saaru e'sara'ti'pu Sises apurinin nan ma'tanaku pi'. Iyewonpitu'pu iuti kaisa ri'ne, warawo' amu', uri'san amu' niri Sises apurinin nan tuptu'pu pariki'si ta'.

Piri' Uya Itekare Ekama'pu Sameriya Po

⁴ Sises apurinin nan, ka'pon amu' nainupa'san Surusiran apai uti'pu pata kaisa ri wak u Sises eka-reei ekama pi'.

⁵ Sises apurinin nan tonpa, Piri' itese' uti'pu Sameriya pata ya', miripan uya miri yau Kurai* ekama'pu ka'pon amu' pi'.

⁶ Miri a'tai, tu'kan kon esi'pu ipan pe Piri' maimu inetapai, wak i'tuto' ipi' inkupun ensa' tuya'nokon pi'.

⁷ Makoi† a'kwaru ton epa'ka'pu ipirorunpitu' ma ka'pon amu' apai. Tu'kan kon ise'mesa' kon, sekentei'pa' nan usepi'ti'pu, aru'ne para Papa uya Piri' ku'sa' wenai to' epi'tinin pe.

⁸ Tu'kan kon ka'pon amu' esi'pu ipan pe pori' pe miri pata yau.

Saiman, Enwoke'

⁹ Miri yau iyese'pu ka'pon, Saiman itese', enwoke', eke pe te'ku'sen miri pata yau. Enwoke' pe tesi wini te'ku'sen pen ni ku'nin pe iyese'pu Sameriya yawon kon tewansiukai'.

8:3 Inkupu'pu 22:4-5; 26:9-11
Me'saya—Papa Nanu'tu'pu ta e'kwa pe.

* **8:5** *Kurai*, miri pe ru'ga
 † **8:7** *Makoi*, miri pe ru'ga

iri, Kiri' maimu yau.

10 Tanporo ka'pon amu' miri yawon kon aiko ton miri awonsi'ki eke ton ni uya apuri'pu. "Puse ri ka'pon esi Papa meruntiru yau," ta'pu to' uya. Eke kuru tukai' ka'pon amu' uya esaku'pu.

11 Apuri pi' to' esi'pu, apune pura enwoke' pe tesi ke to' ewansiukapitu'pu iya, inke ri.

12 E'tane nin si Piri' nekamanu waku itekare, Papa e'to' esa' wann pe, miri awonsi'ki Sises Kura ese' ekareei apurisa' to' uya a'tai, warawoti'si amu' miri awonsi'ki uri'sami'si amu' epa'taisima'pu.

13 Saiman uya ri niri Piri' maimu apuri'pu. Piri' uya ipa'taisima'pu tapo, ipikiri Saiman esi'pu mi airi ri Piri' uti a'tai. Tiwiri ri Saiman usewan-siukapitu'pu, i'tuto' ipi' miri awonsi'ki eke Papa turawasooi Piri' nukupunu tense.

14 Surusiran pon kon enno'sa' kon uya etasa' a'tai, tu'kan kon Sameriya yawon kon uya Papa maimu apurisa' tawon, to' uya Pi'ta miri awonsi'ki Isaan ennoko'pu to' piya'.

15 To' uya to' eposa' a'tai, to' ipurema'pu to' pona Waku A'kwaru epoto' pe to' uya,

16 apune pura Waku A'kwaru uye'sa' pura ri mari iyesi'pu to' pona. Piri' uya to' pa'taisima'pu esi'pu Itepuru Sises ese' yau riken.

17 Miri a'tai, Pi'ta miri awonsi'ki Isaan uya temiyatu kon turu'pu to' pona, miripan kon uya Waku A'kwaru eporo'pu.

18 Saiman uya ene'pu Papa uya Ta'kwaru turu ka'pon amu' pona enno'sa' kon uya temiyatu kon turu to' pona a'tai, purata ke to' repa i'se iyesi'pu.

19 "Urepati' miri ku'nin ke. Miri a'tai, tanporo uyemiyatu tuto' uya ton ipona uya, Waku A'kwaru epoto' pe," ta'pu iya.

20 Pi'ta uya imaimu eiku'p_u, “Íp_urataai pokon pe auma'ta miri, ap_une p_ura iusenuminka pi' Papa winon e'ma auya p_urata ke tukai'!

21 Papa uya iku'sa' p_ura man í'ri ku'nin pe ina a'kiri seri t_urawaso yau, ap_une p_ura iyewan esi waku pe p_ura Papa pona.

22 Miri pe iyese pi', iri pe iusenuminkato' inonka' miri awonsi'ki iwip_urema pa Itepuru pi'. Miri a'tai, ipi' isentu'ma uya amakooi eno'mato' pe ikup_u i'se iusenuminka'p_u na'ne'.

23 Hi'tu uya wenai ipan pe iyikinta ina pi' tukai', tiwi ri iye'makoima wini,” ta'p_u iya.

24 Miri a'tai, Saiman uya ta'p_u Pi'ta miri awonsi'ki Isaan pi', “Íp_uremati' upona. Miri a'tai, makayatui'ne' ri e'kup_u namai' upi',” ta'p_u iya.

25 Pi'ta miri awonsi'ki Isaan uya ka'pon am_u' auro'ka'p_u t_upo, Sises i'tusa' t_uuya'nokon na'p_u pi' itekare ekama'p_u to' uya to' pi', Papa winon Sises ekareei, to' e'sara'ti'p_u enna'pon pi' Surusiran winikui'. T_uuti kon koro'tau, waku Sises ekareei ekama'p_u to' uya ka'pon am_u' pi' Sameriya yawon eke iwa ton pata yau'ne.

I'tiyo'piya Kwin P_urataai Esa'

26 Inse_u, Papa nennoko'p_u uya Piri' auro'ka'p_u, “Ekoneka' iuti pa w_ui enu enuku kamisi winikui' Surusiran poino asanta Kesa ponakan ta',” ta'p_u iya. (Miri asanta e'nonka'p_u miri.)‡

27 Miripan ekonekasa' uti koro'tau, ka'pon eporo'p_u iya miri asanta tau t_uutisen, eke kuru

‡ 8:26 Miri asanta e'nonka'p_u miri; miri pe p_ura, Miri asanta esi rimono' ta' e'ma.

ri I'tiyo'piya pata kwın p̄rataai esa', Surusiran pona itisa' r̄p̄u ip̄remaı'.

28 Iyenna'po a'tai, iyereutasa' esi'p̄u t̄kanwa tararan yau. Eke pe pu'kena' Aisaya n̄menuka'p̄u kareta ekama iya esi'p̄u.

29 Papa A'kwar̄u uya Piri' auro'ka'p̄u, “Enta miri tararan piyau a'ko pe e'se'na,” tukai'.

30 Miri a'tai, Piri' uti'p̄u tararan piya', miripan uya eta'p̄u ekama iya pu'kena' Aisaya n̄menuka'p̄u yau. Piri' uya ekama'po'p̄u, “Mekamayai'ne' pe' m̄to'ka'n̄an?” ta'p̄u iya.

31 “Kane, ito'ka'n̄k̄u uya p̄ra man. Ka'pon uya ri nin enpoika a'tai, ito'ka'n̄k̄u uya ri,” ta'p̄u iya. Miripan uya Piri' ki'ma'p̄u t̄piyau iyereutato' pe t̄kanwa ya'.

32 Se tawon ekama pi' iyesi'p̄u:
 “To' uya ari'p̄u karimeru ari kasa iwıse'na.
 Karimeru m̄re kasa ti'po' ak̄'tane e'pana te'sen,
 miripan kasa isaurok̄u p̄ra iyesi'p̄u.

33 Se pe ri iye'ku'to' yau, in̄u' ri iwenaino' p̄ra iyesi'p̄u.

In̄u' uya ri ipayan n̄'san ekamato' oton pen ni, ap̄ne p̄ra non po iko'manto' emo'ka'p̄u pi',” § tawon.

34 Kwın p̄rataai esa' uya Piri' ekama'po'p̄u, “Ekamaki in̄u' pi' pu'kena' uya imenukasa'; t̄miri pi' pe', t̄ron ni pi' ri kati?” ta'p̄u iya.

35 Miri a'tai, Piri' epiya'ti'p̄u miri ri iye'menukasa' itekare apai wak̄u Sises ekareei ke ipana'ti pi'.

³⁶ To' uti koro'tau asanta tawiri, tuna eporo'pu to' uya. “Apune tuna enki! Upa'taisimaki. F'ri niri ken uwa'kutai'no miri apai?” ta'pu iya.

³⁷ Piri' uya ta'pu, “Apuri auya a'tai tanporo iyewan a'kiri, iye'kupu ri,” ta'pu iya.

Miripan maimu eiku'pu iya, “Apuri uya seri Sises Kurai esi Papa Mu pe tukai',” ta'pu iya.*

³⁸ Miripan uya tararan ereutanuku'pu. Miri a'tai, asa'ri ri mari Piri' miri awonsi'ki kwin purataai esa' uti'pu tuna ka', miripan pa'taisima'pu iya.

³⁹ To' ekanwaka a'tai tuna kapai, Itepuru A'kwaru uya Piri' ari'pu. Kwin purataai esa' uya ene pura iyena'pu. Miri ri e'tane, iti'pu pori' pe esii'ma asanta tawiri.

⁴⁰ Miri a'tai, Piri' esi ene'pu to' uya itekare ekama pi' Aso'tas po, siya ri pata kaisa ri'ne Sisariya pona ri.

9

Saar_u Eporo'pu Sises Uya (Inkup_u'pu 22:2-16; 26:12-18)

¹ Miri koro'tau, Saar_u usakorotasa' uya, “Sises poitor_u ton tu'ka uya,” ta'pu. Saar_u uti'pu Papa ena' use'man nito' tawarasomanin nan epuru piya'

² tekamanin kareta, Tamaskas pon Esuwer_u am_u' usenupato' iw_u' ton ta' epose'na. Seri kareta uya Saar_u ku'sa' esi'pu, Ite'ma awiron kon, wara-woti'si miri awonsi'ki uri'sami'si a'sisa' ato' pe iya Surusiran pona.

* **8:37** 37 airon pura iyesi miri taron ni imenukasa' ton yau.

3 Ta'kiron kon pokon pe iti uya pata eporo koro'tau, Tamaskas itese', a'kwa, Epuñ winon uya iwei'ti'pu.

4 Ita'mo'ka'pu non pona. Miri a'tai, main eta'pu iya, “Saaru, Saaru, i'ri pe iyese pi' ukota'ma auya?” tawon.

5 Saaru uya ekama'po'pu, “Inu' imiri, Uyepuru?” ta'pu iya.

“Uri Sises, inkota'manu,” ta'pu iya.

6 “E'mu'sa'ka', itiki pata pona. Miri yau iyese miri ayauro'ka ton inku'ton pi',” ta'pu iya.

7 Ka'pon amu' iya'kiri tautisan e'taku'ka'pu, i'ri tai'ma pu'ra ri; miripan kon uya main eta'pu, e'tane inu' ri ene to' uya pu'ra iyese'pu.

8 Saaru e'mu'sa'ka'pu non poi, e'tane i'ri ene iya pu'ra iyese'pu. Miri wenai, to' uya ari'pu itemiyatu pi' ta'sii' Tamaskas pona.

9 Osoruwau wai itenu pu'ra iyese'pu. Iyenta'na pu'ra, i'ri ri ensi iya pu'ra iyese'pu.

Ananayas, Itepuru Apurinin

10 Miri yau iyese'pu Sises apurinin, Ananayas itese'. Ananayas enu uta'kwakasa' koro'tau, Itepuru maimu eta'pu iya, “Ananayas!” tawon.

“Setayai' ri, Uyepuru,” ta'pu iya.

11 “Ekoneka', enta Isutas piya', To'saron itese' asanta ta',” ta'pu Itepuru uya ipi'. “Inu' ri mekama'poi' miri yau, 'Ka'pon, Saaru itese', Tarus winon pe' seri yau nai?’ tukai'. Seri a'tai, ipureman pi' man.

12 Itenu uta'kwakasa' uya ene'pu ka'pon, Ananayas itese' uye'pu, temiyatu tuse'na tapon,

ennin pe tenato' pe,” ta'pu Itepuru uya itenu uta'kwakasa' koro'tau.

13 “Uyepuru, tu'kan kon ka'pon amu' uya uyauro'kasa' man, waku ton Papa nukupu'san ekota'mato' emapu'tisa' iya ipan pe Surusiran po.

14 Papa ena' use'man nito' tarawasomanin nan epuru ton uya auro'ka'pu iye'to' pe Tamaskas pona iyese' pi' te'san a'sipi'se'na, to' ase'na Surusiran pona,” ta'pu Ananayas uya.

15 E'tane, “Saaru piya' enta. Anansa' uya man uyapiyo' pe, uyekareei pi' Esuweru amu' pen, to' epuru ton, miri awonsi'ki Esuweru amu' auro'kato' pe iya.

16 Uri wenai eke pe iyekota'mato' enpoika uya miri itenu ya,” ta'pu Itepuru uya Ananayas pi'.

17 Miri a'tai, Ananayas uti'pu itau iye'to' iuti ta', miripan uya temiyatu taru'pu Saaru pona. “Utonpa Saaru, Sises, asanta tau isenpoikasa' ru'pu iyena' uya uyenko'sa' man, ennin pe kanan iyena pa, auta'kwaru'ti pa niri Waku A'kwaru ke,” ta'pu iya.

18 Miri ta iya pe ri, moro' pi'pi waraino uta'poku'pu itenu ton poi. Ennin pe kanan iyena'pu. Miri a'tai, iye'mu'sa'ka'pu, miri pe ri Ananayas uya ipa'taisima'pu.

19 Miripan enta'nasa' ena'pu pana' pe.

Tamaskas Po Saaru Uya Sises Ekareei Ekama'pu

Saaru uko'mamu'pu Sises poitoru ru'san piyau Tamaskas po.

20 Miri a'tai ri, itekare ekama pi' iye'sara'ti'pu, “Sises esi Papa Mu pe,” tukai'.

21 Tanporo etanin nan usewansiuka'p_u, “P_use ri pen pe' p_use, Surusiran pon kon k_uri ri ese' pokon kon t_u'kataine' pen? Iye'sa' kanan pen pe' se, kamoro a'sipi'se'na, miripan kon ase'na use'man nito' t_urawasomanin nan epuru ton eke ton kuru ena'?” ta'p_u to' uya.

22 E'tane miyari ri t_unekaman_u yau merunti pe Saar_u ena'p_u. Papa Maimu wini enpoika pi' iyese'p_u, “Sises esi K_urai* pe,” tukai', miripan pi' to' utanpokama'p_u.

23 Inke Tamaskas po Saar_u esi koro'tau, Esuwer_u am_u e'kama'p_u iwini pi'.

24 T_uwini pi' e'kamanisa' eta'p_u Saar_u uya. W_ui nai, ewarupi nau niri mura'ta nau Saar_u enupikiri to' esi'p_u, iwito' pe t_uuya'nokon e'tane, to' uya iwini'p_u pen.

25 Inenupan_u ton uya ipika'ti'p_u, ewarupi nau t_upa'kai'. Miri a'tai, eke pa'siki'ti yau si'na' pi' to' uya inu'ti'p_u pata wekupiri euta yai.

Panapas Uya Saar_u Ekama'p_u Surusiran Po

26 Surusiran pona Saar_u epa'kasa' a'tai, Sises poitor_u r_u'san tonpa pe kuru enapai iyese'p_u, e'tane tu'kan kon enari'n_um_u'p_u ipi', “T'napai ri pe' ken Sises apurinin pe iyenasa'?” tukai'.

27 E'tane Panapas uya inee'p_u itekare eka-mase'na enno'sa' kon piya'. Panapas uya enpoika'p_u to' pi', “Saar_u uti koro'tau Tamaskas e'ma tau, Itepuru ene'p_u iya, miripan uya auro'ka'p_u,” ta'p_u iya. Panapas uya niri to' auro'ka'p_u, “Saar_u

* **9:22** *K_urai* (Kiri' maimu yau); miri pe p_ura, *Me'saya* (Ipuru maimu yau), asa'ri ri mari iyese, *Papa Nan_um_u'p_u* ta e'kwa pe. **9:25** 2 Koren 11:32-33

uya Sises ekareei ekama'p_u enari'm_ura Tamaskas pon kon ka'pon am_u' pi'," ta'p_u iya.

²⁸ Panapas maimu apurisa' to' uya wenai, Sises apurinin nan Surusiran pon kon tonpa pe Saaru ena'p_u, miripan usari'p_u enari'm_ura ri Surusiran poro Sises ekareei ekama pi'.

²⁹ Saaru esi'p_u usauro'ni pi' e'maimu'pi' ni pi' Sises ekareei pi' Esuweru am_u', Kiri' pe t_uusauro'san pokon pe enpoika i'se to' pi', e'tane miyari ri iwini pi' to' e'kama'p_u.

³⁰ Taron kon Sises apurinin nan uya i'tusa' a'tai, ka'pon am_u' e'kamasa' iwini pi', to' uya ari'p_u Sisariya pona, miripan ennoko'p_u to' uya Tarusas pona.

³¹ Miri a'tai, Sises apurinin nan Isutiya, Kiyarari, miri awonsi'ki Sameriya pon kon uko'mam_u'p_u ewankamanin p_ura, in_u' uya ri to' kota'ma p_ura iyese wenai. Wak_u A'kwaru uya to' meruntitanuku'p_u, to' pori'ma'p_u iya ri. Miyari ri Sises apuri pi' tu'ke to' ena'p_u. Miripan kon uko'mam_u'p_u Itepuru nama pi' ri t_uuko'mam_u kon kaisa ri.

Ise'mesa' Epi'ti'p_u Pi'ta Uya

³² Pi'ta esi koro'tau utin pi' pata ton kaisa ri'ne, Reta pon kon wak_u ton Papa nukupu'san ka'kuranpai' iti'p_u.

³³ Miri yau, ka'pon eporo'p_u iya, Eniyas itese'. Te'kwe' poi iye'm_u'sa'ka p_ura iyese'p_u, 8 kaisa ri wai'piya ise'mesa' uko'mansa' esi'p_u.

³⁴ Pi'ta uya ta'p_u ipi', "Eniyas, seri pe Sises uya iyepi'ti. E'm_u'sa'ka, iye'kwe' e'mepi'ki," ta'p_u iya. Miri a'tai ri, Eniyas e'm_u'sa'ka'p_u.

35 Tanporo tũuko'mansan Reta miri awonsi'ki Isaran yawon kon uya ene'pũ, to' era'ti'pũ Itepuru Sises winikũi'.

Taru'kas, Eri'sa' I'mũ'sa'ka'pũ Pi'ta Uya

36 Isa'pa pata po, Sises apurinin uri'san esi'pũ, Tapi'ta itese'. Itese' esi'pũ Kiri' maimu yau Taru'kas, "usari" ta e'kwa pe. Tiwiri ri wakũ ku'nin pe iye'pitu'pũ, entu'manin nan ni pika'ti pi'.

37 Reta po Pi'ta esi a'tai, e'ne' pe tenai', uri'san Taru'kas erikũ'pũ. Iyeri'sa' ekepu korũka'pũ to' uya, miripan kon uya ka'tawon iuti tau inonka'pũ.

38 Reta esi'pũ a'ko pe Isa'pa piyau. Sises poitorũ ru'san uya Reta po Pi'ta esi tukai' etasa' a'tai, asa'ron kon ka'pon amũ' ennoko'pũ to' uya ipiya'. "Inke pũra isi'ki," ta'pũ to' uya ipi'.

39 Miri a'tai ri, iti'pũ Isa'pa pona to' a'kiri. Pata eposa' iya a'tai, to' uya ari'pũ ka'ta', Taru'kas ekepu piya'. Tanporo uri'sami'si amũ' itaan'pũ ima'tasa' kon nũ'san amũrasa' esi'pũ ipiyau, ukaran ni pi', pon amũ' Taru'kas nukonepitu'pũ enpoikapitu pi' to' esi'pũ nurine iyese a'taino ru'pũ.

40 Tanporo Pi'ta uya to' enpa'ka'pũ, miripan e'sekunka'pũ ipũremai', nurine kanan Taru'kas enato' pe. Miri tũpo, eke' winikũi' iyera'ti'pũ, "Tapi'ta, e'mũ'sa'ka'!" ta'pũ iya. Miri a'tai ri, itenu ton uta'koka'pũ. Pi'ta ene iya a'tai, iye'mũ'sa'ka'pũ ta'mu pona.

41 Itemiya pi' ta'sii' i'mũ'sa'ka'pũ iya, miripan uya Sises poitorũ ru'san miri awonsi'ki uri'sami'si amũ' itaan'pũ ima'tasa' kon nũ'san ki'ma'pũ, miripan uya nurine inee'pũ to' piya'.

⁴² Miri a'tai ri, mi poro ri te'san ka'pon amú' uya Isa'pa po eke Papa tawawasooi e'ku'sa' i'tu'pú. Tu'kan kon uya Itepuru apuri'pú.

⁴³ Pi'ta uko'mamú'pú Isa'pa po ka'pon, Saiman itese', o' pi'pi konepi'nin piyau.

10

Koneriyas, Papa Apurinin

¹ Miri yau iyési'pú ka'pon, Koneriyas itese', Sis-ariya pata po tawuko'mansen, Roman amú' soisaai epuru ton tonpa pe te'sen, I'tariyan soisa amú' tukai' tesa'san kon.

² Tiwiri ri tatonpa ton amutu pe Papa eseru poro iko'mamú i'se te'sen, tiwiri ri entu'manin nan repanin pe iyési'pú eke pe ri, tiwiri ri tawipuremasen Papa pi'.

³ Ko'maan pe iwa, 3 a'kura', Papa uya itenu a'kwakasa' uya, kipo'po Papa inseru uyeru tupaia' ene'pú. “Koneriyas!” ta'pú iya ipi'.

⁴ Koneriyas uya enari'ke' pe esii'ma ene'pú, “I'ri na'ki i'se me'ai', uyepuru?” ta'pú iya ipi'.

Inseru uya ta'pú ipi', “Papa epori'masa' man entu'manin nan repasa' auya pi', iwipuremasa' pi' tupa'.

⁵ Saiman, Pi'ta tukai' tesa'sen ki'manin nan ka'pon amú' inenno'ki Isa'pa pata pona.

⁶ Saiman ni mari itese' ka'pon, o' pi'pi konepitu pi' te'sen iwú' tau iyési miri, parau e'pi po na'ne',” ta'pú iya.

⁷ Auro'kanin nu'pú inseru uti'pú a'tai, Koneriyas uya asa'ri tupoitoru ton ki'ma'pú. Tikin ni soisa ki'ma'pú iya niri, Papa apurinin, tatonpa pe te'sen.

⁸ Tanporo iye'ku'sa' ru'pu pi' to' auro'ka'pu iya. Miri tupo, Isa'pa pona Pi'ta ki'mai' to' ennoko'pu iya.

Pi'ta Enu A'kwaka'pu Papa Uya

⁹ Purre'po'si a'tai ri, miri ema'sa' yau, pata eporo to' uya koro'tau, Pi'ta enuku'pu ai'tou pan iuti nakapu pona ipuremai'. ¹⁰ Miri a'tai, iwan pe iyese'pu, enta'napai iyese'pu. Iti'kiyari ekoneka koro'tau, Papa uya itenu a'kwaka'pu.

¹¹ Ka' uta'kokasa' ene'pu iya. Kareku waraino u'ti non pona a'kwa' kasa ewa'tisa' asakiri'nan si'na' ke itekun enne'pi'ne ene'pu iya.

¹² Miri yau iyese'pu ti'tui' pura ri ene amu', ikui amu', miri awonsi'ki iri ton ni toron amu' niri.

¹³ Miri a'tai, main eta'pu iya, "Iyo' tawise enta'naki," tawon.

¹⁴ E'tane Pi'ta uya imaimu eiku'pu, "Uyepuru, miri kupu uya pura man; iri tasa' na'ne' nan ipi' Main uya annin pen uri," ta'pu Pi'ta uya.

¹⁵ Papa uya ta'pu ipi', akon ite'kwa pe, "Waku enta'nan nito' pe Papa nakoneka'pu pi' iri kakai," ta'pu iya.

¹⁶ Pi'ta uya seri main eta'pu osoruwau ite'kwa, miri pe ri, o' amu' en enuku'pu ka' pona.

Koneriyas Poitoru Ton Uya Pi'ta Warinpa'pu

¹⁷ Pi'ta usenuminka koro'tau, "I'ri kuru si eka-manin se ko?" tukai', Koneriyas nennoko'san ka'pon amu' esi'pu enuri'ni pi' mura'ta nau.

¹⁸ To' uya ekama'po'pu, "Moro pe' seri yau ka'pon, Saiman, Pi'ta tato' nai?" ta'pu to' uya.

19 F'ri ta e'kwa pe seri esi se, ta Pi'ta uya koro'tau, “Osoruwawon kon* ka'pon amu' esi iyenpai,” ta'pu Ita'kwaru uya ipi'.

20 “E'mu'sa'ka', iu'ti'; tūusenuminkai' para itiki to' a'kiri. To' enno'sa' uya miri ipiya’,” ta'pu.

21 “Uri kuru ri anwarinpanu kon. F'ri na'ki pikiri uyense'na misi'tuu?” ta'pu Pi'ta uya to' pi'.

22 “Koneriyas, Roman amu' soisaai epuru uya ina enno'sa' man,” ta'pu to' uya ipi'. “Ipokena' pe te'sen miri awonsi'ki tiwiri ri Papa eseru poro iko'mamu i'se te'sen; Esuweru amu' uya niri waku kuru ri tato' ipi'. Papa inseruu uya auro'ka'pu iuye'to' pe itiwu' ta' auro'kato' auya etato' pe iya,” ta'pu to' uya.

23 “Ewai’,” ta'pu Pi'ta uya to' pi', miripan uya to' ewonnaku'pu tūpiya' to' apontii'.

Koneriyas Uya Pi'ta Ereutanaku'pu

Miri ema'sa' yau, Pi'ta e'sara'ti'pu utin pi' to' a'kiri. Isa'pa apai Sises apurinin nan e'sara'ti'pu itonpa pe.

24 Iyema'sa' yau, Sisariya epokaa'pu to' uya. Tūtonpa ton akonta awon kon miri awonsi'ki tūtonpa ton kuru tamaranu'se Koneriyas esi'pu to' enupikiri.

25 Pi'ta ewomu koro'tau, Koneriyas uti'pu mura'ta na' ipiya' ata'mo'kai' inama tūuya ekamanin pe.

* **10:19** *Osoruwawon*; tūron ni ton imenukasa' ton uya *asa'ron* ta; tūron ni ton imenukasa' ton uya inonpaai ekama para iyesi.

26 Pi'ta uya ipika'ti'pu i'mu'sa'ka pi' itemiyatu pi' ta'sii', "E'mu'sa'ka', uri pi' kipuremai, ka'pon ni mari uri, awaraino," ta'pu iya ipi'.

27 Asaurokai'ma iya'kiri Pi'ta ewomu'pu, tu'kan kon ka'pon amu' amurasa' koro'ta'.

28 "I'tu auya'nokon miri Esuweru amu' enta'na pu'a iyese taron kon Esuweru amu' pen a'kiri, to' ri ka'kuranpa to' uya pu'a ri iyese to' iwu' ta'. E'tane pu'a, Papa uya enpoikasa' man uyenu ya' taron kon waku pe inkoneka'san pi' iri tukai' esi namai'.

29 Miri wenai, ukan ka'pon amu' enno'sa' auya a'tai, inke pu'a ri uye'ni pi' epori'ma'pu. Apune ekama'; i'ri pe iyese pi' uki'masa' auya?" ta'pu Pi'ta uya ipi'.

Koneriyas Uya Tunene'pu Ekama'pu Pi'ta Pi'

30 Koneriyas uya imaimu eiku'pu, "Asakiri'ne ipata'pu pe wui utika'sa' seri, uiwu' tau ipareman pi' esi koro'tau, ko'maan pe iwa, 3 a'kura', ite'kwanau pu'a ri, ka'pon a'kwa ipon e'soto'kasa' esi'pu upiyau,

31 miripan uya ta'pu, 'Koneriyas, Papa uya iwiparemato' etasa' man, entu'manin nan repa auya niri i'tusa' iya man.

32 Miri wenai, Isa'pa pona Saiman Pi'ta ki'mase'na ka'pon amu' inenno'ki. Saiman ni mari itese' ka'pon o' pi'pi konepitu pi' te'sen piyau iyese miri, parau e'pi po na'ne', ta'pu iya upi'.

33 Miri a'tai ri, ka'pon amu' ennoko'pu uya iki'mai'. Waku pe ri umaimu awiri iuye'sa' man. Seri pe si ina amurasa' man tanporo Papa uya tentane'nokon, tanporo ri Itepuru uya irepasa'

ina auro'kato' auya ike ke ekama auya etase'na. Asauro'ki si," ta'pu Koneriyas uya.

Papa Uya Tanporon Kon I'nunka

³⁴ Pi'ta e'sara'ti'pu to' auro'ka pi', "Seri pe ito'ka'naku uya, i'napai ri Papa esi tanporo ka'pon amu' i'nunkanin pe isi'kaisa ri,

³⁵ tanporon kon ni tunamanin nan, ipoken te'sen ku'nin nan anumu Papa uya, ina' yan pe ri to' e'tane.

³⁶ I'tu auya'nokon, Papa uya tumaimu ennoko'pu Esuweru amu' piya'. Waku itekare ekama'pu iya, waku pe tupokon pe uko'man ni emapu'tinin Sises poro. (Sises esi Esuweru amu' epuru pe riken pen, e'tane tanporon kon ni epuru pe iyesei.)

³⁷ Tanporon ni e'kupu'pu Isutiya pata poro'ne i'tu auya'nokon miri. Miri ton e'sara'ti'pu Kiyarari po, itekare ekama pi' epa'taisimapi' ni pi' Isaan esi'pu pata'pu pe.

³⁸ I'tu auya'nokon Sises, Nasare' pon Papa uya Ta'kwaru miri awonsi'ki tumeruntiru turu'pu ipona. Sises utipitu'pu niri waku kupu pi' pata kaisa ri'ne, ka'pon amu' epi'tipitu pi' Makoi meruntiru apai. Sises uya seri ton kupu'pu Papa esi wenai tupika'tinin pe.

³⁹ "Ina esi miri tanporo Esuweru amu' pata'se' awiri, Surusiran poro ri, inkupu'pu tunene'pu kon ekamanin pe. To' uya iwini'pu kurusu' pona tupokapi'se.

40 Miri ri e'tane, nurine iye'to' pe Papa uya i'ma'sa'ka'pu osoruwau wai tupo. Papa uya ka'pon amu' uya ento' pe ikupu'pu.

41 Tanporon kon uya kuru ene'pu pen; ina riken ennin nan pe anansa' kon uya Sises ene'pu, taron kon ka'pon amu' auro'kanin nan pe ina e'to' pe. Ina iyenta'nasa' kon iya'kiri, ensin nusan ni iya'kiri, nurine iyenasa' a'tai teriku tupo,

42 kuri ri uya ina auro'kasa' itekare ekamanin pe ina e'to' pe ka'pon amu' pi'. Kuri ri kuri ri Papa Nanamu'pu tanporon kon eseru aimenkanin pe tanporo nurinan kon, iyeri'sa' kon ni niri.

43 Tanporo kareta amu' pu'kena' ton numenuka'pu ka'pon amu' auro'kanin pe ipi' uya seri ekamasa': Inu' ri kuri Sises apurinin pe te'sen uya, tamakooi pi' usentu'man nito' eporo miri itese' poro," ta'pu iya.

Papa A'kwaru U'ti'pu To' Pona

44 Pi'ta usauroku koro'tau, ite'kwanau pu'ra ri, Waku A'kwaru u'ti'pu tanporo ka'pon amu' etanin nan pona.

45 Isa'pa winon kon, Esuweru amu', Sises apurinin nan, Pi'ta a'kiri iye'sa' kon usewansiuka'pu, apune pu'ra Papa uya Ta'kwaru tusa' pi' Esuweru amu' pen ni pona.

46-47 Taron ni main† yau'ne, Papa apuripitu to' uya, eta'pu to' uya.

Miri a'tai, Pi'ta uya ta'pu, "T'napai ri man waku pe, pusamoro epa'taisimato' pe iyesi tuna ke. To' uya Waku A'kwaru eposa' man uri'nokon uya eposa' na'ne' kasa ri," ta'pu iya.

† 10:46-47 main, miri pe pu'ra ani

48 To' apiyo'ma'pu iya to' epa'taisimato' pe Sises Kurai ese' yau, miripan kon uya Pi'ta ekama'po'pu tūpiyau'nokon iko'manto' pe miyari ru'kwi pari.

11

Pi'ta Epataka'pu

1 Enno'sa' kon miri awonsi'ki taron kon to' tonpa ton Isutiya po tūko'mansan uya, Esuweru amū' pen ni uya Papa ekareei anansa' tawon eta'pu.

2 Pi'ta utisa' a'tai Surusiran pona, Esuweru amū' pen yun pi'pi puturuka tawon nan uya isapema'pu miri yau.

3 “Esuweru amū' pen ni piya' iutipitu miri awonsi'ki auta're'tipitu to' piyau,” ta'pu to' uya Pi'ta pi'.

4 Miri pi' nin si tanporo iye'ku'sa' ru'pu pataka'pu Pi'ta uya na'ne' to' pi';

5 “Isa'pa pata po ipureman pi' esi'pu. Miripan koro'tau, ka'apai eke kareku waraino a'kwa' kasa ewa'tisa' asakiri'nan si'na' ke itekun enne'pi'ne u'ti ene'pu uya upiya', Papa uya uyenu a'kwakasa' koro'tau.

6 Miri yau, tu'kan kon ni ti'tui' para ri ene amū', ikai amū' miri awonsi'ki iri ton ni toron amū' ri ene'pu uya.

7 Miri tapo, Papa uya uyauro'ka eta'pu uya, 'Pi'ta, iyo' oton tūwise enta'na,' tawon.

8 “Kane, Uyepuru, ikupu uya para iyesi, apane para kamoro warai'nan o' amū' ansa' uya para kuru ri iyesi,' tukai' imaimu eiku'pu uya.

9 “Akon ite'kwa pe kanan uyauro'ka'pu iya, 'Tri pi' ri iri kakai, tanporon ni Papa nukoneka'pu esi waku pe.’

10 Seri e'kupu'pu osoruwau ite'kwa. Miri tupo, ene amu' apon kareku waraino enuku'pu.

11 “Miri a'tai, osoruwawon kon ka'pon amu' uyee'pu itau e'to' iuti airi, Koneriyas nennoko'san upiya' Sisariya apai.

12 Papa A'kwaru uya uyauro'ka'pu te'ku'ku'mai' pu'ra ri to' a'kiri utito' pe, Esuweru amu' pe pu'ra ri to' e'tane. 6 kaisaron kon Isa'pa pon kon utonpa ton uti'pu uya'kiri Sisariya pona. Miri yau, ka'pon iwu' ta' ina ewomu'pu.

13 Miripan uya inseru e'mu'sa'kasa' ene'pu tu'uya ekama'pu ina pi', 'Ka'pon amu' enno'ki Isa'pa pona Saiman Pi'ta ki'mai'.

14 Ekama iya miri, Papa uya tanporo iwu' tawon kon pika'tito' oton,' tukai', ta'pu inseru uya ipi'.

15 “Usauroku e'sara'ti pe ri, Waku A'kwaru u'ti'pu to' pona, wapiya upona'nokon iu'ti'pu kasa.

16 Miri a'tai, i'tu'pu uya Itepuru Sises uya ta'pu ru'pu, 'Isaan uya ka'pon amu' pa'taisimapitu tuna ke, e'tane imiri'nokon epa'taisimato' oton Waku A'kwaru ke,' tawon.

17 Papa uya miri ri Waku A'kwaru ke to' repasa' uri'nokon repa'pu tu'uya ike ke ri Itepuru Sises Kurai apuri'nokon a'tai, inu' pe ken si te'ku'se Papa ereutanuku i'se esi?” ta'pu Pi'ta uya ka'pon amu' Surusiran pon kon pi'.

18 Seri eta to' uya a'tai, Pi'ta sapemato' tu'uya'nokon ereutanuku'pu to' uya, Papa ri'ken apuripitu'pu to' uya. “Papa uya ken ka'wa Esuweru amu' pen kanan ku'sa' tumakooi kon apai tera'tii' tu'uko'mansan pe,” ta'pu to' uya.

Apurinin Nan Antiyo' Pon Kon

¹⁹ Ka'pon amu' uya Si'tipun wini'pu si'kiri, Sises apurinin nan apurumu'pu Surusiran apai taron ni pata ya'ne, apune para miri yawon kon ka'pon amu' uya takota'ma kon pi'. Taron kon to' tonpa ton uti'pu Pini'siya pata ya', Sai'paras opa'wu pona, miri awonsi'ki Antiyo' pata ya'. To' uya Sises ekareei ekama esi'pu Esuweru amu' pi' riken miri ton pata ya'ne.

²⁰ Taron kon Sises apurinin nan esi'pu Sai'paras opa'wu pon kon miri awonsi'ki Sairini pata yawon kon, miripan kon uti'pu Antiyo' pata ya'. Miri yau, itekare ekama'pu to' uya Esuweru amu' pen ni pi', waku Itepuru Sises ekareei.

²¹ Miripan kon pika'ti'pu Papa uya. Itekare ekama pi' to' esi koro'tau, tu'kan kon ni Esuweru amu' pen ni ena'pu Sises apurinin nan pe, miripan kon era'ti'pu Papa winiki'.

²² Surusiran pon kon apurinin nan uya seri etasa' esi'pu, miripan kon uya Panapas ennoko'pu Antiyo' pona.

²³ Pata epasa' tauya a'tai, Papa uya eke pe ri waku nonkasa' to' pona ene'pu iya. Pori' pe iyese'pu, miripan uya to' pori'mapitu'pu miyari ri Sises apurinin nan pe to' e'to' pe tanporo tewan kon pokon pe.

²⁴ Panapas esi'pu waku kuru ka'pon, Waku A'kwaru ke ita'kwaru'tisa', miri awonsi'ki apurito' ke, miripan uya tu'kan kon ni pika'ti'pu Itepuru Sises apurinin nan pe.

²⁵ Miripan tupo, Panapas uti'pu Tarusasa pona Saaru epose'na.

²⁶ Miripan uya eposa' a'tai, inee'p_u iya Antiyo' pona. Miri yau, Panapas miri awonsi'ki Saaru pokon uko'mamu'p_u tikin ni wai'piya apurinin nan pokon pe te'sepopi'se, miripan kon uya tu'kan kon ni ka'pon amu' enupapitu'p_u. Antiyo' po wapiya kuru Sises poitoru ton esaku'p_u to' uya miri Kuri'san amu' tukai'.

²⁷ Miri a'tai'ne, Sises apurinin nan, pu'kena' amu' uti'p_u Antiyo' pona, Surusiranapai.

²⁸ Tikin ni to' tonpa, Akapas itese', e'mu'sa'ka'p_u asauro'se'na. Papa A'kwaru uya tauro'kato' awiri ekama'p_u iya to' pi', "Eke iwankan uta'mo'kan pi' man tanporo pata emu' kaisa ri," ta'p_u iya. (Seri e'kup_u'p_u Kurautiyas esi a'tai Ron o'no te'san pata ton epuru pe.)

²⁹ Sises pi' enupasa' kon e'kama'p_u Isutiya pon kon tatonpa kon repa pi' p_urata ke.

³⁰ Miripan kon uya ikupu'p_u, p_urata ennoko'p_u to' uya so'si epuru ton ena', Panapas miri awonsi'ki Saaru pokon enau.

12

Pi'ta Epa'ka'p_u Pariki'si Tapai

¹ Miri koro'tau, Sises apurinin nan kota'ma i'se kin Era' esi'p_u, miripan uya soisa amu' ennoko'p_u so'si epuru ton Surusiran pon kon a'sise'na, miripan kon tato' pe to' uya pariki'si ta'.

² Era' uya soisa apiyo'ma'p_u Isens, Isaan rui wito' pe iya supara ke.

³ Era' uya i'tu'p_u Isens wisa' tauya a'tai, pori' pe kuru Esuweru amu' ena'p_u tukai', miri awonsi'ki

soisa amu' kanan apiyo'ma'pu iya Pi'ta a'sito' pe to' uya iwito' pe kanan. Seri e'kupu'pu A'sarutanu'sa' Pen Paretu Pi' Enta'nan Weyu a'tai.

⁴ Soisa amu' uya Pi'ta a'si tupo, to' uya ari'pu pariki'si ta', miripan Era' uya asakiri'nan kon iyamu'kuru' ton asakiri'nan yawon kon soisa amu' apiyo'ma'pu erasunti pi'. Era' esi'pu Pi'ta tenpa'kai' pariki'si tapai inekama'popi'pai Esuweru amu' pana airi, To' Epou Iti'pu Weyu Ru'pu tupo.

⁵ Miri pi' ri pariki'si tau Pi'ta enkurunpa'pu to' uya, e'tane apurinin nan esi'pu Papa ekama'po pi', Pi'ta pika'tito' pe iya.

⁶ Era' e'kamasa' Pi'ta enpa'ka pi' ekama'popi'to' pe tauya min winon ewarupui tau, Pi'ta esi'pu e'nan ni pi' asa'ron kon soisa amu' a'sanau. To' uya itemekon auronpi'sa' esi'pu. Turon kon soisa amu' esi'pu mura'ta erasunti pi'.

⁷ Ite'kwanau para ri, inseru usenpoika'pu Pi'ta piya', miripan uya a'kwa pe pata kupu'pu pariki'si tau. Inseru uya Pi'ta enpaka'pu ta'pi'pi'se, "Inke para e'mu'sa'ka'," ta'pu iya, miripan auronpi'sa' itemiyatu utaranka'pu.

⁸ Miri tupo, "Ekoneka', asapatooi ipata'ti'," ta'pu inseru uya ipi', miripan kupu'pu Pi'ta uya. "Ipon puro'pon ipata'ti', miri awonsi'ki uya'kiri isi'ki," ta'pu inseru uya.

⁹ Pi'ta uti'pu iya'kiri pariki'si tapai. I'napai ri pe' ne'ku'ai'ne' esi tai'ma ri Pi'ta epa'ka'pu pariki'si tapai, tenu uta'kwakasa' uya ri na'ki ene tukai' isenuminkai'ma.

¹⁰ Pi'ta miri awonsi'ki inseru uya wapiyaro' kon soisa amu' entakakaa'pu, miri awonsi'ki ite'ma'pu

pe te'san kanan entakakaa'pu to' uya. Soisa amu' uya to' ene pu'ra. To' uye'kaa'pu wa'ka pun pe te'sen mura'ta na', pata ya' tautisen, miripan mura'ta uta'koka'pu tiwano' pe ri, miripan kon epa'ka'pu. Inni ru'kw'i ri asanta tau to' utikaa'pu tapo, inseru uya inimi'pu.

11 “I'napairi ri ka'si, pariki'si tapai epa'kasa' seri wa!” ta'pu Pi'ta uya. “Si'tuka'ai' si, Itepuru uya tinsere'ni enno'sa' upika'tii' Era' esi tankupunu inku'pai upi' apai miri awonsi'ki iye'kupu kuru tawon nan niri Esuweru amu' piyapai,” ta'pu iya.

12 Pi'ta uya i'tusa' a'tai, iti'pu Meri, Isaan san iwu' ta'. Tu'kan kon ni ka'pon amu' amurasa' ipuremase'na tepose.

13 Pi'ta uya mura'ta wipitu'pu. Ka'pon uya ri tewonnu'to' pe, apiyo' pe ru'kw'i te'sen, Rota itese' uyee'pu imaimu'se'na mura'ta na'.

14 Pi'ta maimu etasa' tuuya a'tai, epori'mai'ma iyeka'tumu'pu, mura'ta ta'kokai' pu'ra, iuti tawon kon pana'tii', “Pi'ta man mura'ta nau!” ta'pu iya.

15 “I'ri uya ayano'ma, Rota?” ta'pu to' uya ipi', e'tane ri akonomapi'kaa'pu iya,

“Pi'ta esi mi airi ukayai'ne ko!” takaa'pu iya kanan.

“A'tai pu'ra itinsere'ni ri na'ki,” ta'pu to' uya.

16 Mura'ta wipitu pi' ri Pi'ta esi'pu to' uya a'kokato' pe. To' uya a'kokasa' a'tai, to' usewansiuka'pu ene tuuya'nokon pi'.

17 Pi'ta uya temiyatu ke e'pana e'ti' ta'pu to' pi', miripan uya Papa insere'ni uya tenpa'kasa' pariki'si tapai ru'pu ekama'pu. “Seri mekamatui' Isens pi' miri awonsi'ki taron kon itonpa kon amu' pi',” ta'pu iya. Miri tapo, taron ni pata ya' iti'pu.

18 Miri ema'sa' yau, soisa amu' utai'po'pu ipan pe ri, apune para i'ri kasa Pi'ta epa'ka'pu tukai' to' uya i'tu para ri iyese'pu.

19 Era' uya soisa amu' apiyo'ma'pu Pi'ta warinpatu' pe to' uya, e'tane to' uya eporo para iyese'pu. Miri pi' to' ekama'popitu'pu iya, i'ri kasa Pi'ta epa'ka'pu tukai', e'tane to' nekama ton para ri iyese'pu, miripan uya taron kon soisa amu' apiyo'ma'pu Pi'ta erasuntinin nan pe iku'sa' kon nu'san wifo' pe to' uya.

Miri tapo, Era' uti'pu Sisariya pona Isutiya ponsi'ki, miripan uko'mamu'pu inke ru'kwi ri.

Era' Uma'tato'

20 Era' usakorota'pu ipan pe ri Taya miri awonsi'ki Saitan pon kon ka'pon amu' pi'. Taron kon ka'pon amu' Taya miri awonsi'ki Saitan pon kon tonpa ton uti'pu Era' ense'na. Era' poitoru, eke pe kuru te'sen Parastas e'to' pe tumaimu kon awiri kin Era' auro'kato' pe to' uya ekama'po'pu, tapata'se' kon yawon kon ka'pon amu' e'to' pe waku pe kin a'kiri tukai', apune para kin pata'se' apai ti'kiyari kon eponin nan pe te'to' kon pe.

21 Tuweyu pe tane'poro'pu a'tai, Era' uya tapon pata'ti'pu kin pe tesi ekamanin, miripan ereuta'pu tapon po, ka'pon amu' iyamurasa' kon auro'ka pi'.

22 "Puse ri kuri ri Papa nusau'ro'ai'ne', ka'pon pen ni!" tukai', ka'pon amu' uki'pi'nunpitu'pu Era' pi'.

23 Inke para Papa inseru' uya eno'ma'pu non pona, apune para ka'pon amu' uya tapuri i'se iyese wena' miri awonsi'ki Papa ru'ku inamati' ta iya

kasa p̄ra. Miripan ani'p̄a weruwe am̄a' uya, miripan erik̄a'p̄a.

²⁴ E'tane Papa maimu ri esi'p̄a miyari ri utin pi' miri awonsi'ki epan ni pi'.

²⁵ T̄at̄arawasooi kon u'ma'sa' a'tai, Panapas miri awonsi'ki Saaru pokon enna'po'p̄a Surusiran poi.* † Isaan, Ma' tato' nee'p̄a to' uya ta'kiri'nokon.

13

Panapas, Saaru Ennoko'p̄a To' Uya

¹ Antiyo' po so'si tau te'san koro'tau, pu'kena' ton miri awonsi'ki enupanin nan esi'p̄a. Kamoro si esi'p̄a Panapas; Simiyan, Mekoro tukai' to' ne-sak̄a'p̄a; Rusiyas, Sairini itese' pata winon; Man-ayen, kop̄ana Era' isakon pe isemo'kasa' r̄a'p̄a; miri awonsi'ki Saaru.

² Papa apuri pi' to' esi koro'tau, miri awonsi'ki t̄auta're'ti' p̄ra to' useruma koro'tau, Papa A'kwar̄a uya to' auro'ka'p̄a, “Inke p̄ra seri pe Panapas miri awonsi'ki Saaru pokon ananti', uyapiyo' ton pe, miri awonsi'ki t̄aki'ma'p̄a uya 'nokon ya' ku'se'na to' utito' pe,” ta'p̄a iya.

³ Miripan tenta'nai' p̄ra t̄auseruma kon t̄apo, miri awonsi'ki t̄awip̄arema kon t̄apo, to' pona'ne temiyat̄a kon nonkapit̄a'p̄a to' uya to' p̄arema pe, miripan kon ennoko'p̄a to' uya.

Paaru Esi'p̄a Sai'p̄aras Pata Po

⁴ Papa A'kwar̄a uya Panapas miri awonsi'ki Saaru pokon ennoko'p̄a tu'kan pata yau'ne

12:23 2 Ma'kapis 9:5-28 * **12:25** T̄aron ni imenukasa' ton, Surusiran pona tawon pe iyesi. † **12:25** T̄aron ni imenukasa' ton, Surusiran poi Antiyo' pona tawon pe iyesi.

tunekamanu kon ekama pi'. To' uti'pu Antiyo' ponsi'ki Seru'siya pona, miripan kon ekanwa'ti'pu, Saramis pona tautito' kon pe, Sai'paras opa'wari pon.

⁵ Saramis po si tesi kon koro'tau, Esuweru amu' usenupato' iwu' ta' to' uti'pu, Papa Maimu ekama'pu to' uya. Isaan Ma' esi'pu miri to' a'kiri to' pika'ti pi'.

⁶ Tanporo miri opa'wu ti'ma'kai' to' usari'pu, Pa'pos itese' pata eporo tuya'nokon pona ri. Miri pata yau, Esuweru enwoke' pe esii'ma akono pe te'sen esi'pu Paru-Sises itese'.

⁷ Miri opa'wu epuru pe te'sen, Sisiyas Paaros itese' a'kiri inke itipitu'pu. Kuri ri kopuna esi'pu i'tunin kuru. Tikin nan ka'pon ennoko'pu iya Panapas miri awonsi'ki Saaru ki'mase'na to' uye'to' pe tupaia', apune para Papa Maimu inetapai tesi pi'. Miri a'tai, Panapas miri awonsi'ki Saaru pokon uti'pu ipi' ekamase'na.

⁸ E'tane puse ri ka'pon, Erimas tato' ipi' Kiri' amu' maimu yau, enwoke' ta e'kwa pe esi'pu to' i'se para, kopuna auro'ka'pu iya Sises apuri iya namai'.

⁹ Miri a'tai Saaru, Paaruu tukai' to' nesakunu uta'kwaru'ti'pu Waku A'kwaru ke uya to'sa ri Erimas ene'pu,

¹⁰ miripan uya, "Makoi kasa kuru me'ai"! Waku pe te'sen ewaruma'ti auya! Kasi pe ri ka'pon amu' auro'ka auya, miri awonsi'ki taron ni ton ni iri ton ni kupu auya to' pi'. Inapairon ni Papa eseru ensima i'se iwe'to' ereutanu'ki!

¹¹ Seri pe kuru Papa uya ikota'ma miri, tenku'ne iyena miri, miripan inke kuru para ri wui enu tense para iuko'mamu miri," ta'pu Paaruu uya ipi'.

Inke p_ura ri, tenku'ne iyena'p_u kapuru' miri awonsi'ki ewarupi uyee'p_u ipona, miripan usari'p_u te'ma a'pitu i'se, ka'pon ni i'se iyese'p_u temiyatu pi' tanin oton.

¹² Paar_u uya enwoke' auro'ka'p_u iye'ku'sa' ipi' tense, kop_una uya, "i'napairon," ta'p_u Sises ekareei pi'. Paar_u miri awonsi'ki Panapas nekaman_u Sises ekareei pi' isewansiuka'p_u.

Paar_u, Panapas Pokon Esi'p_u Antiyo' Po

¹³ Miri t_upo, Paar_u miri awonsi'ki iya'kiri te'san itonpa ton uti'p_u kanau yai Pa'pos ponsi'ki Piruka, Panperiya awon pona. Miri yau, Isaan Ma' uya to' nimi'p_u. Surusiran pona iyenna'po'p_u.

¹⁴ Piruka ponsi'ki to' uti'p_u Antiyo', Pi'sitiya yawon pona. Sapa' a'tai, to' uti'p_u Esuwer_u am_u' usenupato' iw_u' ta', miripan kon ereuta'p_u.

¹⁵ Mosi' n_umenuka'p_u miri awonsi'ki pu'kena' am_u' n_umenuka'p_u usekama'p_u t_upo, Esuwer_u am_u' usenupato' iw_u' epuru ton uya ka'pon ennoko'p_u Paar_u miri awonsi'ki Panapas piya' t_umaimu kon pe, miripan uya, "Ina tonpa ton, in_u' ri esi a'tai asauro'pai tiwi ka'pon am_u' auro'kai' to' pori'ma pe," ta'p_u iya to' pi'.

¹⁶ Miri yau, Paar_u e'm_u'sa'ka'p_u, temiyatu ari'ma'p_u iya, e'pana to' e'to' pe, miripan uya,

"Utonpa ton, Esuwer_u am_u', miri awonsi'ki Esuwer_u am_u' pen, Papa namanin nan, umaimu etati'!

¹⁷ Papa, uri'nokon Esuwer_u am_u' napur_u uya utamokori kon an_um_u'p_u, miripan kon epankasa' t_uuya, ka'k_uran pe to' esi koro'tau Isi' po. Inke

ri tũuko'mamu tũpo, Papa uya tũmeruntũ ke to' enpa'ka'pu miri pata apai.

¹⁸ Tũmaimu awiri pũra ri to' e'tane, to' nũkupũũ moronka pi' iyese'pu 40 kaisa ri wũpiya rimono' tau to' uko'mamu koro'tau.

¹⁹ Papa uya to' pika'ti'pu 7 kaisaron kon tũpataron kon Kenan pon kon ka'pon amũ' enpa'kato' pe to' uya, miripan uya to' nono tũsa' uiwano' kon pe.

²⁰ Seri e'kupũ'pu 450 kaisa ri wũpiya yau iwa'ne ri.

“Miri tũpo, Papa uya to' usewa'noma epuru pe te'ton kon anũpũ'pu, Sanwerũ, pu'kena' pe te'sen ena to' epuru pe pona ri.

²¹ Miri a'tai, tepuru kon pe kin i'se ka'pon amũ' esi'pu. Miripan Saarũ, Kisi mu anũmũ'pu Papa uya kin pe, miripan uko'mamu'pu 40 kaisa ri wũpiya to' epuru pe.

²² Kin pe iye'to' yapai Saarũ mo'ka tũuya tũpo, Papa uya Tepi' anũmũ'pu kin pe. Wakũ pe kuru Papa usaurokũ'pu ipi', 'Eposa' uya man warawo' Tepi', Ise'si mu upori'manin pe te'sen ku'nin, i'se e'to' ku'to' iya oton miri,* ta'pu Papa uya.

²³ “Papa uya Tepi' pa ru'pu, Sises ennoko'pu Esuwerũ amũ' pika'tise'na. Miri kupũ uya ta'pu tũuya utamokori ton pi' awiri.

²⁴ Sises e'sara'ti e'tũrawasoman pi' rawiri, Isaan uya itekare ekama'pu tanporon kon Esuwerũ

13:17 E'sotas 1:7; 12:51 **13:18** Nonpa 14:34; Isu'taronomi 1:31

13:19 Isu'taronomi 7:1; Isa'suwa 14:1 **13:20** Eseru Aimenkanin

Nan 2:16; 1 Sanwerũ 3:20 **13:21** 1 Sanwerũ 8:5; 10:21 * **13:22**
Eren 89:20 **13:22** 1 Sanwerũ 13:14; 16:12

awon kon pi', iri tunkupunu kon apai to' era'tito' pe, miripan kon epa'taisimato' pe.

25 Tuturawasooi i'ma'ka tauya winikai', Isaan uya to' ekama'popitu'pu, 'Inu' pe uku'atuu? Ka'pon ennoko uya miri, tasa' ru'pu Papa uya ipi' pe, uyekama auya'nokon seri, e'tane etati', seri pe ri iyepu miri e'tane isapatooi mu' ara'ka poken para ri esi,' ta'pu iya.

26 "Utonpa ton Esuweru amu', Epura'an payan nu'san, Esuweru amu' pen ni niri Papa namanin nan, etati'! Uri'nokon iwano' pe kuru Papa uya epika'tin nito' eseru ennoko'pu.

27 Surusiran pon kon ka'pon amu' miri awonsi'ki to' epuru ton uya i'tu para iyese'pu puse ri Sises esi pika'tinin pe tukai', miri awonsi'ki pu'kena' amu' maimu Sapa' kaisa ri tausekamasen to'ka'naku to' uya para iyese'pu, e'tane pu'kena' amu' uya ekama'pu awiri to' uya iwini'pu.

28 Tu'kan kon ni ka'pon amu' usauroku'pu, 'Iri kupu Sises uya,' tukai', e'tane iwito' ipikiri oton eporo to' uya para iyese'pu. Miri ri e'tane, itepuru Paire' ekama'po'pu to' uya ima'tanu'to' pe iya.

29 Pena ri pu'kena' ton nekama'pu kupu'pu ka'pon amu' uya miri Sises pi'. To' uya iwini'pu. Kurusu' pona to' uya ipokapitu'pu, miripan mo'ka'pu taron kon uya kurusu' poi, miripan emaika'pu to' uya ti' akasa' uruwai' pe ya'.

30 E'tane Papa uya i'mu'sa'ka'pu eri'nito' apai.

13:24 Ma' 1:4; Uru' 3:3 13:25 Isaan 1:20; Ma'siu 3:11; Ma' 1:7; Uru' 3:16; Isaan 1:27 13:28 Ma'siu 27:22-23; Ma' 15:13-14; Uru' 23:21-23; Isaan 19:15 13:29 Ma'siu 27:57-61; Ma' 15:42-47; Uru' 23:50-56; Isaan 19:38-42

31 Inke ri isenpoikapit_u'p_u ta'kiri Kiyarari ponsi'ki Surusiran pona itisa' kon enu ya', ka'pon am_u' si ennin n_u'san esi miri t_uron kon ka'pon am_u' pana ya' ekama pi'.

32 “Ina uya kanan si seri wak_u kuru itekare ekama seri ipi'nokon. ‘Miri kup_u uya,’ ta'p_u Papa uya utamokori kon pi' uta'ku'tisa' r_u'p_u

33 uri'nokon, to' payan non pi'. Miri si ku'sa' iya Sises ti'm_u'sa'kase Eren apon yau isakon pe te'sen Eren uya ekamasa' kasa,

“ ‘Seri pe umu, tikin nan pe kuru iwesi miri, ikup_un_u pe enasa' seri.’[†]

34 Papa uya t_umu i'm_u'sa'ka'p_u iyeri'sa' apai, miripan eri'to' oton pen ni miri enta'. Miri pi', Papa uya utamokori kon am_u' auro'ka'p_u,

“ ‘Ipika'ti uya 'nokon kuru miri, umunki am_u', Tepi' auro'ka'p_u uya awiri ri.’[‡]

35 Tepi' uya K_urai[§] pi' Papa auro'kasa' t_uron ni Eren yau,

“ ‘Ikitato' pe uyekepu nonka auya pen, ap_une p_ura wak_u uri, ipoitor_u ukita i'se p_ura iwesi.’^{*}

36 “T_uuko'mam_u koro'tau, Tepi' uya, ikup_u iya i'se Papa e'to' ku'pit_u'p_u. E'tane iyeriku'p_u, ka'pon uya iu'na'ti'p_u, itamokori ton esi'p_u kasa ri, miripan pun ukita'p_u.

37 E'tane k_uri Papa n_u'm_u'sa'ka'p_u iyeriku'p_u ya-pai ukita'p_u pen.

13:31 Inkup_u'p_u 1:3 † 13:33 Eren 2:7 ‡ 13:34 Aisaya 55:3

§ 13:35 K_urai (Kiri' maimu yau), miri pe p_ura Me'saya (Ipuru maimu yau), asa'ri ri mari iyese, Papa Nan_um_un_u ta e'kwa pe.

* 13:35 Eren 16:10

38 “Miri pe iyese pi', utonpa ton, i'tu auya'nokon i'se esi Sises poro makoi pi' usentu'man, usekama ipi'nokon.

39 Kuri ri poro tanporon kon apurinin nan ekoneka, tanporon ni ekonekan pokena' pen ni ipiyapai, Mosi' nūmenuka'pu wini.

40 Miri pe iyese pi', ti'tui' e'ti', pu'kena' amū' nekama'pu e'kupū namai' ipi'nokon:

41 “Etati' imiyamoro, Papa sapemanin nan!

Iusewansiuka kon miri Papa nukupūnū tense miri awonsi'ki iyeri'to' oton kon.

Iku'to' uya oton aya'tai'nokon

anapurinū ton kon pen ni

ka'pon uya ekama tane ipi'nokon,†

tawon,” ta'pu iya.

42 Paarū miri awonsi'ki Panapas uya Esuwerū amū' usenupato' iwū' nimi koro'tau, ka'pon amū' uya to' ki'ma'pu Sapa' a'tai to' uye'to' pe miyari pari seri ton ekamase'na.

43 Ka'pon amū' e'nonkasa' a'tai, anpisin pe Esuwerū amū' miri awonsi'ki Esuwerū amū' pen e'tane Papa namanin nan uya Paarū miri awonsi'ki Panapas e'ma'puka'pu. Paarū miri awonsi'ki Panapas uya to' auro'ka'pu, Papa uya wakū nonkasa' tūpona'nokon awiri to' uko'manto' pe.

44 Tūron ni Sapa' a'tai, tu'ke ri anpisin pe An-tiyō' pon kon amūra'pu Esuwerū amū' usenupato' iwū' ta' Paarū miri awonsi'ki Panapas usaurokū etase'na Itepuru Sises pi'.

† 13:41 Apa'ka' 1:5

⁴⁵ Esuweru amu' ikinta'pu anpsin pe ka'pon amu' ene tuaya'nokon a'tai, miripan kon us-auroku'pu iri pe Paarü pa'naku pe.

⁴⁶ Miripan kon maimu eiku'pu Paarü miri awonsi'ki Panapas uya te'namai' püra, “Sises ekareei, Papa winon ekamato' ina uya pe iyesi wapiya Esuweru amu' pi', e'tane Papa Maimu ewaruma'ti auya'nokon, miri uya ekama waku tiwiri uko'man nito' eponin nan pe püra ri tukai' iye'kupu kon.

⁴⁷ Apüne püra Papa uya ina apiyontisa' ina uya iku'to' pe,

“To' weyu pe iyennoko uya seri non emu' kaisaron kon ka'pon amu' pana'tise'na, to' pika'tinin pe uri esi pi', † tukai',” ta'pu Paarü uya.

⁴⁸ Miri eta Esuweru amu' pen uya a'tai, to' epori'ma'pu. Papa Maimu inamato' uya. Esuweru amu' pen, Papa nanamu'san tūpiyau to' e'to' pe uya Sises ekareei apuri'pu.

⁴⁹ Miri a'tai, Itepuru maimu uti'pu tanporo miri nono awiri.

⁵⁰ Miri e'tane tūron kon Esuweru amu' epuru ton uya, eke ton pe te'san ka'pon amu', miri awonsi'ki Papa namanin nan uri'sami'si amu' uya Paarü miri awonsi'ki Panapas ewaruma'tito' pe ikupu'pu. Kamoro Esuweru amu' uya tūron kon ka'pon amu' auro'ka'pu Paarü miri awonsi'ki Panapas kota'mato' pe to' uya. Miripan kon uya Paarü miri awonsi'ki Panapas enpa'ka'pu tūnono kon apai.

† 13:47 Aisaya 42:6; 49:6

⁵¹ Miripan Paar_u miri awonsi'ki Panapas uya ti'ta kon poi non tiuti'p_u pata n_imi'ima, Papa uya to' nonkasa' ekamanin pe, miripan kon uti'p_u Ai'konian pona, Antiyo' ponsi'ki.

⁵² Miri koro'tau, Sises apur_inin nan uta'kwar_u'ti'p_u pori' ke miri awonsi'ki Wak_u A'kwar_u ke.

14

Paar_u Miri Awonsi'ki Panapas Pokon Esi'p_u Ai'konian Po

¹ Te'to' kon kasa ri Ai'konian po, Paar_u miri awonsi'ki Panapas pokon uti'p_u Esuwer_u am_u' usenupato' iw_u' ta', miripan kon uya wak_u pe pori'ma' kuru ri itekare ekama'p_u. Miripan tu'ke ri Esuwer_u am_u' miri awonsi'ki Esuwer_u am_u' pen ni niri ena'p_u Sises apur_inin nan pe.

² E'tane Esuwer_u am_u' itekare apur_inin nan pen uya Esuwer_u am_u' pen tar_unka'p_u iri pe to' pi' to' e'ku'to' pe.

³ Miri yau, Paar_u miri awonsi'ki Panapas pokon uya w_ui apit_u'p_u inke ri. Enari'm_ura Sises eka-reei ekama pi' to' esi'p_u, i'napai ri wak_u nonkasa' iya ekareei esi enpoikanin pe, to' repa'p_u iya wini to' meruntir_u ke, i'tuto' ipikiri miri awonsi'ki a'kwar_upi'nin ku'to' pe to' uya.

⁴ Kamoro Ai'konian po t_uuko'mansan epan-takapi'sa' esi'p_u; t_uron kon uya enno'sa' kon apur_i'p_u, t_uron kon uya t_uron kon Esuwer_u am_u' apur_i'p_u.

5 Miri yau, Esuweru amu' pen miri awonsi'ki Esuweru amu' usauroku'pu Paarü miri awonsi'ki Panapas kota'mato', tepuru kon pokon pe to' e'kama'pu, ti' ke to' wito' pe tuuya'nokon.

6 E'tane Paarü miri awonsi'ki Panapas uya etasa' esi'pu, miripan kon uti'pu taron ni pata pona, Restara, Terupi, miri awonsi'ki iwoino' nan pata pona, Rai'koniya pata yau.

7 Miri yau tesi kon a'tai, itekare ekama pi' to' esi'pu ka'pon amu' pi'.

Paarü, Panapas Pokon Esi'pu Restara, Terupi Po

8 Restara po ka'pon esi'pu ise'mepi'sa' i'ta. Iyen-tusa' a'tai, miri kasa ri iyese'pu, miripan usari para ri iyese'pu.

9 Paarü usauroku Itepuru Sises pi' etapitu pi' iyese'pu. Paarü uya enpitu'pu, miripan ene'pu iya Itepuru Sises uya kuru upika'ti tukai' apuri'pu iya.

10 Miripan Paarü uya, "E'mu'sa'ka', utonpa!" ta'pu ipi' tuuki'pi'nunse. Miri etasa' tuuya a'tai, iye'sanumu'pu, miripan usari'pu waku pe.

11 Paarü nakupu'pu tense, papa amu' tato' pe ri Paarü miri awonsi'ki Panapas kupu'pu to' uya. Tumaimu kon, Rai'koniya pon kon maimu yau to' uki'pi'nunpitu'pu, "Apune, enti'! Pusamoro ka'pon amu' esi miri papa amu' pe, e'tane ka'pon amu' pe to' era'tisa', miripan kon u'tisa' ka' winipai upika'tise'na'nokon!" ta'pu to' uya.

12 Miri yau, Panapas esaku'pu to' uya Isus tukai', "Eke pe iyese," ta'pu to' uya, miripan Paarü esaku'pu to' uya frames tukai', apune para tusau'ro'sen pe iyese pi'.

13 Eke pata mura'ta yau ri to' use'mato', ipremato' iwu' esi'pu Isus itese' tepuru kon apurise'na ka'pon amu' utito' ita'. Miripan to' use'mato' tarawasomanin uya Paar_u miri awonsi'ki Panapas nukupu'pu eta'pu. Miripan uya asa'ri paka amu' nee'pu, pata ipuru to' imu woi, to' use'mato' tarawasomanin, miri awonsi'ki ka'pon amu' esi'pu paka amu' inwipai Paar_u miri awonsi'ki Panapas apuri pe tenta'nato' kon pe.

14 Miri yau, Paar_u miri awonsi'ki Panapas uya to' e'kayasa' i'tu'pu paka amu' wini pi' tapuri kon pe to' po'tito' pe tuuya'nokon, miripan kon uya tapon kon puro'pon karapitu'pu, "Kane!" ta tuuya'nokon e'kwa pe. To' eka'tumu'pu ka'pon amu' koro'ta tukipi'nunpitu'ma'nokon,

15 "Ina tonpa ton, miri ku'ku'tuu! Ka'pon amu' ri mari ina, awarai'nokon ni mari! Emenna' itekare waku kuru ekamai' ina uye'sa' ipi'nokon. Taron kon ika'sa' ton piyapai era'titi'; i'napairon Papa piya' era'titi!' To' uya ipika'ti kon para iyesi. Kari ri esi Papa pe, tanporon non koneka'pu iya tanporo ipo te'sen. Non koneka'pu iya, parau, tuna ton, ka' miri awonsi'ki tanporo uri'nokon.

16 Pena ri imiri'nokon Esuweru amu' pen esi'pu i'se ri iwe'to' kon apuri pi' Papa uya ri iyenpitu'pu kon, apune para ti'tu auya'nokon para iyesi pi'.

17 E'tane si, tanporon kon ka'pon amu' enu ya' isenpoikasa', kari ri uya waku ton ke repan nisa' tukai' i'tu kon pa. Waku ton ni ku'sa' iya iiwano' kon pe: tuna enno'sa' iya; taweyu a'tai iyepetato' pe i'kiyari kon ku'sa' iya; eke pe ri kiyari ke

irepasa' iya 'nokon; miri awonsi'ki pori' pe iku'sa' iya 'nokon," ta'pu Paarua uya.

18 To' usauroku eta'pu ka'pon amua' uya e'tane ri, to' ereutanuku i'se to' e'tane paka amua' wini to' uya namai', to' ereutanuku to' uya poken para iyese'pu.

19 Miri a'tai, Esuwerua amua' Antiyo' miri awonsi'ki Ai'konian pon kon uyee'pu, miripan kon uya tuwiniku'i' nokon to' mo'ka'pu. Miripan kon uya ti' ke Paarua wipitu'pu. Iyeri'sa' pe tekamai', to' uya ipi'siku'pu pata apai.

20 E'tane Sises apurinin nan uti'pu Paarua piya'. To' amura'pu iwoi. Iye'ma'sa'ka'pu, miripan enna'po'pu pata pona to' a'kiri. Iyema'sa' yau, Paarua miri awonsi'ki Panapas uti'pu Terapi pona Restara ponsi'ki.

To' Enna'po'pu Antiyo', Siriya Yawon Pona

21 Miri yau, to' uko'mamua'pu Sises ekareei Papa Maimu ekama pi'. Tu'kan kon ni kupu'pu to' uya Sises apurinin nan pe. Miri tupo, enna'pon pi' to' e'sara'ti'pu Restara pona miri awonsi'ki Ai'konian pona miri awonsi'ki Antiyo' pona.

22 Pata kaisari ri Sises apurinin nan epopitu'pu to' uya. To' meruntitanuku'pu to' uya, miripan kon auro'ka'pu to' uya itekare pi' to' pori'ma pe, Sises ri apuri pi' to' uko'manto' pe. "Uri'nokon ekota'mato' pe iyese Papa e'to' esa' wanni pe ya' epa'kan nito' pe," ta'pu to' uya.

23 Paarua miri awonsi'ki Panapas uya so'si epuru pe te'ton kon anamua'pu. Tuwipuremai' miri awonsi'ki tenta'nai' para tuserumai' to' taru'pu to' uya to' napurinu Itepuru ena'.

24 Pi'sitiya itese' pata poro tauti kon tupo, Paarú miri awonsi'ki Panapas uti'pú Panperiya pona.

25 Miripan kon uya Pirúka itese' pata eporo'pú, to' uya Papa Maimu ekama'pú ka'pon amú pi'. Miri tupo, to' uti'pú parau e'pi pona, to' uya A'tariya itese' pata eporo'pú.

26 A'tariya ponsi'ki kanau yau, parau kau to' uti'pú Antiyo' pona ri mari te'sara'ti'pú kon ya'. Miri yau, to' tarú'pú Papa uya wakú nonkasa' ya' to' tarawasooi to' uya enuka'nú'sa' na'ne' si ku'nin pe to' e'to' pe.

27 Antiyo' pona tuye'sa' kon a'tai, tanporo apurinin nan amuranú'pú to' uya. Papa nukupú'pú tporo'nokon ekama'pú to' uya to' pi', Esuwerú amú pen uya apurito' pe ikupú'pú iya rú'pú.

28 Paarú miri awonsi'ki Panapas pokon uko'manpitu'pú Antiyo' po inke ri kapai tenno'pi'se, Sises pi' enupasa' kon miri pata yawon kon piyau.

15

Konsurú Amú Surusiran Pon Kon

1 Taron kon Sises apurinin nan uti'pú Isutiya yapai Antiyo' pona tatonpa kon enupase'na, "Iyun kon pi'pi puturú'kasa' auya'nokon a'tai riken, Mosi' nekama'pú awiri, Papa uya ipika'ti kon," tase'na.

2 Seri uya, Paarú miri awonsi'ki Panapas pokon sakoropa'pú, miripan pi' to' pokon pe to' e'sei'pitu'pú. Miri a'tai, Paarú miri awonsi'ki Panapas anamú'pú to' uya taron kon apurinin nan pokon pe, to' utito' pe Surusiran pona, enno'sa'

kon miri awonsi'ki so'si epuru ton ense'na to' uti'pɛ miri pi'.

³ Apurinin nan uya to' ennoko'pɛ. To' uti koro'tau Pini'siya, Sameriya yawiri, Sises apurinin nan auro'ka'pɛ to' uya, “Esuwerɛ amɛ' pen enasa' man Sises apurinin nan pe,” tukai'. Tanporon kon epori'ma'pɛ ipan pe eta tɛuya'nokon a'tai.

⁴ To' uye'sa' a'tai Surusiran pona, to' ereutanɛkɛ'pɛ apurinin nan uya, enno'sa' kon miri awonsi'ki so'si epuru ton uya. Miri a'tai, Paarɛ miri awonsi'ki Panapas uya to' pi' ekama'pɛ tanporo Papa nɛkupɛ'pɛ tɛporo'nokon Esuwerɛ amɛ' pen koro'tau.

⁵ Miri a'tai, Sises apurinin nan Pari'si amɛ' tonpa ton e'mɛ'sa'ka'pɛ, miripan kon uya ta'pɛ, “Esuwerɛ amɛ' pen yun pi'pi puturɛkato' pe kuru ri iyese miri. Mosi' nekama'pɛ main apurito' pe to' uya ekama auya'nokon kuru miri to' pi',” ta'pɛ to' uya.

⁶ Seri pi' isenuminkase'na itekare ekamai' enno'sa' kon miri awonsi'ki so'si epuru ton amara'pɛ.

⁷ Inke kuru tɛusaurokɛ kon tɛpo, Pi'ta e'mɛ'sa'ka'pɛ, ta'pɛ iya to' pi', “Utonpa ton, i'tu auya'nokon pena Papa uya uyanɛmɛ'pɛ i'koro'tapai'nokon, Esuwerɛ amɛ' pen uya itekare etato' pe uri wini, to' uya apurito' pe niri.

⁸ Papa, tanporon usenuminkato' i'tunin uya enpoika'pɛ Esuwerɛ amɛ' pen anɛmɛ tɛuya Wakɛ A'kwarɛ tɛrɛ tɛuya wini to' pona, uri'nokon pi' ikupɛ'pɛ tɛuya kasa.

9 Taron ni pe uku'sa' iya 'nokon para ri iyese kamoro piyapai. To' ewan koruka'pu iya to' uya apurito' wini.

10 Fri pe ken si iyese pi' Papa i'tupitu i'se iwesi kon? Sa'man pe ri Esuweru amu' pen apurinin nan kupu i'se iwesi kon miri, uri'nokon miri awonsi'ki ukupunu kon nukupu'pu pen ni.

11 Kane! Apuri Itepuru Sises uya waku nonkasa' poro epika'tin nisa', to' kasa ri," ta'pu iya.

12 Tanporo iyamurasa' kon esi'pu e'pana Panapas miri awonsi'ki Paarua eta pi' i'tuto' ipikiri miri awonsi'ki a'kwarupi'nin ku'sa' Papa uya taporonokon Esuweru amu' pen koro'tau ekama tane to' uya.

13 To' e'nonkasa' a'tai, Isens usauroku'pu, "Utonpa ton, uyetati'.

14 Saiman nekamayan ko upi'nokon, Esuweru amu' pen pi' 'aiko' tato' tuuya enpoika Papa uya, to' tonpa ton anamu tuuya wini tamunki pe to' e'to' pe.

15 Seri si esi seri pena pu'kena' amu' numenuka'pu awiri. Iye'menukasa' na'ne' kasa:

16 " 'Seri tupo, enna'poto' oton

Tepi' iwu' ru'pu uta'mo'kasa' konekase'na,
miripan a'motasa' ami uya emenna' pe,
inna'po uya pena iyese'pu kasa.

17 Miri a'tai, ka'pon amu' tonpa ru'san uya Itepuru warinpatu' pe,
tanporo kamoro Esuweru amu' pen uri iwano'
pe to' esi, tasa' Itepuru uya, seri ku'nin nu'pu
uya,*

18 Pena ri isi'tusa' ru'pu seri.

* 15:17 Emas 9:11-12 15:18 E'sotas 34:15-17; Ripaiti'kas 18:6-23; 17:10-16

19 “Miri pe iyese pi', miri pi' ekonekasa' man: sa'man pe iku'pai pura man Esuweru amu' pen pona nera'tiyai'ne' nan Papa winikui'.

20 Miri pe iyese pi' to' ena' imenukapai'nokon, to' auro'kapai'nokon iri kiyari ika'sa' ena' itusa' pi' to' enta'na namai'; tekumai' makoi tuku'se pura to' e'to' pe; terupatu'kai' iwisa' o' miri awonsi'ki manpan pi' to' enta'na namai'.

21 Papa uya Mosi' repa'pu ike Main ekama pi' ka'pon amu' nuko'manyan pena si'kiri ri, Sapa' kaisa ri usenupan nito' iwu' tau pata kaisari ri seri pu'ku pona ri,” ta'pu iya.

To' Numenuka'pu Esuweru Amu' Pen Apurinin Nan Ena'

22 Miri a'tai, enno'sa' kon miri awonsi'ki so'si epuru ton, tanporo so'si tawon kon pona ri niri, waku pe poken iyese'pu ka'pon amu' anunto' pe to' uya tu'koro'tapai'nokon, miripan kon uya to' ennoko'pu Antiyo' pona Paaruu miri awonsi'ki Panapas a'kiri. Asa'ron kon anumu'pu to' uya: Isutas, Pa'sapas tato'; miri awonsi'ki Sairas, tatonpa kon epuru pe te'san.

23 Miripan kon enau kareta ennoko'pu to' uya se tawon si:

“Ina, enno'sa' kon miri awonsi'ki so'si epuru ton, irunan kon uya, ‘Miyari'nokon,’ ina tonpa ton pe iyenasa' kon Esuweru amu' pen Antiyo', Siriya, Siri'siya pon kon.

24 Ina uya etasa' man ina nennoko'san pen ni uti'pu miri ya' amanenpase'na'nokon, iusenuminkato' kon tumanenpai'.

25 Miri wenai, tanporo ina e'kupuu'pu ka'pon amu' anumu' pi', miripan kon ennoko'pu ina uya

imiyamoro piya', Panapas miri awonsi'ki Paarū pokon a'kiri,

26 ka'pon amū' tūuma'tato' kon pi' tenari'nūnsan pen ni pena iyepa'kaka'sa' kon ni miri yai, uyepuru kon Sises Kūrai ese' wenai.

27 “Miri pe iyesi pi', ina uya Isutas miri awonsi'ki Sairas ennoko miri, kareta ina nūmenuka'pū enpoikase'na tūnta kon yai.

28 Wakū poken iyesi'pū Wakū A'kwarū miri awonsi'ki ina pona, imiri'nokon pona e'tape'ne' ri tūrū namai' i'se e'nito' entai ri.

29 Papa tato' pe ipi' ika'sa' ena' use'man nisa' rū'pū pi' kenta'natū; miri pona mān pi' kenta'natū, miri awonsi'ki o' erupatu'kasa' rū'pū niri; tekumai' niri ke'makoimatū. Wakū pe iwesi kon miri seri ton apanama'pū kon awiron pe iwesi kon yau. fisiri ina ne'nonkayan, wakū pe si tanporo miko'mantai',”
tawon.

Isutas Miri Awonsi'ki Sairas Uya Kareta Tūrū'pū

30 Asakiri'nān kon warawo' amū' ennoko'pū to' uya Antiyo' pata pona. To' amūrasa' a'tai tanporo so'si ta', kareta tūrū'pū to' uya to' ena',

31 miripan ekama to' uya a'tai, to' epori'ma'pū tūpika'tinin kon pe main esi pi'.

32 Miri a'tai, Sairas miri awonsi'ki Isutas, pu'kena' pe te'san uya eke pe ri to' pika'ti'pū. Merunti pe ri tūtonpa kon amū' kupū'pū to' uya.

33 To' uko'mamū tūpo miri yau, to' tonpa ton uya to' ennoko'pū tūsewankamai' pūra to' utito' pe tenno'nin nū'san kon piya'.

34 Miri e'tane, Sairas ekoneka'pu miri yau ri tuko'manto' pe.†

35 E'tane Paar_u miri awonsi'ki Panapas pokon e'nimi'pu Antiyo' po. Miri yau, tu'kan kon pokon pe esii'ma enupan pi', miri awonsi'ki Itepuru Sises maimu ekama pi' ri to' esi'pu.

I'sentai Paar_u, Panapas Pokon Eseru Esi'pu

36 Miri tupo, Paar_u uya ta'pu Panapas pi', “Enna'ponpai utonpa kon am_u' ka'k_uranpase'na tanporo pata kaisari Itepuru Maimu ekama ne'taine' awiri, ikupu to' uya ense'na,” ta'pu iya.

37 Panapas esi'pu Isaan, Ma' tukai' tesa'sen ari i'se ta'kiri'nokon,

38 e'tane Paar_u pona ipoken pu_{ra} iyesi'pu, ap_une pu_{ra} tuninsa' iya 'nokon pi' Panperiya yau iye'tarawasoma pu_{ra} iyesi'pu to' a'kiri.

39 Ipan pe isi pe to' e'sei'pitu'pu. Miri wenai, to' e'nonka'pu isipiyapai; Panapas uya Ma' an_um_u'pu tisakon pe. To' uti'pu kanau yau Sai'pu_{ra}s pona;

40 e'tane Paar_u uya Sairas an_um_u'pu. Sises apurinin nan uya to' tu_u'pu Itepuru uya waku nonkasa' ya'. Miripan kon nin si uti'pu miri.

41 To' uti'pu Siriya miri awonsi'ki Siri'siya awiri, apurinin nan meruntitan_uk_u pi'.

16

Temu'ti Ena'pu To' Tonpa Pe

1 Paar_u miri awonsi'ki Sairas pokon uti'pu Siri'siya itese' pata ponsi'ki Ter_upi pona, miripan kon uti'pu Rest_ura pona Sises apurinin Temu'ti

† 15:34 T_uron ni ton penaro' kuru imenukasa' yau v. 34 pu_{ra} iyesi.

15:38 Inkupu'pu 13:13

itese' pata'se' ya'. Isan esi'pɛ Esuwerɛ amɛ tonpa pe, Sises apurinin, e'tane ikɛipɛnɛ esi'pɛ Kiri' pe.

² Itekare apurinin nan, Restara miri awonsi'ki Ai'koniyon pon kon uya, “Wakɛ kɛri ri Temu'ti,” ta'pɛ.

³ Ta'kiri tɛron ni pata ya'ne Temu'ti miri awonsi'ki Sairas anapai Paarɛ esi'pɛ, miripan uya Temu'ti yun pi'pi puturɛka'pɛ. Miri kupɛ'pɛ iya, Temu'ti uya ekamɛra miri pata yau te'san Esuwerɛ amɛ e'kupɛ emapu'ti namai', apɛne pɛra Esuwerɛ pe pɛra ikɛipɛnɛ esi uya iku'sa' pe pɛra to' uya i'tu'pɛ.

⁴ Miri yau, pata kaisa ri to' usari'pɛ. Surusiran pon kon enno'sa' kon miri awonsi'ki so'si epuru ton nakoneka'pɛ main Esuwerɛ amɛ pen napuri ton pe iku'sa' ekama pi' to' esi'pɛ pata kaisa ri.

⁵ Miri pi', Sises apurinin nan umeruntita'pɛ apurito' tɛuya'nokon yau, miripan kon epiriku'pɛ tu'ke ri wɛi kaisa ri.

Paarɛ Enu Uta'kwakasa' Uya Ma'sitoniya Pon Ene'pɛ

⁶ Paarɛ miri awonsi'ki itonpa ton uti'pɛ Pɛrekiya nono poro miri awonsi'ki Kare'siya itese' pata epose'na, apɛne pɛra Wakɛ A'kwarɛ esi'pɛ Sises ekareei ekama to' uya i'se pɛra Eisa po.

⁷ Paarɛ miri awonsi'ki iya'kiri te'san uya Maisa itese' pata eposa' a'tai, Pi'tiniya itese' pata ya' itipai to' esi'pɛ, e'tane Sises A'kwarɛ esi'pɛ miri ya' to' uti i'se pɛra.

⁸ Miri pe iyese pi', to' uti'pɛ to'sari ri Maisa poro, miripan kon epa'ka'pɛ Tɛrowas pona.

9 Ewarupi nau, Papa uya ka'pon Ma'sitoniya pon ento' pe Paar_u enu a'kwaka'p_u. Ka'pon e'm_u'sa'kasa' ene'p_u iya ata'kwarukase'na, “Ma'sitoniya pona ina ipika'titan_u'ki,” ta'p_u iya.

10 Paar_u enu uta'kwaka'p_u tupo, inke p_ura ri Ma'sitoniya pona tautito' kon pe ina e'kama'p_u, ap_une p_ura ina uya i'tu'p_u Papa esi miri yau ina uya itekare ekama i'se tukai'.

Retiya Ena'p_u Sises Apurinin Pe

11 Ina ekanwa'ti'p_u kanau ya' Turowas po, miripan parau ni'kwiri'nuku'p_u ina uya opa'w_u Samo'tures itese' pona. Iyema'sa' yau, ina uti'p_u Niya'pores itese' pata pona kanau yau.

12 Miri tupo, ina uti'p_u makai' Piri'pai itese' pata pona, Roman am_u' neporo'p_u. Eke pe kuru seri pata esi'p_u Ma'sitoniya po. Inke ru'kwi ri wai ina uko'manpitu'p_u Piri'pai yau.

13 Ina uti'p_u pata apai tuna tautisen e'pi pona Sapa' a'tai, Esuwer_u am_u' ip_uremato' pata'se' eporo i'se ina esi'p_u. Ina ereutapitu'p_u, miripan usauro'ni pi' ina e'sara'ti'p_u miri yau, iyam_urasa' kon uri'sami'si am_u' pokon pe.

14 Miri yau, tikin nan to' tonpa ina maimu eta pi' te'sen esi'p_u, Retiya itese', Taya'tira itese' pata winon, tatariren pon atu k_upo'poma pi' te'sen. Retiya esi'p_u Esuwer_u am_u' tonpa pen ni, e'tane ri Papa pi' tawip_uremasen pe iyesi'p_u. Paar_u neka-man_u Sises ekareei apurito' pe iya Itepuru uya itewan a'koka'p_u.

15 Retiya miri awonsi'ki itiw_u' tau te'san pa'taisima ina uya tupo, tiw_u' ta' ina ki'ma'p_u iya. “Itepuru Sises apurinin pe esi tukai' i'tu

auya'nokon pi' si, uiwu' ta' isi'ti," ta'pu iya. Ina utito' pe tiwu' ta' ina kuu'pu iya.

Paaru, Sairas A'si'pu To' Uya Pariki'si Ta'

16 Taron ni a'tai, Esuweru amu' ipuremato' ya' ina uti a'tai, to' poitoru pe te'sen uri'san eporo'pu ina uya, makoi a'kwaru yen pe iyese'pu, miripan esi'pu pena ri te'ku'ton i'tunin pe. Itesa' pe te'san uya eke pe purata eporo esi'pu, apune pura ka'pon amu' uya e'ma'pu to' ena' te'ku'sen ekamato' pe iya.

17 Puse ri uri'san uya Paaru miri awonsi'ki itonpa ton e'ma'pukapitu'pu inke iki'pi'nunpiti'ma, "Pusamoro ka'pon amu' esi Eke Papa poitoru ton pe, miripan kon uya epika'tin nito' eseru ekama!" ta'pu iya.

18 Inke ri miri ta pi' iyese'pu Paaru tanpokumai', miripan era'ti'pu makoi a'kwaru yen winikui', miripan uya, "Sises Karai ese' yau ayauro'ka uya, puse uri'san apai epa'ka!" ta'pu. Miri a'tai ri, makoi a'kwaru epa'ka'pu iyapai.

19 Itesanon uya seri enta' tururataai kon epoto' iya oton pen tukai' i'tusa' a'tai, Paaru miri awonsi'ki Sairas a'si'pu to' uya. To' pi'siku'pu to' uya kurupo'po pi' e'nito' pata'se' ya' eke ton pata esanon piya'.

20 Roman amu' epuru ton piya' to' ari'pu to' uya, miripan kon uya, "Esuweru amu' pusamoro, e'tane upata'se' kon yawon kon ka'pon amu' anpokuma to' uya.

21 Utonpa kon amu' enupa to' uya uri'nokon Roman amu' nukupunu pen ni ku'to' pe to' uya," ta'pu to' uya.

22 Miri yau, anpisin ton ka'pon amu' e'sara'ti'pu to' tonpa pe Paar_u miri awonsi'ki Sairas ewa'noma pi', miripan itepuru ton uya soisa amu' apiyonti'pu to' pon kara'pi'to' pe to' uya, miri awonsi'ki to' ari'po'pi'to' pe to' uya.

23 Isi pe to' ari'po'pi'tu tu_{po}, Paar_u miri awonsi'ki Sairas a'si'pu to' uya pariki'si ta'. Itepu_{ru} ton uya to' a'sinin auro'ka'pu, waku pe to' erasuntito' pe iya.

24 Main etasa' tu_{yua} a'tai, i'na' kuru to' ennin uya to' ewonnaku'pu, miripan uya yai aku'pi'sa' yai'ne to' p_{ur}akon amu' enpa'kapitu'pu, ti'si kon amu' amapitu to' uya namai'.

25 Anomura' a'tai, Paar_u miri awonsi'ki Sairas esi'pu eke pe ip_ureman pi'. To' userenka'pu Papa apuripitu'pu to' uya, tu_{ron} kon a'sisa' kon esi'pu to' etapitu pi'.

26 Miri koro'tau, pana' pe tu_{ru}'pu_{nu} esi'pu, pariki'si usi'ki'ma'pu miri, iyapon ni usi'ki'ma'pu. Inke pu_{ra} ri, pariki'si mura'ta amu' uta'kokapitu'pu, miri awonsi'ki a'sisa' kon auronpi'to' ike i'sen amu' emo'kapitu'pu.

27 Miri a'tai, a'sisa' kon esa' upaka'pu, miripan mura'ta amu' uta'kokapi'sa' tense, tu_{suparaai} mo'ka'pu tu_{utapurukato}' pe ike, ap_une pu_{ra} a'sisa' kon utipitu'pu tukai' tu_usenuminka ke.

28 "Iiwano' pe ri, katapurukai, tanporo ri seri yau ina man!" tukai' nin si Paar_u uki'pi'n_unpitu'pu miri.

29 Tu_{weyu} nin si i'se a'sinin uki'pi'n_unpitu'pu miri, miripan ewomu'pu Paar_u miri awonsi'ki Sairas pokon raku'i iye'sekunka'pu e'tititi'kai'ma.

30 To' enpa'ka'pu iya pariki'si tapai, miripan kon pi', "I'ri kuru taku'se epika'tito' pe iyese?" ta'pu iya to' pi'.

31 Miripan kon uya, "Itepuu Sises apuriki iyepika'ti pa, imiri miri awonsi'ki iwu' tau te'san," ta'pu to' uya ipi'.

32 Miri yau, Paarū miri awonsi'ki Sairas uya Itepuu Sises ekareei ekama'pu a'sinin miri awonsi'ki itiwu' tawon kon pi'.

33 Miri a'tai ri, a'sinin uya to' ari'pu to' ari'po'pitu'pu pata'pu korukase'na. Inke para ri miri tupo, Paarū miri awonsi'ki Sairas uya kuri ri miri awonsi'ki itiwu' tawon kon pa'taisima'pu.

34 Miri yau Paarū miri awonsi'ki Sairas ari'pu a'sinin uya tiwu' ta' to' a're'ti'. Papa apuri tuuya pi' nin si ipan pe pori' pe iyese'pu miri, miri awonsi'ki itonpa ton ni niri.

35 Miri ema'sa' yau, itepuru ton uya puresiman amu' ennoko'pu a'sinin piya'. "Tiwi kamoro ka'pon amu' nuti," tawon main esa' pe.

36 Miripan uya Paarū miri awonsi'ki Sairas pi', "Itepuu amu' uya uyapiyontisa' man iyenno'to' kon pe uya, miripan yau entanti' ri si, tusewankamai' para," ta'pu iya.

37 E'tane Paarū uya puresiman amu' maimu eiku'pu, "Iri ku'sa' ina uya para ri iye'tane, soisa amu' uya anpisin koro'tau ina ari'po'pi'to' pe to' uya, to' auro'ka'pu! Roman amu' ina e'tane pariki'si ta' ina a'si'pu to' uya, miripan kon esi ama'ai ina ennoko i'se. Kane! Tiwi Roman amu' epuru ton nuyepu' ina enpa'kai'," ta'pu iya.

38 Miri yau, puresiman amu' epuru ton enna'po'pu Paarū maimu ru'pu ekamai' Roman

amú' epuru ton pí'. Roman amú' ina, tasa' Paarú miri awonsi'ki Sairas uya etasa' tũuya'nokon a'tai, to' usenari'pa'pũ.

³⁹ Miripan kon uti'pũ to' pí' iri pe ri ina e'sa' man tase'na. Paarú miri awonsi'ki Sairas enpa'ka'pũ to' uya pariki'si tapai, miripan kon pí', “Entanti',” ta'pũ to' uya.

⁴⁰ Pariki'si tapai tepa'ka kon tũpo, Paarú miri awonsi'ki Sairas pokon uti'pũ Retiya iwũ' ta', miripan kon e'seporo'pũ tũtonpa kon amú' pokon pe. To' auro'ka tũpo to' pori'ma pe, Paarú miri awonsi'ki Sairas uti'pũ Piri'pai apai.

17

Paarú Esi'pũ Tesaroni'ka Po

¹ Paarú miri awonsi'ki Sairas uti'pũ Anpi'pores miri awonsi'ki A'poroniya pata ton awiri. Tesaroni'ka pata eposa' to' uya a'tai, Esuwerú amú' usenupato' iwũ' eporo'pũ to' uya miri pata yau.

² Te'pí'to' kasa ri, Paarú uti'pũ Esuwerú amú' usenupato' iwũ' ta' osorũwau Sapa' kaisa ri ka'pon amú' auro'ka pí' iyesi'pũ iye'menukasa' itekare ke.

³ Enpoika pí' iyesi'pũ Kũrai* ekota'mato' pe iyesi'pũ, ima'tato' pe iyesi'pũ, miri tũpo iye'mũ'sa'kato' pe terikũ'pũ apai iyesi'pũ niri. “Pũse ri Sises kanyauro'kayatai'ne' esi miri Kũrai pe,” ta'pũ iya to' pí'.

⁴ Tũron kon Esuwerú amú' ena'pũ Paarú miri awonsi'ki Sairas pokon tonpa pe, tu'kan kon ni Kiri' amú' Papa namanin nan pokon pe ri niri, miri awonsi'ki tũnamai' te'san uri'sami'si amú' ri niri.

* **17:3** Kũrai; miri pe pũga, *Me'saya; Papa Nanũtũ'pũ* ta e'kwa pe.

⁵ E'tane taron kon Esuweru amu' ikinta'pu. Miri a'tai, iri iteseru ton ka'pon amu' kan to' uti'pu kurupo'po pi' e'ni pata'se' apai. Miri tupo, ka'pon amu' amaranuku'pu to' uya, miripan kon uya usewankaman nito' sara'ti'pu. Miripan kon uti'pu Ise'sun iwu' ta' Paarumiri awonsi'ki Sairas warin-pai', to' ne'to' pe tuya'nokon tu'kan kon ka'pon amu' koro'ta'.

⁶ E'tane Paarumiri awonsi'ki Sairas eporo'pu to' uya pen. Miri wenai, Ise'sun pi'siku'pu to' uya. Taron kon niri Sises apurinin nan ne'sa' niri to' uya esi'pu eke ton itepuru ton piya'. Tu'kan kon ka'pon amu' uki'pi'numu'pu, "Pusamoro manenpanin ku'nin nan pata yau uye'sa' man seri yau.

⁷ Ise'sun uya to' ereutanu'sa' tuiyau. Tu'kan ni kupu'pu to' uya kin Sisa uya tasa' poro pura. Ta to' uya moro man taron ni kin, Sises tukai' tesa'sen ta to' uya," ta'pu to' uya.

⁸ Seri etasa' pata epuru miri awonsi'ki anpisin ka'pon amu' uya a'tai, to' e'sakoropa'pu.

⁹ Miri tupo, Ise'sun miri awonsi'ki taron kon ka'pon amu' uya purata tuto' pe to' kupu'pu itepuru ton uya to' nonkato' pe to' utito' pe aka'ne' pe.

Paarumiri Awonsi'ki Sairas Esi'pu Pereya Po

¹⁰ Ewarupi uye'sa' pe ri, to' tonpa ton uya Paarumiri awonsi'ki Sairas ennoko'pu Pereya pata pona. Pereya pata eposa' tuya'nokon a'tai, Paarumiri awonsi'ki Sairas pokon uti'pu Esuweru amu' usenupato' iwu' ta'.

¹¹ Pereya pon kon Esuweru amu' esi waku pe pari iteseru, isenupapai pari Tesaroni'ka pon kon ka'pon amu' entai, ipan pe Sises ekareei inetapai to' esi'pu. Tiwiri wui kaisa ri iye'menukasa' itekare

Turon kon uya ta'pu, "Turon ni papa pi' ipureman nito' pe enupan ni iya, turon ni pata awon kon kasa," ta'pu to' uya. Seri ta'pu ka'pon amu' uya, arune para waku Sises e'mu'sa'ka'pu ekareei ekama Paarpu uya pi'.

¹⁹ Miri tupo, Paarpu nee'pu to' uya Areyo'pakas itese' pata'se' ya'. Miri yau, "Ina auro'ka' seri emenna' iyekareei ke," ta'pu to' uya ipi'.

²⁰ "Iyekareei man ina netapitunu pe para ri; miri wena, i'ri kuru ta auya e'kwa pe iyese tukai' ina pi' enpoikaki," ta'pu to' uya.

²¹ (Tanporo A'tens miri tupo ka'kuran amu' miri yau tuko'mansan esi'pu tawayu kon enno'pitu pi' emenna' itekare pi' usauro'ni pi'.)

²² Miri tupo, Paarpu e'mu'sa'ka'pu ka'pon amu' amurasa' koro'tau, Areyo'pakas pata'se' yau, "A'tens pon kon ka'pon amu'! Iyene uya 'nokon tanporo ri ipureman iya'kwaru pe me'atui',

²³ arune para tanporo pata yau upinimu koro'tau, iwipuremato' kon yau ene pi' iuse'mato' kon apon egoro'pu uya. Miri pi' iye'menukasa' ensa' uya man, 'Ti'tusen pen ni Papa ena', tawon. Seri pe si ini'tunu kon pen ni ipureman nito' ipi' ekareei ekama uya seri ipi'nokon.

²⁴ "Papa, non konekanin nu'pu, tanporon Epan miri awonsi'ki non esi itiwano' pe, miripan uko'mamu pen ka'pon nami'pu temiyatu ke iuti tau.

²⁵ Papa esi miri ka'pon uya turepa enupikiron pen, arune para tanporon ni i'se iye'to' esi ipiyau, arune para Papa kuri ri tanporon kon ni repantin

uko'man ni a'kwaru ke.

²⁶ Tikin nan Papa nukaa'pu ka'pon wini, tu'ke ka'pon amu' epamu'pu seri non po, seri non emu' poro'ne to' uko'manto' pe. Pata weyu ton koneka'pu iya iye'to' awiri'ne. Pata ton niri iye'to' airi'ne ka'pon uko'manto' yau pe'ne.

²⁷ Seri kupu'pu iya, to' uya tawarinpatu' pe, to' uya ri iwarinpa tauya'nokon koro'tau epoto' pe, inni pu'ra ri Papa e'tane upiyapai'nokon.

²⁸ 'Kari ri uriya' uko'man ni, upinin ni, nurine e'ni.' Imenukanin, itonpa kon pe te'sen uya, 'Uri'nokon kamoro ipayan nu'san,' tasa' na'ne' kasa ri.

²⁹ "Papa nukoneka'san pe e'ni wenai, usenu-minkan poken pu'ra iyese ika'sa' pe iyese tukai'; koru, ti', miri pe pu'ra sirupa, ka'pon nukoneka'pu ipureman nito' pe e'tane nurine pu'ra iyese.

³⁰ Pena a'tai, ka'pon amu' uya ti'tu pu'ra iyese pi', Papa uya to' enpitu'pu, i'ri pe to' taku'se pu'ra ri. E'tane si seri pe, mi yawiron kon ni ka'pon amu' pi', 'Amakooi kon apai era'tika'ti!' ta iya.

³¹ Apune pu'ra tikin ni wai taweyu ku'sa' iya ka'pon amu' eseru aimenkato' tauya weyu pe, seri ku'ton ka'pon epoka'sa' Papa uya tiwano' pe ka'pon amu' uya apurito' pe. Papa uya tunanamu'pu enpoikasa' to' enu ya', i'mu'sa'ka tauya wini iyeriku'pu apai," ta'pu Paaru uya.

³² Ka'pon amu' uya iyeri'sa' kon e'mu'sa'ka'pu ta iya eta a'tai, isapema pe to' uta'kiri'pu, e'tane taron kon uya, "Seri ekareei pari inetapai ina man," ta'pu.

³³ Miri tupo, Paar_u epa'ka'p_u usauro'nito' pata apai.

³⁴ Tu'kan kon pen ni ka'pon am_u' ena'p_u Paar_u pikiron kon pe, miripan kon uya niri Sises apuri'p_u. To' koro'tau Sises apurinin pe iyenasa' ese' esi Tayano'siyas, Areyo'pakas itese' konsuru am_u' tonpa pe te'sen, Tamares itese' niri uri'san, miri tupo taron kon uya ri niri Sises apuri'p_u.

18

Paar_u Esi'p_u Koren Po

¹ Seri tupo, Paar_u uya A'tens nimi'p_u, miripan tupo Koren pata pona iti'p_u.

² Miri yau, A'kira itese', Esuwer_u eporo'p_u iya, Pontas pon, pena p_ura iye'sa' kon I'tari pata winipai tano'p_u P_ure'sira a'kiri, ap_une p_ura Roman pata epuru K_urautiyas itese' uya tanporo Esuwer_u am_u' epa'kato' pe tasa' pi'. Paar_u uti'p_u A'kira miri awonsi'ki P_ure'sira ense'na.

³ Tukasa ta'porin ton ka'pi'nin pe to' esi wenai, to' piyau e'turawasoman pi' iko'mam_u'p_u.

⁴ Tiwiri Sapa' kaisa ri'ne Esuwer_u am_u' miri awonsi'ki Kiri' am_u' pokon pe itekare pi' usauro'ni pi' iyese'p_u, Sises esi pika'tinin pe enno'sa' tukai' to' enu ya' enpoika i'se tesi wenai.

⁵ Sairas miri awonsi'ki Temu'ti uye'sa' a'tai Paar_u piya' Ma'sitoniya pata apai, Paar_u uya t_uweyu ennoko'p_u itekare riken ekama pi' Esuwer_u am_u' pi', Sises, k_uri ri K_urai,* tukai' enpoika'p_u iya.

⁶ E'tane Esuwer_u am_u' e'sara'ti a'tai iri pe, ipa'n_uk_u pe Paar_u pi' usauro'ni pi', Paar_u uya

* **18:5** *K_urai*; miri pe p_ura, *Me'saya*; *Papa Nan_um_u'p_u* ta e'kwa pe; v. 28 yau niri.

tupon tiuti'pu, Papa uya to' nonkasa' ekamanin pe. "Iiwano' kon pe ri aumakoita kon imunu kon uti emapu'ti auya'nokon ke, uri iwano' pe para iye'to' oton Papa uya iponi'sima kon a'tai. Seri apai utito' oton Esuweru amu' pen piya,'" ta'pu iya.

⁷ Miri tupo, Paarū uti'pu Ti'tiyas Isa'su'tas, Esuweru pen iwu' ta' itekare ekamai'. Ti'tiyas Isa'su'tas esi'pu Papa pi' tawipuremasen pe, Esuweru amu' usenupato' iwu' piyawon itiwu'.

⁸ Kiri'pas, Esuweru amu' usenupato' iwu' epuru, miri awonsi'ki itiwu' tau te'san uya Sises apuri'pu. Tu'ke itekare etanin nu'san Koren pon kon uya apuri'pu, miripan kon epa'taisima'pu.

⁹ Taron ni a'tai ewarupi nau, Itepuru Sises uya Paarū auro'ka'pu itenu uta'kwakasa' yau, "Enari'ke' kesii. Asauro'ki ri. E'pana kesii,

¹⁰ apune para aya'kiri e'ai' inu' uya ri iwini pen miri, apune para tu'ke ka'pon amu' man seri pata yau uyapurinin nan," tukai'.

¹¹ Miri a'tai, Paarū uko'mamu'pu tikin ni wapiya miri awonsi'ki 6 kaisa ri kapui ipona Papa maimu ke to' enupa pi'.

¹² Kariyo esi a'tai Roman amu' kopunaai pe, A'kaya pata epuru pe a'samutu ya' tuwenai, Esuweru amu' uya Paarū a'si'pu, miripan kon uya inee'pu ko'tu pi' e'ni iwu' ta'.

¹³ "Puse ri ka'pon uya ka'pon amu' auro'ka Papa pi' to' ipuremato' pe Main uya miri kasa tasa' para ri iye'tane," ta'pu to' uya.

¹⁴ Paarū e'sara'ti rawiri usauro'ni pi', Kariyo uya ta'pu Esuweru amu' pi', "Iri kuru ri, ipokena' pen kuru ri ku'sa' Paarū uya wenai, ausauroku kon a'tai amaimu kon setai'no.

15 E'tane se pe ri usekama'popi' ni main ton pi' miri tupo iiwano' kon iyaseru kon, iiwano' kon pe ri inkoneka'pu kon pi' ri iwesi kon wenai, iiwano' kon pe ikonekati'. Seri waraino iyaseru kon aimenka uya para man," ta'pu iya.

16 Miri tupo, Kariyo uya to' enpa'ka'pu.

17 Miripan kon era'ti'pu, Esuweru amu' usenu-pato' iwu' epuru a'sise'na, Sostenes itese', miripan ari'pu to' uya ko'tu pi' e'nito' iwu' tapai, miripan ari'po'pitu'pu to' uya ko'tu pi' e'nito' iwu' purorooi po. Miri pi' Kariyo usewankama'pu pen ni.

Paaru Utipitu'pu Tu'kan Pata Ya'ne

18 Paaru uko'mamu'pu inke ru'kwi ri Koren pata po. Miri yau, tatonpa ton tainse iti'pu kanau epotoru'pu yau Siriya pona. Tauti rawiri, ti'pai kiriri'ka'pu iya, Papa auro'kasa' tuuya pi', miripan a'kiri Pure'sira miri awonsi'ki A'kira e'sara'ti'pu itonpa pe.

19 To' uya E'pe'sas eporo'pu. Miri yau, Paaru uya Pure'sira miri awonsi'ki A'kira nimi'pu. Miri yau, iti'pu Esuweru amu' usenupato' iwu' ta', itekare pi' asauro'se'na Esuweru amu' pokon pe.

20 Inke pari iko'manto' pe to' uya ekama'po tane, e'pai para iyesi'pu.

21 E'tane tautikapu a'tai, "Papa eseru pe iyesi yau, uyepu kanan miri ipiya'nokon," ta'pu iya to' pi'. Miri tupo, iyekanwa'ti'pu kanau ya', miripan uti'pu E'pe'sas poi.

22 Paaru uya Sisariya eposa' a'tai, iyekanwaka'pu, "Miyari!" ka'se'na Sises apurinin

nan pi' Surusiran pona, miri awonsi'ki iu'ti'pu Antiyo' pona.

²³ Antiyo' po inke ru'kwi ri kanan tesi tupo, iti'pu kanan miri apai. Miripan uti'pu Kare'siya miri awonsi'ki Puresiya nono awiri'ne, miripan uya Sises apurinin nan meruntitanu'ku'pu.

Pure'sira Miri Awonsi'ki A'kira Uya A'poros Auro'ka'pu

²⁴ Miri koro'tau, A'poros, Esuweru pe te'sen, Arisantiriya pon uyee'pu E'pe'sas pona. Waku pe kuru tusauro'sen ye', iye'menukasa' itekare i'tunin pe iyesi'pu.

²⁵ Papa eseru awiri kuru enupasa' pe iyesi'pu. Pana' pe kuru niri tusauro'sen pe iyesi'pu, iye'to' poro kuru Itepuru Sises eseru pi' enupanin pe kuru niri iyesi'pu. Isaan Pa'tes ekareei epa'taisiman tawon niken i'tunin pe iyesi'pu.

²⁶ A'poros e'sara'ti'pu enari'mara Sises ekareei ekama pi' Esuweru amu' usenupato' iwu' tau. Pure'sira miri awonsi'ki A'kira uya etasa' a'tai, to' uya iki'ma'pu tiwu' kon ta'. Miri pata yau, waku pe pari Papa eseru enpoika'pu to' uya ipana ya'.

²⁷ A'poros esi a'tai itipai A'kaya pata pona, E'pe'sas awon kon to' tonpa ton uya ipori'ma'pu miyari pari itito' pe. To' uya kareta menuka'pu, miri yau te'san Sises apurinin nan ena' to' uya ereutanu'to' pe. Ipan pe kuru pata eporo iya a'tai, kamoro waku nonkasa' wini apurinin pe iyenasa' kon pika'tinin pe iyesi'pu,

²⁸ apune para pana' pe tusauroku wini Esuweru amu' a'kiri ipoken para to' e'sa' tukai'.

Iye'menukasa' itekare winipai enpoika'pŭ iya Sises esi Kŭrai pe tukai'.

19

E'pe'sas Po Paarŭ Esi'pŭ

¹ A'poros esi koro'tau Koren po, Paarŭ uya makui' tŭutisen asanta anŭmŭ'pŭ, miripan epa'ka'pŭ E'pe'sas pona. Miri yau, Sises apurinin nan eporo'pŭ iya,

² miripan uya to' ekama'po'pŭ, “Wakŭ A'kwarŭ pe' mepotantŭ Sises apurisa' auya'nokon a'tai?” tukai'.

“Kane, Wakŭ A'kwarŭ esi moro tukai' ina uya i'tusa' pŭra ri man,” tukai' to' uya imaimu eikŭ'pŭ.

³ Paarŭ uya to' ekama'po'pŭ, “'F'ri waraino epa'taisiman nito' ke iyepa'taisima'pŭ kon?” tukai'.

“Isaan Pa'tes uya epa'taisiman nito' ke ka'pon amŭ' enupa'pŭ poro ina epa'taisimasa',” tukai' to' uya imaimu eikŭ'pŭ.

⁴ Paarŭ uya to' maimu eikŭ'pŭ, “Isaan uya pa'taisiman nito' esi'pŭ miri makoi yapai ka'pon amŭ' era'tito' pe, to' auro'ka'pŭ iya te'ma'pŭ pe tŭuye'sen Sises tapuri' to' e'to' pe,” ta'pŭ iya to' pi'.

⁵ Seri etasa' to' uya a'tai, to' epa'taisima'pŭ Sises ese' yau.

⁶ Paarŭ uya temiyatŭ ton nonka'pŭ a'tai to' pona, Wakŭ A'kwarŭ uyee'pŭ to' pona'ne. Miri a'tai, to' usaurokŭ'pŭ tŭron ni ton main* yai'ne, miripan kon uya Papa Maimu ekama'pŭ.

19:4 Ma'siu 3:11; Ma' 1:4, 7-8; Ūru' 3:4, 16; Isaan 1:26-27 * **19:6** main, miri pe pŭra ani Kiri' maimu yau.

7 12 kaisa ri iye'to' airi ri to' esi'pu.

8 Paar_u uti'pu Esuwer_u am_u' usenupato' iw_u' ta' E'pe'sas po, miripan usauroku'pu enari'm_ura osoruwau kap_ui kaisa ri. To' pi' ipatakapitu'pu iya, to' uya ito'ka'n_uku i'se tesi wenai, Papa e'to' esa' wann_i pe pi'.

9 E'tane t_uron kon ka'pon am_u' ena'pu main inetapai pu_ura. To' uya tewan kon sa'mantan_uku'pu, miripan kon usauroku'pu iri pe Ite'ma awiron kon pi' tu'kan kon ka'pon am_u' koro'tau. Miri pi' si Paar_u uya to' n_imi'pu, miripan uya Sises pi' enupasa' kon ari'pu ta'kiri, miripan kon esi'pu t_uusenupa kon pe usauro'pi' ni pi' tiwiri w_ui kaisa ri Tiran_us sikuruui tau.

10 Seri kup_u'pu Paar_u uya miri asa'ri w_uipiya kaisa ri. Miri a'tai, tu'kan kon n_u'kw_i ri Esuwer_u am_u' miri awonsi'ki Kiri' am_u', eke Eisa awiri t_uuko'mansan uya Itepu_u ekareei eta'pu.

11 E'pe'sas po Paar_u esi a'tai, eke t_urawaso e'kup_u emapu'ti'pu Papa uya iporo.

12 Enki'sa am_u' miri awonsi'ki pon ton ni Paar_u napuripitu'pu ri apitu'pu to' uya e'ne' ton piya' to' epi'tipi'nin pe. Miri a'tai, to' eparan apai to' usepi'tipitu'pu, makoi a'kwar_u uya to' nonkapitu'pu.

7 Kaisaron Kon Su'kepa Munki Am_u'

13 Miri yau niri, Esuwer_u am_u' esi'pu pata kaisa ri makoi a'kwar_u pa'kapitu pi', Itepu_u ese' tesa'pi'se makoi a'kwar_u pa'ka i'se usi'tupi' ni pi' to' esi'pu. Ta to' uya, "Itepu_u Sises ese' yau, Paar_u itekareei nekaman_u pe na'ne', k_uri ri ese' yau epa'ka'," ta'pu to' uya.

14 7 kaisaron kon Su'kepa, use'man nito' Papa ena' tarawasomanin nan epuru pe te'sen munki amu' uya seri ku'pitu'pu.

15 E'tane, makoi a'kwaru uya to' maimu eiku'pu, “Sises si'tuyai', Paar u niri si'tuyai', e'tane inu' yan ken imiri'nokon?” tukai'.

16 Miri a'tai, ka'pon makoi a'kwaru yen pe te'sen e'sanamu'pu 7 kaisaron kon ka'pon amu' pona to' entai tenai', isi pe kuru ri to' wipitu'pu iya to' pon ton tukarapi'se, miripan kon ainamu'pu itiwu' tapai, man ennokoi'ma.

17 Seri etasa' Esuweru amu' miri awonsi'ki Kiri amu' tuku'mansan E'pe'sas po uya a'tai, ipan pe enari'ke' to' ena'pu. Miri a'tai, ipan pe kuru Itepu Sises ese' nama'pu to' uya imeruntiru wena'i.

18 Tu'kan kon Sises apurinin nan pe iyenasa' kon e'sara'ti'pu uye'ni pi', miripan kon uya tumakooi kon ekama'pu taron kon apurinin nan pana ya'.

19 Tu'kan kon piyai'san amu' eseru kupu pi' iko'mansa' kon uya tu'kan ni iri ekareei apon kareta amuranaku'pu, miripan po'tipitu'pu to' uya annau. Purata pe kareta ton epe' i'tu'pu to' uya a'tai, 50,000 kaisa ri sirupa pun† pe iyepa'ka'pu.

20 Seri wini Itepu Sises ekareei uti'pu miyari ri pata yau, miripan niri usemo'ka'pu merunti pe kuru.

Paaru E'kupu'pu Utin Pi' Surusiran Pona

21 Seri ton e'kupu'pu tupo, Paaru e'kama'pu utin pi' Surusiran pona, Ma'sitoniya miri awonsi'ki

† 19:19 *sirupa pun*—*tura'kuma*, Kiri' maimu yau. Seri purata pun esi tikin ni wai e'tarawasoman nu'pu epe'pu ta e'kwa pe iyesi'pu. Arune Ma'siu 20:2 enki.

A'kaya poro, “Surusiran pona tauti'pu tupo, uti kuru miri Ron pata pona,” ta'pu iya.

²² Asa'ron kon, Temu'ti miri awonsi'ki Erastas, tupa'kinin nan ennoko'pu iya tawapiya Ma'sitoniya pona inke ru'kwi pari iko'mamui'ma Eisa nono pata yau.

Usewa'noman E'pe'sas Po

²³ Miri a'tai, ipan ni anpokumanin e'sara'ti'pu Ite'ma awiron kon pi'.

²⁴ E'pe'sas po iyese'pu ka'pon, Temi'turiyas itese', ipareman Ara'times pi' iwa' ka'pi'nin sirupa ke, miripan tonpa ton uya eke pe kuru parata epopitu'pu.

²⁵ Temi'turiyas uya tatonpa ton ki'ma'pu, miri waraino ri mari itarawasooi ton to' pokon pe tusauro'to' pe. Ta'pu iya, “Mi'tuyatu pe' utonpa ton, seri utarawasooi kon ikupu na'ne' wini eke pe parata eporo uya'nokon?”

²⁶ Miyari ri ensa', etasa' auya'nokon E'pe'sas po riken pen, e'tane siya ri Eisa pata awiri, tu'kan kon ka'pon amu' uya apurito' pe Paarua uya iku'sa' ka'pon nakoneka'pu ipareman nito' ipi' pe esi papa pe para ri ta iya.

²⁷ Isi esi miri yau, miyari ri Paarua uya tato' apuri pi' ka'pon amu' esi a'tai, uri'nokon nukupanu enato' oton tnamasen pe para ri. Eke kuru uri'san papa tukai' tuku'sen Ara'times iwa' enato' oton ka'pon amu' enu yau para ri. Kamo ri niri ika'sa' pi' tawipuremasan Eisa pata awiri'ne, miri awonsi'ki non emu' kaisa ri niri inamato' para ri iyenato' oton,” ta'pu iya.

28 Seri ta Temi'turiyas uya eta tũuya'nokon a'tai, to' ena'pu sakoro' pe. Uki'pi'nũnpi' ni pi' to' e'sara'ti'pu, "Eke kũri ri papa tato' ipi' pe ika'sa', Arũ'times, ipũreman nito' kon ipi' E'pe'sas po!" tukai'.

29 Miri pe ri, eke utanpokũman esi'pu miri pata yau. Ka'pon amũ' uya Kayas miri awonsi'ki Aresta'kos a'si'pu, Paarũ upinimũ tonpa pe te'san. Miri a'tai, anpisin ka'pon amũ' enasa' tikin ni uya Kayas miri awonsi'ki Aresta'kos pi'sikũ'pu amũran nito' iwũ' ta'.

30 Miri a'tai, Paarũ esi'pu ka'pon amũ' anauro'kapai e'tane, Sises apurinin nan esi'pu iti i'se pũra.

31 Kamoro niri eke pata epuru ton, Paarũ mai'pũremu ton uya main ennoko'pu iti namai'.

32 Iyamũrasa' kon esi'pu isi pe uki'pi'nũnpi' ni pi'; tũron kon esi'pu tũron ni pe uki'pi'nũnpi' ni pi'; tũron kon niri, tũron ni pe ri. Miri yawon kon tu'kan kon ka'pon amũ' uya i'ri pe iyesi pi' to' amũrasa' miri yau tukai' i'tu pũra ri iyesi'pu.

33 Tũron kon Esuwerũ amũ' uya Arisanta itese' ka'pon a'tu'ma'pu amũran nito' iwũ' tau, ka'pon amũ' rau iye'mũ'sa'kato' pe. Tũron kon ka'pon amũ' anpisin koro'tau te'san uki'pi'nũmũ'pu Arisanta auro'ka pe. Arisanta uya temiyatũ anũmũ'pu, e'pana e'ti' ta tũuya e'kwa pe, tiwano' pe ri tũusaurokũ wenai.

34 E'tane Esuwerũ pe to' uya ito'ka'nũ'sa' a'tai, isaurokũ i'se pũra to' esi'pu. Tikin ni te'sepose to' uki'pi'nũmũ'pu asa' ite'kwa kũra' emiya era'tito' e'to' poro, "Eke kũri ri Arũ'times E'pe'sas pon kon iwano'!" tai'ma.

35 Pata karetaai menukapi'nin uya anpisin e'paka'nukupu. "E'pe'sas pon kon ka'pon amu! I'tu auya'nokon para pe' nai tanporo mi awiron pata uya i'tu E'pe'sas esi eke Ara'times pi' ipureman nito' iwu' erasu pe te'san pe tukai'? Miri niri ipe ika'sa' Epun wini ita'mo'kasa' erasuntinin pe e'ni'nokon tukai'.

36 Miri wenai, seri ton esi ke onamu poken para, e'pana iwe'to' kon pe iyese, tausenuminkai' para i'ri ri tuku'se para.

37 Seri uya ri pumasoro asa'ron kon ka'pon amu' ne'to' auya'nokon wenai pe para iyese'pu man. Ipureman nito' yawon ama'masa' miri awonsi'ki ika'sa' itese' pi' e'nito' pe pa'nu'sa' to' uya para iyese niri.

38 E'tane Temi'tariyas miri awonsi'ki ipureman nito' ku'pi'nin nan uya pata eseru main i'kwi'sa' pe iyese yau, seri rupi konekato' esi moro ri. Miri yau, konekanin nan eke ton esi. Miri yau, to' utito' pe iyese teseru kon konekai'.

39 E'tane miyari ri iri i'se iwesi kon yau, ikonekato' pe iyese pata eseru uya tasa' awiri.

40 Isi yau e'ni'nokon man, apune para Roman amu' uya uyekama'popitu kon miri seri pe ne'kupaine' pi'. I'ri wenai isi pe uki'pi'nunpi' ni esi'pu tukai', ekama ton para iye'tane miri wenai tukai'," ta'pu iya.

41 Seri ta'pu iya tupo, iyamura'sa' kon nin si ka'pon amu' ennoko'pu iya miri, miri apai.

20

Paaru Utipu Ma'sitoniya Miri Awonsi'ki Kiris Poro

1 Isi pe uki'pi'nunpi' ni ereutasa' tupo, Paarü uya tatonpa ton ki'ma'pü, miripan kon pori'mapitu tupo, Paarü uya, "Isiri utiyai," ta'pü to' pi', miripan uti'pü Ma'sitoniya pona, to' tuninse E'pe'sas po.

2 Miri awiri ri, iti'pü. Eke pe ri ka'pon amü' pori'ma'pü iya, tu'kan pi' ri, miripan uyee'pü Kiris* pona.

3 Miri yau, iko'mamü'pü osorüwau kapü. Iye'kama koro'tau kanau epotorü'pü yau utin pi' Siriya pona, Esuwerü amü' ekonekasa' eta'pü iya ipi' te'to' kon pe. Miri pe iyesi pi', iyekoneka'pü tenna'poto' pe Ma'sitoniya poro.

4 Iya'kiron kon esi'pü So'pa'tarü, Piros mu, Pereya winon; Aresta'kos, Sekuntos, Tesaroni'ka winon kon; Kayas, Terüpi winon; Tai'ki'kas, Turo'pimas, Eisa winon kon; Temu'ti niri.

5 Püsamoro warawo' amü' uti'pü ina rawiri to' esi'pü ina enupikiri Türowas po.

6 E'tane ina uti'pü kanau yau Piri'pai yapai A'sarutanü'sa' Pen Püreti Pi' Enta'nän Weyu tupo. 5 kaisa ri wüi tupo, ina e'seporo'pü taron kon a'kiri Türowas po. Miri yau, ina uko'mamü'pü 7 kaisa ri wüi.

Moine Eri'sa' Imü'sa'ka'pü Paarü Uya

7 Suntaaka e'sara'ti pe, ina amüra'pü püreti pi' enta'nai'. Paarü uya ka'pon amü' auro'ka'pü. Awanapai ri tütito' esi pi' isaurokü'pü anomüra' pona ri.

8 Miri yau, tu'ke raan'pu amü' esi'pü ka'tawon tau ina amürato' yau.

* 20:2 Kiris, miri pe püra A'kaya

9 Moine ka'pon ereutasa' esi'pu winto po, Iu'tai'kos itese'. Kuri ri e'nunpitu'pu, miyari ri Paarua usauroka koro'tau, miripan e'nankaa'pu ipan pe, nuta'mo'kai osoruwawon ikawono iuti apai. Miripan uma'tasa' anama'pu to' uya eke' pe.

10 Paarua u'ti'pu, miripan ena'pu ipuro'pona, temiyatu taru'pu iya iwoi, "Ipan pe kuru kisewankamatuu! Nurine ri man!" ta'pu iya.

11 Miri tupo kanan, ka'ta' iyenuku'pu pareti pi' enta'nai'. Pata tema'kwai' tusauroka tupo, iti'pu.

12 Ka'pon amu' uya moine ari'pu nurine. Ipan pe kuru pori' pe to' epori'masa' esi'pu.

E'pe'sas Epuru Ton Panama'pu Paarua Uya

13 Ina uti'pu kanau yau A'sos pona. Miri yau, Paarua ananse'na ina uti'pu. "Miri yau uyepotai'," ta'pu iya a'mun po tauti pi'.

14 Ina eposa' iya a'tai A'sos po, ina uya ari'pu Me'tirin pona.

15 Miri ema'sa' yau, ina uti'pu miri apai Kiyos pona. Miri tupo, ina e'kwiritu'pu Samos pona; miri ema'sa' yau, Mairi'tos eporo'pu ina uya.

16 Paarua e'ku'sa' esi'pu E'pe'sas entakato' pe tauya kanau yau, inke iko'manpai para iyessi'pu Eisa po. Surusiran inepopai isenuti'pu Penti'kas weyu a'tai.

17 Mairi'tos ponsi'ki, E'pe'sas so'sii epuru ton ki'ma'pu Paarua uya.

18 To' uya teposa' a'tai, ta'pu iya to' pi'; "Uko'mamu'pu eseru i'tu auya'nokon miri ipiyau'nokon Eisa po esi a'tai.

19 Itepuru apiyo' pe esi'pu se pe ri tenai', tukaranpi'se niri, sa'man pe ri Esuweru amu' uya ukota'ma tane.

20 I'tu auya'nokon miri, tanporo unekamanu ekama'pu uya ipika'tinin kon pe te'sen, iyenupa'pu uya 'nokon annau'ne ri, iiwu' kon tau'ne niri.

21 Enpoika'pu uya Esuweru amu', Kiri' amu' pi' niri tumakooi kon pi' to' usewankama era'tito' pe Papa winiki', Sises yau apurito' esa' pe to' enato' pe.

22 “Seri si Papa A'kwaru uya tapiyo'mai', uti si seri Surusiran pona, i'ri e'kupu upi' miri yau tukai' i'tui'ma para.

23 Se riken i'tu uya tanporo pata yau'ne Waku A'kwaru uya upana'ti. Miri yau, pariki'si ta' uya'sito', miri awonsi'ki sa'man ni e'ku'to' esi upi'.

24 E'tane usewankama para ri iyese uwinin nan pi', uturawasooi inku'pai esi Itepuru Sises naturu'pu iku'to' pe uya uturawasooi, tanporon kon pi' Papa uya waku nonkasa' ekareei ekamato' uya.

25 “Si'tuyai' imiri'nokon seri itekare, Papa e'to' esa' wanni pe ekama'pu uya ipana ya' ton uya uyento' oton pen seri enta'.

26 Miri pe iyese pi', ekama uya ipi'nokon seri pe; makoi para esi tanporon kon ka'pon amu' manu piyapai.

27 Tanporon ni Papa e'to' i'tu auya'nokon i'se ekamasa' uya man. I'ri ri Papa Maimu nonkasa' uya para iyese.

28 Waku pe epa'simati', tanporo itonpa kon amu' ri pokon pe, Waku A'kwaru uya iku'sa' kon na'ne'

to' ennin pe. Papa apurinin nan[†] ennin pe e'ti', Sises ne'ma'pu tumunu ke.

²⁹ Si'tuyai', kasi ton enupanin nan uye'to' oton isi ton ene amu' kasa i'koro'ta'nokon. Kurai apurito' apai to' ereutanu'to' oton to' uya.

³⁰ I'koro'tapai'nokon ni to' e'mu'sa'kato' oton, itekare ensimato' oton to' uya, Sises apurinin nan era'tito' oton to' pikiri.

³¹ Miri pe iyesi pi', ti'tui' e'ti'. Mi'tuyatuu pe osoruwau wuipiya tereutapi'se para ayauro'ka kon pi' uko'mamu'pu ewarupi nau, wai nai niri tukaranpi'se.

³² “Seri pe inonka uya 'nokon Papa ena', waku nonkasa' iya maimu ya', imiri'nokon ku'nin apurinin pe ya'. Miri a'tai, iwe'to' oton kon Papa na'ne' yau tu'kan ni waku ton epoto' auya'nokon, Papa nekama'pu tumunki amu' pi'.

³³ Inu' ri sirupaai, koruu ri, pon ni enkuui pe esi pun.

³⁴ I'tu auya'nokon ni miri uiwano' pe ri e'turawasomapi'sa' purata eporo pi' i'se e'to' eporo pi', utonpa ton e'to' i'se niri.

³⁵ Tanporo unkuunu wini, sa'man turawaso kupu'pu uya wini, iyenupasa' uya 'nokon ipurataai punon kon pika'tinin pe e'nito' pe. Sises uya se kasa ta'pu iku'ti' iyenu kon yau, 'Waku pe kuru iyesi te'repasan pe e'ni a'tai, tarepasan pe e'ni entai,' ” ta'pu Paar uya to' pi'.

³⁶ Seri ta tupo, iye'sekunka'pu tanporon kon pokon pe iyiprema'pu.

[†] **20:28** *Papa apurinin nan—Papa so'sii.* Taron ni imenukasa' ton, Itepuru Sises so'sii, tawon esi.

³⁷ Tanporo to' ukaramu'pɛ ipi' tɛuta'sii', to' uya a'su'ka'pɛ niri.

³⁸ “Seri enta' uyene auya'nokon pen,” ta iya pi', to' upokoita'pɛ. Eke kanau ya' ipikiri to' uti'pɛ.

21

Paarɛ Uti'pɛ Surusiran Pona

¹ To' piyapai ina emo'ka'pɛ tɛpo, ina uta'tu'ma'pɛ parau po. To'sa ri ina uti'pɛ Kos pona. Iyema'sa' yau, ina uti'pɛ Rotes pona; miri apai, ina uti'pɛ Pa'tara pona.

² Kanau epotoru'pɛ ti'kwiri'sen eporo'pɛ ina uya Pini'siya po. Miri ya', tekanwa'tii' ina uti'pɛ.

³ Sai'pɛaras ene tɛuya'nokon tɛpo, ina uya entaka'pɛ wɛi enu enuku kamisi winikɛi'. Ina uti'pɛ Siriya pona. Ina ekanwaka'pɛ Taya pona, apuru kanwaka to' uya koro'tau.

⁴ Sises apurinin nan eporo'pɛ ina uya. 7 kaisa ri wɛi ina uko'mamu'pɛ to' piyau. Iya'kwarɛ uya to' pana'ti'pɛ Paarɛ auro'kato' pe to' uya iti namai' Surusiran pona.

⁵ Ina weyu u'ma'sa' a'tai to' piyau ina e'to', ina uya to' nimi'pɛ, tanporo Sises apurinin nan, to' no'pɛ ton, to' munki amɛ' niri uti'pɛ ina a'kiri eke pata apai. Miri yau, tuna e'pi po ina e'sekunka'pɛ ipɛreman pi'.

⁶ “Iisiri'nokon,” ta tɛpo tɛtonpa kon amɛ' pi', ina ekanwa'ti'pɛ kanau epotoru'pɛ ya'. Tɛron kon enna'po'pɛ tɛpata kon ya'.

⁷ Miyari ri utin pi' ina esi'pɛ Taya apai. Ina ekanwaka'pɛ Toremes pona. Miri yau te'san ina

tonpa ton pi', "Miyari," ta'pu ina uya. To' piyau ina uko'mamu'pu tikin ni wai.

⁸ Iyema'sa' yau, ina uti'pu Sisariya tepose. Miri yau, ina uti'pu Piri' itekare ekamanin iwai' ta' ipiyau e'se'na, Surusiran po 7 pe to' nanamu'san tonpa pe te'sen.

⁹ Asakiri'nan kon a'pi'pu non itensi ton esi'pu pu'kena' pe itekare ekamanin nan.

¹⁰ Miri yau inke kuru pu'ra ri ina esi'pu tu'po, pu'kena' Akapas itese' uyee'pu Isutiya wini.

¹¹ Uyee'pu ina piya', Paaru pokuru'ni anamu'pu iya, temiyatu miri awonsi'ki ti'ta auromu'pu iya, se tai'ma: "Waku A'kwaru man se kasa ta pi', 'Seri pokuru esa' auronpi'to' oton Esuweru amu' uya Surusiran po, miripan tu'to' oton to' uya Esuweru amu' pen ena',' " ta'pu iya.

¹² Seri etasa' ina uya a'tai, ina miri awonsi'ki ka'pon amu' miri awon kon uya Paaru temeku'pu iti namai' Surusiran pona.

¹³ Miri a'tai, Paaru uya to' pi' ta'pu, "Tri pe iyese pi' aukaramu kon uyewan ni tu'pokoitanu'se? Ekonekasa' seri uya'sito' pe riken pen e'tane uma'tato' pe Surusiran po Itepuru Sises ese' wenai!" ta'pu iya.

¹⁴ Ina uya tauro'ka eta iya pu'ra iyese wenai, ina uya inonka'pu. "Tiwi Itepuru e'to' i'se ne'kupai i'se iye'to' awiri," ta'pu ina uya.

¹⁵ Miri yau tesi kon tu'po, tekonekai' ina uti'pu Surusiran pona.

¹⁶ Sises apurinin nan Sisariya winon kon uti'pu ina a'kiri, miripan kon uya ina ari'pu Nasu' itese'

ka'pon iwu' ta'. Miri yau, ina uko'mamu'pu ipiyau. Sai'puras winon pe iyesi'pu, pena si'kiri ri Sises apurinin pe iyesi'pu.

Paaru Epa'ka'pu Surusiran Pona

17 Surusiran eposa' ina uya a'tai, ina tonpa ton uya ina ereutanaku'pu tepori'ma kon pe.

18 Miri ema'sa' yau, Paaru a'kiri ina uti'pu Isens ense'na. Tanporo so'si epuru ton esi'pu miri yau.

19 “Miyari,” ta tupo to' pi', Paaru uya tanporon Papa nukupu'pu pi' Esuweru amu' pen koro'tau te'tarawasoma a'taino pi' to' auro'ka'pu.

20 Seru etasa' to' uya a'tai, Papa apuripitu'pu to' uya. Ta'pu to' uya Paaru pi', “Ina tonpa, tu'kan kon Esuweru amu' man Itepuru Sises apuri pi'. Tanporon kon man ipan pe Main, Mosi' winon apuri pi'.

21 Turon kon ka'pon amu' uya to' auro'kasa' esi'pu imiri pi' tanporo Esuweru amu' enupasa' auya Esuweru amu' pen koro'tau tukomansan to' ereutato' pe Main, Mosi' winon piyapai to' auro'ka'pu auya, tamunki kon yun pi'pi puturaka to' uya namai', uri'nokon eseru awiri.

22 Iri ken si kupu uya'nokon? To' uya kuru eta miri iuye'sa' tukai'.

23 Miri pe iyesi pi', ayauro'kato' awiri e'ki. Miri yau man asakiri'nan kon ka'pon amu' Papa auro'kanin nu'san tanku'ton kon pi'.

24 Pusamoro ka'pon amu' aki to' ekorukato' pe to' pokon pe mekorukai'. To' i'pai kiriri'pi'nin nan, to' ekorukasa' ekamanin pe, me'mai'. Miri a'tai, tanporon kon uya i'tuto' pe i'napai ri para

ri ipi' usauro'nisa' na'ne' esi tukai', e'tane main pūreme'nin pe pūra ri iwesi tukai'.

²⁵ Ina uya nin Esuweru amū' pen enasa' Sises apurinin pe ena' imenukasa' man. Ina e'ku'sa' man ika'sa' ena' itusa' pi' to' enta'na namai', to' enta'na namai' munu'pan ni o' pi' miri pe pūra erupatu'kasa' pi' ri, miri awonsi'ki tekumasan pe to' esi namai'," ta'pu to' uya.

²⁶ Miri ema'sa' yau, Paarū uya ka'pon amū' ari'pu to' pokon pe iyekoruka'pu. Miri tupo, iti'pu Papa ena' Esuweru amū' use'mato', ipūremato' iwū' ta' to' auro'kase'na, ekorukan nu'pu weyu u'ma'to' pi', tanporon kon use'mato' ike ekonekato' oton pi' to' kaisa ri.

To' Uya Paarū A'si'pu

²⁷ 7 kaisaron wūi u'matu iwa koro'tau, Eisa winon kon Esuweru amū' uya Paarū ene'pu Papa ena' Esuweru amū' use'mato', ipūremato' iwū' tau. Anpisin tuturunkai' Paarū a'sito' pe to' uya ikuu'pu.

²⁸ To' uki'pi'nunpitu'pu, "Esuweru amū', ina ipika'titi! Pūse ri si ka'pon mi yawiron kon tanporo ka'pon amū' enupanin, uri'nokon Esuweru amū' use'mato', ipūremato' iwū', miri awonsi'ki Main, Mosi' winon ewa'nomanin. Miri pona, Kiri amū' ne'sa' iya Papa ena' use'man nito', ipūreman nito' iwū' ta', waku pata ma'tanu'se'na," ta'pu to' uya.

²⁹ (Turo'pimas ene'pu to' uya E'pe'sas pata winon Paarū a'kiri, to' usenuminka'pu Paarū uya ine'sa' use'man nito', ipūreman nito' iwū' ta' tukai'.)

30 Tanporo pata pon kon utaipo'pu. Tanporo pata kaisaron kon eka'tunsa' uyee'pu. Paarū pi'siku'pu to' uya use'man nito', ipareman nito' iwū' tapai. Miri pe ri, mura'ta a'koro'pu to' uya.

31 Iwini i'se to' esi koro'tau, main uya Roman amū' soisaa' epuru eporo'pu eke pe Surusiran pata pon kon utai'pon pi' man tukai'.

32 Inke pu'ra soisa amū' anūmū'pu iya. To' eka'tumū'pu tu'kan kon koro'ta'. Roman amū' soisaa' epuru miri awonsi'ki soisa amū' ensa' to' uya a'tai, iwipitu' tūuya'nokon ereutanū'pu to' uya.

33 Eke soisa amū' epuru uya a'si'pu. "Asa'ri i'sen ke auronti'," ta'pu iya. Miri a'tai, to' ekama'po'pu iya, "Inū' pe iyese? I'ri ku'sa' iya?" ta'pu iya.

34 Tu'kan kon uki'pi'nūnpitu'pu taron ni pe'ne, waku pe i'napairon eporo iya pu'ra eke soisa amū' epuru esi'pu, eke pe to' uki'pi'nūnpitu' wenai. "Soisa amū' iwū' ta' Paarū ati'," ta'pu iya.

35 Paarū uya miye' eposa' a'tai, tu'kan kon e'sakoropasa' esi'pu ipan pe. Miri pe iyese pi', soisa amū' uya ari'pu tūra'runpai'.

36 Anpisin ipikiri te'san uki'pi'nūnpitu'pu, "Iwiti' ri!" ta'pu to' uya.

Paarū Uya Anpisin Auro'ka'pu

37 Paarū ari to' uya koro'tau soisa amū' iwū' ta', eke soisa amū' epuru ekama'po'pu iya, "Apu'ne, kanyauro'kai'ya," ta'pu iya.

"Kiri' pe pe' tūsauro'sen imiri?" ta'pu soisa amū' epuru uya ipi'.

38 “Isi' pon pen pe' imiri manenpanin sara'tinin nu'pu, 4,000 kaisaron kon winin nan anin nu'pu rimono' ta' pena?” ta'pu iya.

39 Paar_u uya eiku'pu, “Esuwer_u uri, Tar_usas, Siri'siya yawon yau iyentusa' ru'pu, patawon kanan uri ti ekasiman pen yawon. Ap_une, ka'pon am_u' sauro'kai'ya,” ta'pu iya.

40 Eke soisa am_u' epuru uya, “Ewai',” ta'pu tu'po, Paar_u e'mu'sa'ka'pu miye' pona, “E'pana e'ti'!” ta'pu iya temiyatu ke. Tanporo to' e'paka'sa' a'tai, ta'pu iya to' pi' Esuwer_u am_u' maimu yai.*

22

Paar_u Usaurok_u'pu Sises Pikiron Pe Tena'pu Pi' (Inkup_u'pu 9:1-19; 26:12-18)

1 “Utonpa ton, ukup_unu ton, ap_une uyetati' usekama tane!” ta'pu iya.

2 Arami' pe isaurok_u eta to' uya a'tai, e'pana pari to' ena'pu. Paar_u uya ta'pu miri a'tai,

3 “Esuwer_u uri, iyentusa' ru'pu Tar_usas, Siri'siya yawon yau, e'tane seri yau usemo'ka'pu. Kamariyer_u piyau usenupa'pu ukup_unu kon nukoneka'pu Main pi'. Ipan pe Papa apuri pi' seri pe iwesi kon na'ne' kasa.

4 Seri wenai, Ite'ma awiron kon kota'mapitu'pu uya to' wito' pe to' ne'pitu'pu uya. Warawo' am_u', uri'sami'si am_u' niri a'sipitu'pu uya pariki'si ta'.

5 Miri kasa ri niri, Papa ena' use'man nito' turawasomanin nan miri awonsi'ki Kons_uru am_u' uya ta' miri, kareta ri sepopi'tai to' wini Tamaskas

* **21:40** Esuwer_u am_u' maimu yai, miri pe pu'ra Arami' pe; Ma'siu 22:2 yau niri. **22:3** Inkup_u'pu 5:34-39

awon kon to' tonpa ton ena' tautisen. Miri ya' ri, utipitu'pu ka'pon amu' ne'se'na a'sisa' pe to' ari pi' Surusiran pona to' kota'mato' pe.

6 “Wui nai pata esi koro'tau, a'ko pe Tamaskas eporo uya koro'tau, ite'kwanau para ri, Epun wini a'kwa e'wei'ti uya uyenkasi'panuku'pu.

7 Uta'mo'ka'pu non pona, main eta'pu uya, 'Saaru, Saaru, i'rito' pe ukota'ma auya?' tawon.

8 “Inu' imiri, Uyepuru?’ tukai' ekama'po'pu uya.

“Sises uri, Nasare' winon, makota'mayai'ne', ta'pu iya.

9 Uya'kiron kon uya a'kwa ene'pu e'tane, uyauro'kanin eta to' uya para iyessi'pu.

10 “Tri kupu uya seri, uyepuru?’ tukai' ekama'po'pu uya.

“E'mu'sa'ka', enta Tamaskas pona. Miri yau, tanporo inkupunu ke ayauro'kato' pe,' ta'pu Itepu uya.

11 Uya'kiron kon uya uyari'pu uyemiyatu pi' Tamaskas pona, apune para a'kwa uya uyenkasi'panu'sa' pi' itenu para uri tuku'se.

12 “Ananayas itese' ka'pon uyee'pu uyense'na, miri yawon kon Esuweru amu' nunamanu pe kuru iyessi'pu, ipan pe Main, Mosi' winon ikonekasa' awiron pe iyessi'pu.

13 Iye'mu'sa'kasa' esi'pu upiyau, 'Utonpa, Saaru, ennin pe kanan enaki!' ta'pu iya upi'. Miri pe ri, ennin pe ena'pu.

14 Miri a'tai, ta'pu iya, 'Papa, ukupunu kon esi'pu itese' pi' uya ayanansa' man, teseru i'tunin pe

iwesi pa, Ipokena' Pe Te'sen inanamupu ene pa, inta winon imaimu etanin pe iwesi pa.

15 Tanporon kon ka'pon amu' pi' inene'pu miri awonsi'ki ineta'pu ekamanin pe iwesi pa.

16 I'ri enupikiri iwesi? E'mu'sa'ka', epa'taisima', amakooi ekorukato' pe ipuremakı Sises pi', ta'pu Ananayasa uya upi'.

17 “Surusiran pona enna'posa' a'tai, ipurema koro'tau use'man nito', ipareman nito' iwu' tau, uyenu uta'kwakasa' uya ene'pu.

18 Itepuru uya uyauro'ka, 'Inke para enta Surusiran apai, apune para to' uya upi' ausauro'to' apuri para iyese miri,' ta'pu iya upi'.

19 “Uyepuru, pasamoro uya ui'tu miri usenupan nito' iwu' kaisa ri utipi'sa', to' a'sipitu pi' pariki'si ta', to' wipitu pi' kamoro ayapurinin nan.

20 To' uya niri i'tu Si'tipun, itekare ekamanin pe te'sen manu uti a'tai, e'mu'sa'kasa' esi'pu miri yau iwiti' ri ta pe iwinin nan pon esa' pe esi'pu,' ta'pu uya Itepuru pi'.

21 “Miri a'tai, Itepuru uya ta'pu upi', 'Enta, iyennoko uya inni Esuweru amu' pen koro'ta,' ta'pu iya,” ta'pu Paarū uya to' pi'.

Roman Pe Paarū Esi

22 Anpisin uya Paarū maimu eta'pu miri ta iya pu'ku pona ri. Miri a'tai, to' uki'pi'nunpitu'pu, “Iwika'ti' kuru ri! Iko'manto' para ri iyese miri!” ta'pu to' uya.

23 To' uki'pi'nunpitu'pu ri kanan, tapon kon mo'kapitu'pu to' uya, non ma'kiri'pu to' uya ka'ta'.

24 Eke soisa amu' epuru uya, "Paaru ati' soisa amu' iwu' ta'," ta'pu tu'poitoru ton pi'. To' auro'ka'pu iya to' uya ari'po'pi'to' pe, isekamato' pe i'ri wenai to' uki'pi'nunpitu ewa'noma pe, tukai'.

25 Itemekon a'sipi'sa' to' uya esi'pu ari'po'pi'tane, Paaru uya ta'pu itepuru e'mu'sa'kasa' pi' miri yau, "Iye'to' pe ri pe' iyesi Roman pe te'sen ari'po'pitu a'tai inu' uya ri iri iteseru eposa' pu'ra iye'tane?" ta'pu iya.

26 Soisa amu' epuru uya seri etasa' a'tai, iti'pu eke soisa amu' epuru piya' ekamase'na, "I'ri kupu auya? Roman pe sa'ne man ko!" ta'pu iya.

27 Eke soisa amu' epuru uti'pu Paaru ekama'pose'na, "Uyauro'kaki, Roman amu' karetaai esa' pe' imiri?" ta'pu iya.

"Ewai'," ta'pu Paaru uya.

28 Miri a'tai, eke soisa amu' epuru uya ta'pu, "Eke pe pu'rata ke tu'use'mai' iyenasa' ru'pu uri kamoro Roman amu' tonpa pe," ta'pu iya.

"E'tane, entu'pu si'kiri nin usanon uya ukare-tai'ti'pu to' tonpa pe e'to' pe," ta'pu Paaru uya.

29 Kamoro ekama'popitu pi' te'san utama'pu ipiyapai miri a'tai ri. Soisa amu' epuru enari'nunmu'pu, Paaru, Roman pe te'sen auronpi'sa' tu'uya pi' i'sen ke.

Paaru E'wa'kutu'pu Esuweru Amu' Konsurumu Ton Rau

30 Soisa amu' epuru esi'pu ini'tupai i'ri pi' Esuweru amu' uya, iri ku'sa' Paaru uya ta, tukai'. Miri pi', itepuru uya soisa amu' apiyo'ma'pu Paaru auronpi'sa' ara'ka pi', miri awonsi'ki use'man nito' tu'rawasomanin nan epuru ton eke ton kuru miri

awonsi'ki tanporo Esuweru amu' Konsuruui ton kanan amurato' pe amuran iwu' ta' ekama'pu iya, miripan kon amura'pu. Miripan itepuru uya Paarū nee'pu to' amurasa' koro'ta', miripan uya iye'mu'sa'kato' pe ikupu'pu to' rau.

23

¹ Paarū uya to'sa ri Esuweru amu' Konsuruui ton enpitu'pu, miripan uya ta'pu, “Utonpa ton Esuweru amu', uko'mamu koro'tau, Papa nama pi' e'sa'man, miri awonsi'ki si'tuyai' i'ri ri iri ku'sa' uya pu'ra ri iyesi, seri pu'ku pona ri,” ta'pu iya.

² Use'man nito' turawasomanin nan epuru, Ananayas uya etasa' a'tai, ipiyau iye'mu'sa'kasa' kon apiyo'ma'pu iya, to' uya Paarū inta'moto' pe.

³ Miri tupo, Paarū uya ta'pu Ananayas pi', “Papa uya ikota'ma miri, waku pe tausensen, miri ku'sa' auya pi'. Main, Mosi' winon awiri miri airi iyereutasa' uya uyekama'popitu, e'tane iyawiri pu'ra iwesi, ka'pon amu' mapiyomayai'ne' to' uya unta'mopi'to' pe,” ta'pu iya.

⁴ Paarū piyau iye'mu'sa'kasa' kon uya, “Miri kasa iri pe ri Papa ena' use'man nito' turawasomanin nan epuru pi' ta auya pu'ra iyesi miri,” ta'pu.

⁵ Paarū uya to' maimu eiku'pu, “Use'man nito' turawasomanin nan epuru tukai' i'tusa' uya pu'ra man, utonpa ton. Mosi' numenuka'pu yau, 'fri pe kasauroku' ka'pon amu' esa' pe te'sen pi' tawon ni,* i'tunin uri e'tane,” ta'pu iya to' pi'.

⁶ Paarū uya to' Konsuruui amu' ene'pu Satu'si amu' pe miri awonsi'ki Pari'si amu' pe, eke pe

isauroku'pu konsuru amu' koro'tau, “Utonpa ton, Pari'si amu' tonpa sa'ne uri ko, Pari'si mu ri. Seri ekota'mato' yau esi iyeri'sa' kon e'mu'sa'kato' oton tukai' i'tu uya wenai!” ta'pu iya.

⁷ Seri tasa' iya a'tai, Pari'si amu' miri awonsi'ki Satu'si amu' e'sei'pitu'pu tatonpa kon pokon pe.

⁸ (Satu'si amu' uya, iyeri'sa' kon e'mu'sa'ka para ri iyese, inseru amu' para ri iyese, a'kwaru'san para ri iyese ta, e'tane Pari'si amu' uya moro ri iyese, to' ri esi ta.)

⁹ Pari'si amu' miri awonsi'ki Satu'si amu' ena'pu isi pe to' e'sei'pitu'pu. Main pi' enupanin nan esi'pu Pari'si amu' pe, miripan kon uya Satu'si amu' ei'pitu'pu ipan pe, “I'ri ri iri ku'sa' puse ka'pon uya eposa' ina uya para man! A'tai para inseru miri pe para a'kwaru ri uya auro'kasa', miri kasa ri Papa ekareei ekamato' pe iya!” ta'pu Pari'si amu' uya.

¹⁰ To' e'sei'pi'to' ena'pu isi pe, miripan pi' eke soisa amu' epuru enari'namu'pu Paarü ri na'ki karapitu to' uya ko tukai'. Miripan uya soisa amu' apiyo'ma'pu Paarü enpa'kato' pe to' uya to' piyapai soisa amu' iwu' ta'.

¹¹ Miri ewarupiii tau, Itepuru Sises uyee'pu Paarü piya', miripan uya ta'pu, “Kenari'namuil! Seri yau, Surusiran po uyekareei ekamasa' auya man, miri na'ne' kasa ri mari Ron po uyekareei mekamai',” ta'pu iya.

Esuweru Amu' E'kama'pu Paarü Wini Pi'

¹² Miri ema'sa' yau, Esuweru amu' usauroku'pu i'ri kasa Paarü wito' pe tukai', miripan kon

e'kama'pu, "I'ri ri ensi pen miri awonsi'ki uta're'tin pen iwini pu'ku pona," ta'pu to' uya.

13 40 entaino kon ni e'kama'pu seri kupu pi',

14 miripan kon uti'pu use'man nito' tarawasomanin nan epuru ton eke ton kuru miri awonsi'ki Esuweru amu' epuru ton piya', "Ina e'kamasa' man, i'ri ri pi' uta're'tin nito' pe para Paarü wini pu'ku pona ri tukai'.

15 Miri pi', imiri miri awonsi'ki Konsuru amu' uya main ennoko i'se ina esi, eke soisa amu' epuru ena' Paarü enpa'kato' pe iya, ipokon pe asauru'pai kanan ina esi tukai', apune para ina uya Paarü ekama'popi'to' esi tukai', itepuru mauro'katui'. Ina e'kama tane iwini pi' iyepu koro'tau," ta'pu to' uya.

16 E'tane Paarü parusi mare uya etasa' a'tai, iti'pu soisa amu' iwu' ta' Paarü piya', ipana'tise'na iwini pi' to' e'kamasa' ekamai'.

17 Paarü uya etasa' a'tai, tikin ni soisa amu' epuru tonpa ki'ma'pu iya. "Puse ri warawo' mare aki soisa amu' epuru piya', apune para inekamanu esi moro," ta'pu iya.

18 Miripan uya Paarü poitoru ari'pu soisa amu' epuru piya'.

"Paarü uya uyennosa' ipiya', puse ri moineri'pi nekamanu esi pi'," ta'pu iya.

19 Miripan soisa amu' epuru uya ari'pu tapiya' miri awonsi'ki, "I'ri na'ki esi inekamanu upi'?" ta'pu iya.

20 "Ewai', Esuweru amu' epuru ton e'kamasa' iyekama'po pi' Paarü enpa'ka pa, Esuweru amu' Konsuruhi ton ena'. Miripan kon uya tato' oton

ina esi waku iwa pe inekama'popi'pai tukai', e'tane i'napai ri para miri esi.

²¹ Miri pi' to' uya iyekama'posa' a'tai, to' maimu kusetai, arune para 40 entai ri Esuweru amu' esi, miripan kon e'so'nansa' enuri'to' oton Paarū enupikiri. 'I'ri ri pi' uta're'tin pen miri awonsi'ki ensi pen, Paarū wini pu'ku pona ri,' tasa' to' uya. Miripan kon nin si enuriku i'ri ri tukai' tumaimu kon eiku auya i'se," ta'pu Paarū poitoru uya soisa amu' epuru pi'.

²² Soisa amu' epuru uya, "Seri upana'tisa' auya na'ne' kusekamai inu' pi' ri," ta'pu, miripan enoko'pu iya tūpiyapai.

Paarū Ennoko'pu To' Uya Kopuna Piya'

²³ Miripan soisa amu' epuru uya asa'ri tūpoitoru ton auro'ka'pu, "200 kaisa ri soisa amu' epoti' Paarū a'kiri to' utito' pe, miri awonsi'ki 70 kaisa ri kaware pon kon miri awonsi'ki 200 kaisa ri piriu tawon kon Sisariya pona to' utito' pe 9 a'kura' ewarupi nau.

²⁴ Waku pe kopuna Piri'kus epoto' pe Paarū uya, itikun non ipo itito' ton kaware amu' minepotai," ta'pu soisa amu' epuru uya tūpoitoru ton pi'.

²⁵ Soisa amu' epuru uya kareta menuka'pu se kasa:

²⁶ "Ina kopunaai, ina nūnamanu, Piri'kus, miyari ta uya ipi'.

"Uri, Kurautiyas Raisayas uya imenuka.

²⁷ "Puse ri ka'pon enno'sa' uya man ipiya', Esuweru amu' na'si'pu, miripan kon esi inwipai, e'tane usoisaai amu' uya imo'kasa' Roman amu' tonpa pe ri iyesi tukai' ito'ka'nū'sa' uya pi'.

28 Into'ka'nu'pai esi i'ri pi' Esuweru amu' uya iri ku'sa' iya ta tukai'. Miri pi', Esuweru amu' Konsurui ton ena' ari'pu uya to' uya ekama'popi'to' pe.

29 E'tane i'ri ri eposa' uya para iyese iwito' iwenai, miri awonsi'ki a'sito' pariki'si ta', miri awonsi'ki main tausenupato' kon pi' ri nin to' uya eseru'ti.

30 Esuweru amu' e'kamasa' Paaru wini pi' ke upana'tisa' ka'pon uya a'tai, ennoko pi' e'kama'pu ipiya'. Esuweru amu' kanan auro'kasa' uya man to' utito' pe Sisariya pona inkuu'pu ekamato' pe to' uya ipi'. Seri seri kareta, uri itepuru," ta'pu iya.

31 Soisa amu' uti'pu itepuru uya tauro'kato' kon awiri ri, miri awonsi'ki kareta ari'pu to' uya ta'kiri'nokon. Paaru ari'pu to' uya ta'kiri'nokon ewarupi nau pata Antipateres pu'ku pona ri.

32 Miri ema'sa' yau, ti'ta kon po tautisan soisa amu' enna'po'pu Surusiran pona taron kon kaware pon kon soisa amu' uti tane Paaru a'kiri Sisariya pata ya'.

33 Kaware pon kon soisa amu' uya Sisariya pata eposa' a'tai, kareta miri awonsi'ki Paaru taru'pu kopuna ena', miripan kon enna'po'pu Surusiran pona.

34 Kopuna uya kareta ene tupo, Paaru ekama'po'pu iya, "I'ri eke Roman amu' pata winon imiri?" tukai'.

"Siri'siya winon uri," ta'pu Paaru uya.

35 "Iyekaree ri eta uya miri iri ku'sa' auya tawon nan uye'sa' a'tai," ta'pu kopuna uya. Kopuna uya

soisa amu' auro'ka'pu Paaruu ato' pe to' uya Era' iwu' ta', miri awonsi'ki soisa amu' e'to' pe iterasu pe.

24

I'tuto' Piri'kusu Piyau

¹ 5 kaisaron wui tupo, use'man nito' turawasomanin epuru, Ananayas uti'pu Sisariya pona Esuweru amu' epuru ton miri awonsi'ki raya Ti'turas itese' pokon pe. Miripan kon uya Paaruu eseru'tito' tuuya'nokon nepu'pu kopuna piya'.

² Paaruu ki'masa' a'tai si, Ti'turas uya si Paaruu eseru'tito' tuuya'nokon ekama'pu miri Piri'kusu pi'. Ta'pu iya, "Kopuna Piri'kusu, waku pe ri, tuusewankamai' para, inke ri ina ko'manu'sa' auya man. Pata eseru ri koneka'pu auya waku pe uko'man nito' yau pe, waku i'tu auya wenai ina epuru pe iwesi koro'tau.

³ Siya ri, mi awiri ri, eke ri waku ri Piri'kusu, tewan kon yapai kuru ina uya ekama seri, pori' pe ina man inkupu'pu ina iwano' pe pi'.

⁴ Okoro' pen ni ina nekamanu eta pa waku pe iyewan taku'se, ina uya iyekama'po.

⁵ "Puse ri ka'pon to'ka'nu'sa' ina uya man, waku pe para ri uko'man ni emapu'tinin pe, tutonpa ton Esuweru amu' epanta'mato' pe to' turunkapi'nin pe siya ri pata kaisari ri. Puse ri ka'pon esi Nasare' pon eseru ru'pu pi' te'san epuru,

⁶ miri awonsi'ki ina, Esuweru amu' use'mato', ipuremato' iwu' ri ma'tanuku iya tukai' ri isauroku.

Miri pe iyesi pi', ina uya ereutanu'sa' ikupu iya namai'.*

⁸ Imiri pe ri i'tu auya miri iwinipai i'napairon pe ipi' ina usauro'sa' tukai," ta'pu iya.

⁹ Esuweru amu' pokon pe te'sepose, "I'napairi ri seri ton esi," ta'pu to' uya.

*Piri'kusu Uya Paarua Ekama'popi'to'
Ereutanukupu*

¹⁰ Kopuna uya si isauro'to' pe iku'sa' a'tai, Paarua uya eiku'pu, "Si'tuyai' pena ri seri pata yawon kon eseru aimenka pi' iuko'mamu'pu tukai'. Miri pi', pori' pe kuru esii'ma usekama seri.

¹¹ Sa'man pe pura ri uyekama'poto' auya ipi' to'ka'nuku auya miri. Pena kuru pura ri 12 kaisari ri wai Surusiran pona ipuremai' uti'pu yapai.

¹² Esuweru amu' uya uyeposa' pura ri iyese e'sei'pi' ni pi' inu' ya' ri ina use'mato', ipuremato' iwu' tau. Miri pe pura, ka'pon amu' ri turunkasa' uya pura iyese iri ku'to' pe to' uya ina usenupato' tau, miri pe pura mairi ri pata yau.

¹³ To' nekama ton pura ri iyese to' uya uya'sito' ipikiri.

¹⁴ E'tane pura ri ta uya: tanporon kon ina tamokori ton e'to' itese' pi' Papa riken apuripi'nin uri, i'napairon pen nikayai'ne' to' Ite'ma yawiri te'sen uri, tanporon ni sapuriyai' main, Mosi' winon miri awonsi'ki pu'kena' amu' numenuka'pu.

* **24:6** Taron ni imenukasa' ton uya v. 6b-8a ke iponantisa' se kasa: *Seri tupo, usenupan nito' main uya ekamasa' na'ne' yawiri, 7 e'tane eke soisa amu' epuru Raisayas uyee'pu. I'se'ne' pe Paarua mo'ka'pu iya ina enapai. 8 Tiwi si ipi' tusauro'san nyuperi' ipiya'.*

15 Kamoro esi'pu kasa Papa sapuriyai' Papa uya i'ma'sa'kan nito' oton uruwai' yapai, ipokena' ton miri awonsi'ki iri ton.

16 Miri pe iyese pi', waku pe uyewan kupu i'se te'sen uri Papa winikui' miri awonsi'ki ka'pon amu' winikui' niri.

17 “Emennu'pu ri Surusiran pona uye'sa', utonpa ton entu'manin nan parataai oton tase'na, miri awonsi'ki ise'mase'na ina use'mato', iparemato' iwu' ta'.

18-19 I'ri para ri iyekorakasa' pe esii'ma un-kupunu kupu uya koro'tau Esuweru amu' Eisa nono winon kon uya uyeporo'pu. To' uya uyeporo'pu Esuweru amu' use'mato', iparemato' iwu' tau, anpisin para ri uya'kiri, iri pe ri e'nito' ku'sa' uya para ri iyese. To' uye'sa' nin si ipiya' nesii'no uri nukupu'pu ekamase'na ipi'.

20 Miri pe para, pusamoro uya ri niri ta e'pai man iri unku'pu'pu pi' Esuweru amu' Konsurui ton piyau esi a'tai.

21 E'tane para ri, e'se'ne' pe riken umaimu turu'pu uya to' koro'tau: Eri'ni tupo e'ma'sa'kan nito' apuri uya pi'. Miri pikiri riken uyekama'popi'to' pe auya esi seri, seri pe,” ta'pu Paar uya.

22 Piri'kus, Ite'ma to'ka'nu'nin nu'pu uya Paar ekama'popi'to' ereutanaku'pu. “Eke soisa amu' epuru uye'sa' a'tai, Raisayas itese', seri iko'tui konekato' pe uya nesii,” ta'pu iya.

23 Soisa amu' esa' apiyo'ma'pu iya, “Paaru era-sunpanin pe, tewa ke para Paar iku'ki, itonpa ton

uya ri Paar_u mainanpato' pe i'se iye'to' ri ne'to' pe to' uya iku'ki," ta'p_u iya.

Piri'k_{us} Esi'p_u Paar_u Usaurok_u Eta Pi'

²⁴ Emenn_u'p_u po ri, Piri'k_{us} miri awonsi'ki ino'p_u Turu'sira, Esuwer_u am_u' pasi, uyee'p_u, miripan uya Paar_u ki'ma'p_u, isaurok_u etato' pe t_uuya Sises K_urai apurito' eseru pi'.

²⁵ Paar_u usaurok_u koro'tau, wak_u pe ka'pon uko'manto' pi', ti'tui' ka'pon e'to' pi' t_unkup_un_u pi' t_uuko'mam_u yau, miri awonsi'ki eseru aimenkato' weyu ri e'seporo pi', Piri'k_{us} usenari'pa uya ta'p_u, "Miri kasa riken ni nesii, enta. Iki'ma uya kanan miri iweyu eposa' uya a'tai," ta'p_u iya.

²⁶ Miri a'tai, Paar_u uya ri t_urepa p_urata ke tukai' iye'kup_u'p_u. Miri pi' nin si, iki'mapit_u'p_u iya, miri awonsi'ki auro'kapit_u'p_u iya.

²⁷ Asa'ron w_uipiya pata'p_u pe, Piri'k_{us} uya pata epuru pe te'to' nonka'p_u. Miri pata'p_u ya', Por_u'siyas Pes_u'tas ena'p_u pata epuru pe. Esuwer_u am_u' epuru ton a'kwar_u uye'to' pe, Paar_u nimi'p_u Piri'k_{us} uya pariki'si tau.

25

Paar_u I'tuto' Pes_u'tas Piyau

¹ Isutiya po itepuru pe Pes_u'tas esi'p_u. Miri a'tai, Sisariya pona iti'p_u, miripan enna'po'p_u Surusiran pona osor_uwau w_ui t_upo.

² Surusiran po, Pes_u'tas piya' use'man nito' t_urawasomanin nan epuru ton miri awonsi'ki Esuwer_u am_u' epuru ton uti'p_u Paar_u eseru'tise'na, "Tu'kan ni iri ton ku'sa' iya," ta'p_u to' uya.

3 Kamoro uya Pesu'tas apiyonti'pɛ Surusiran pona Paarɛ uye'to' pe ekamato' pe iya, miripan ekama'popi'to' pe. E'tane to' e'kama'pɛ asanta piyau taron kon e'so'nanto' pe Surusiran pona iti a'tai iwinin nan pe.

4 E'tane Pesu'tas uya to' eiku'pɛ, “Sisariya po a'sisa' pe Paarɛ esi miri. Seri pe'ne ri uti miri Sisariya pona.

5 Iyepuru kon amɛ' enno'ti' uya'kiri to' utito' pe, iri ton kupɛ iya mukayatɛi'ne' pi' Paarɛ patakase'na to' utito' pe, i'napai ri iyese yau,” ta'pɛ iya to' pi'.

6 8 pe miri pe pɛra 10 kaisari wɛi Surusiran po tesi kon tɛpo, Pesu'tas uti'pɛ Sisariya pona, miripan a'kiri Esuwerɛ amɛ' uti'pɛ. Iyema'sa' yau, Pesu'tas ereuta'pɛ aimenkan apon pona, miripan uya Paarɛ ne'to' pe to' uya ekama'po'pɛ ekama'popi'to' pe tɛuya.

7 Miri yau, soisa amɛ' epuru uya Paarɛ nee'pɛ. Esuwerɛ amɛ' epuru ton Surusiran poi iye'sa' kon esi'pɛ iwoi. “Tu'kan ni iri ku'sa' Paarɛ uya,” ta'pɛ Esuwerɛ amɛ' epuru ton uya Pesu'tas pi', e'tane i'napai ri iyese tukai' to' uya i'tu pɛra iyese'pɛ.

8 Miri yau, tiwano' pe Paarɛ e'wa'kutɛ'pɛ, “Iri pe ri ina, Esuwerɛ amɛ' iwano' main, Mosi' winon winikɛi' usauro'sa' pɛra man, miri awonsi'ki ina use'mato', ipɛremato' iwɛ' eseru pɛreme'sa' uya pɛra ri man, miri awonsi'ki Sisa pi' ri niri iri ku'sa' uya pɛra ri iyese,” ta'pɛ iya.

9 E'tane Esuwerɛ amɛ' a'kwarɛ inne'pai Pesu'tas esi'pɛ, miripan uya Paarɛ ekama'po'pɛ, “Surusiran pona pe' itipai me'an? Miri yau si, pɛsamoro uya iyekama'popi'to' pe upiyau,” ta'pɛ iya.

10 E'tane Paar_u uya, “Kane, seri ipiyau e'm_u'sa'kasa' na'ne' Sisa uya iku'sa' pi'. Seri yau kuru uyekama'popi'to' auya pe iyese. I'tu auya iri pe ri Esuwer_u am_u' pi' e'sa' p_ura iyese.

11 E'tane uwito' ipikiri ku'sa' uya yau, i'ri pe p_ura man ukota'ma, to' uya uwini a'tai, e'tane iri ton ku'sa' uya p_ura man. Miri pi', Esuwer_u am_u' epuru ton ena' in_u' uya ut_ura p_ura iyese miri. Itepuru Sisa uya uyekama'popitu i'se esi!” ta'p_u Paar_u uya Pesu'tas pi'.

12 Tukonsur_uu_u am_u' pokon pe t_useta t_upo, eiku'p_u iya, “Sisa uya iyekama'popitu i'se iwesi, miri pi' iutito' pe iyese Sisa piya!” ta'p_u Pesu'tas uya ipi'.

Pesu'tas Uya Teseru Oton Warinpa'p_u Kin Ak_uri'pa Pi'

13 Emenn_u'p_u t_upo ri, kin Ak_uri'pa miri awonsi'ki ino'p_u Pones uti'p_u Sisariya pona. Pesu'tas apuripi'se'na to' uti'p_u.

14 Inke ri kin Ak_uri'pa miri awonsi'ki Pones uko'manpitu'p_u; miripan koro'tau, Pesu'tas uya Paar_u ekareei ekama'p_u Ak_uri'pa pi'. “Moro ka'pon man a'sisa', Paar_u itese', itepuru Piri'kas na'si'p_u.

15 Surusiran pona utisa' a'tai, use'man nito' t_urawasomanin nan epuru ton eke ton kuru miri awonsi'ki t_uron kon Esuwer_u am_u' epuru ton uya uyeseru kon i'se p_ura iyese, iri ku'sa' iya ta uya i'se to' esi'p_u.

16 “To' auro'ka'p_u uya Roman am_u' eseru esi inke p_ura ka'pon nonkanin nan pen iteyaton non ena'. Wapiya kuru a'sisa' miri awonsi'ki iteyaton

non utito' pe iyesi ekama'popi'nin piya'. Miri yau, teyatón non pokon pe te'sepose isauro'to' pe, te'wa'kutú pe.

17 Miri yau, Esuweru amú' uyee'pu Sisariya pona, Paarú eseru aimenkato' a'tai. Ina uyee'pu ema'sa' yau, Paarú ne'to' pe to' uya ekama'pu uya.

18 Iri kuru ri na'ki wenai to' uya ikupu ta'pu uya e'tane, miri pe para iyesi'pu.

19 E'tane to' e'manenpato' Paarú pi' esi'pu Papa apurito' tuya'nokon pi'. To' e'manenpato' kanan esi'pu ka'pon, Sises itese' pikiri. Iyeri'sa' ru'pu e'tane si, Paarú uya, 'Moro iyesi,' ta.

20 Miri enta' to' ekama'popi'to' ike i'tu uya para iyesi'pu, miripan to' eseru koneka i'tu uya para iyesi'pu. Miri pi', Paarú ekama'po'pu uya Surusiran pona itito' pe miri yau ekama'popi'to' pe,

21 e'tane Paarú esi'pu i'se para. Roman amú' epuru Sisa uya kuru tekama'popitu i'se iyesi'pu, e'tane a'sisa' pe ri iye'to' pe ennoko uya pona ri Sisa piya'," ta'pu Pesú'tas uya kin Akuri'pa pi'.

22 "Uri pe kuru imaimu inetapai e'ai'," ta'pu Akuri'pa uya Pesú'tas pi'.

"Awanapai ri etato' pe ikupu uya miri. Isauroku etase'na misipui'," ta'pu Pesú'tas uya.

Paarú E'wa'kutú'pu Akuri'pa Piyau

23 Iyema'sa' yau, Akuri'pa miri awonsi'ki Pones uti'pu amuran nito' iwú' ta' tawaai ke, tasoisai amú' ke eke pe tesi kon ekamanin pe. Eke ton soisa amú' epuru pe te'san miri awonsi'ki taron kon ni eke ton pe te'san Sisariya po uyee'pu to' a'kiri. Pesú'tas uya ta pi' Paarú nee'pu to' uya.

24 Miripan uya ta'pɛ, “Kin Akɛri'pa miri awonsi'ki tɛron kon ni seri yau na'ne' nan, pɛse ri pe' menyatɛu?” ta'pɛ Pesɛ'tas uya to' pi'. “Tanporon kon Esuwerɛ amɛ' seri yau Sisariya pon kon miri awonsi'ki Surusiran pon kon uya, ipikiri upi' tumaimu kon tɛpi'sa' man. To' uki'pi'nɛnpitɛ'pɛ, ‘Miri enta' kɛ'ko'manin!’ tukai’.

25 Iwito' ipikiri pɛra ri iyesei tukai' i'tu'pɛ uya e'tane, Sisa uya kuru tekama'popitɛ i'se iye'sa'. Miripan Ron pona enno'to' pe uya e'kamasa’.

26 Itepuru ena' unmenukanɛ i'tu uya pɛra iyesei, miri pe iyesei pi' pɛse ri senno'ai' tawon, apɛne pɛra iri ku'sa' iya pɛra iyesei pi'. Miri pe iyesei pi', ipiya'nokon ine'sa' uya, imiri kuru kin Akɛri'pa piya'. Ekama'popitɛ uya'nokon tɛpo, itepuru Sisa ena' unmenukanɛ oton nin si i'tu uya miri.

27 Miri ton iri ku'sa' iya tawon kareta pɛra iye'tane a'sisa' ennoko Ron pona pɛra iyesei,” ta'pɛ Pesɛ'tas uya to' pi’.

26

Kin Akɛri'pa Piyau Paarɛ Usaurokɛ'pɛ Teseru Pi'

1 Miri tɛpo, kin Akɛri'pa uya ta'pɛ Paarɛ pi', “Imiri pe ausaurokɛ pa iku'sa' man,” ta'pɛ iya. Miri a'tai, Paarɛ uya temiyatɛ anɛmɛ'pɛ tɛusauro'to' pe. Miri a'tai tumiri pe usauro'ni pi' iye'sara'ti'pɛ.

2 “Kin Akɛri'pa, wakɛ pe seri esi uiwano' pe usekamato' pe, to' nɛsauro'ai'ne' upi' pi'. Ito'ka'nɛkɛ uya tu'kan ni uri pi' kasi pe Esuwerɛ amɛ' usauro'to' upi' ekama uya ipi’.

3 apɛne pɛra kuru tanporon ni Esuwerɛ amɛ' uko'manto' eseru miri awonsi'ki to' manenpanin

ton eseru i'tu auya wenai niri iseseru yawon kon pe pura to' esi. Miri wenai, uyeta auya i'se e'ai' waku pe.

⁴ “Esuweru amu' uya waku pe uko'mamu'pu eseru i'tu miri, mare pe esi'pu si'kiri utonpa ton koro'tau Surusiran po.

⁵ To' uya ui'tusa' wapiyaro' si'kiri, to' uya niri upataka e'pains upatakapai tesi kon a'tai, miri sa'man ipureman nito' eseru pe te'sen yau uko'mamu'pu Pari'si pe.

⁶ Seri pe si Papa uya ta'pu na'ne' penaro' kon ina tamokori ton pi' ri iyau e'ku'to' pikiri, seri pe uyekama'popitu auya na'ne'.

⁷ Seri ekamasa' ru'pu enupikiri 12 kaisaron kon Esuweru pon kon esi miri. Papa apuri pi' esii'ma wai nai miri awonsi'ki ewarupi nau, epoto' pe tauya'nokon. Kin, seri pi' e'ku'to' wenai Esuweru amu' uya uyewa'noma miri.

⁸ I'ri pe iyese pi' Papa uya iyeri'sa' i'mu'sa'ka'pu apuri auya'nokon pura iyese?

⁹ “Uri niri uya apuri'pu man waku pe na'ki iyese tukai' tanporon yau ri Nasare' pon Sises ewa'noma pi' esi'pu.

¹⁰ Miri na'ne' kuru kupu pi' esi'pu miri Surusiran po. Esuweru amu' use'man nito' tarawasomanin nan epuru ton eke ton kuru uya iku'ki tasa' maimu awiri, tu'kan kon Sises apurinin nan emaika'pu uya pariki'si ta'. To' uma'tato' pe to' ku'sa' a'tai, miri kasa ri to' nama'tai tawon pe ri e'pitu'pu.

¹¹ Inke ri, utipitu'pu Esuweru amu' usenupato' ton iwu' kaisa ri'ne to' kota'mapitu pi'. Miyari ri

to' a'kwaruka pi' iri pe Papa pi' asauro'ti' tawon pe e'pitu'pu. Pana' pe usakorooi yau tautisen pe e'pi'tai inno'nan pata ton ya' to' poni'simato' pe uya.

Paaru Uya Ekama'pu Sises Apurinin Pe Tena'pu Ru'pu
(Inkup'pu 9:1-19; 22:6-16)

¹² “Miri ton a'tai'ne uti a'tai, use'mato' tarawasomanin nan epuru ton eke ton kuru uya uyennosa' pi' tumeruntiru ke utito' pe uku'sa' uti koro'tau Tamaskas pata e'ma tau.

¹³ Kin si, pure'po'si a'tai, wai enu esi koro'tau, asanta tau esi koro'tau, a'kwa ene'pu uya Epan winipai. A'kwa pe kuru wai enu entai iye'wei'ti'pu uwoi miri awonsi'ki utonpa pe te'san woi.

¹⁴ Tanporo ina uta'mo'ka'pu non pona. Miri yau, main eta'pu uya, Arami' pe,* ‘Saaru, Saaru, iri pe iyesi pi' uponi'sima auya? Iiwano' pe ri e'ne' mamoronkayai' tiwiri ri uri poni'sima auya kaisa ri, tesa' yuu pona te'wipi'sen itikan paka waraino kasa.’

¹⁵ “Miri tupo, ekama'po'pu uya, ‘Inu' imiri, uyepuru?’ ta'pu uya.

“Uri kari ri Sises, muponi'simayai'ne,’ tukai Itepuru uya umaimu eiku'pu.

¹⁶ ‘Seri pe, e'mu'sa'ka', ipiya' usenpoikasa' seri upoitoru pe ikonekase'na. Seri iyenu ya' senpoikayai'ne', miri tupo, seri pe kanyauro'kayai'ne' ekamanin pe iwesi pa.

26:11 Inkupu'pu 8:3; 22:4-5 * **26:14** Arami' pe; miri pe puu, Esuweru amu' maimu, Ipuru tukai' tesa'san.

17 Ipika'ti uya miri itonpa ton Esuweru amu' miri awonsi'ki Esuweru amu' pen namai'. Iyennoko uya to' piya'

18 to' enu a'kokapi'se'na, to' era'tito' pe ewarupi apai a'kwa winikui' miri awonsi'ki Se'tan† meruntiru apai Papa winikui'. Uyapurito' to' uya wini, tumakooi kon pi' usentu'mato' epoto' pe to' uya, waku ton ka'pon amu' pata'se' yau to' e'to' pe, ta'pu iya upi'.

19 "Miri wenai, kin Akuri'pa, uyenu uta'kwakasa' a'tai, unene'pu Epan winon maimu awiri esi'pu.

20 Iyepiya'ti pe kuru, itekare ekama'pu uya Tamaskas pata awon kon pi', Surusiran pon kon miri awonsi'ki tanporo Isutiya pata pon kon pana ya' niri. Miri tupo, itekare ekama'pu uya Esuweru amu' pen pana ya' to' era'tito' pe tumakooi kon apai Papa winikui'. To' auro'ka'pu uya i'napai ri to' uko'manto' pe tumakooi kon apai tera'tisa' kon ekamanin pe.

21 Miri wenai kuru, Esuweru amu' uya uya'si'pu miri use'man nito', ipureman nito' iwu' pu'ku tau. Miri tupo, to' esi'pu uwini i'se.

22 E'tane Papa uya upika'tisa' seri pona ri. Miri wenai, seri pe e'mu'sa'kasa' seri ekamase'na inu' pe Sises esi tukai' eke ton miri awonsi'ki sepa' nan ni pana ya', tanporo Sises pi' ukayai'ne' esi miri itekare Mosi' miri awonsi'ki taron kon pu'kena' ton namenuka'pu poro.

23 Pu'kena' ton uya imenuka'pu Kurai‡

† 26:18 *Se'tan*—Makoi ese' isakon, *Papa eseru ewaruma'tinin* ta e'kwa pe. 26:20 *Inkupu'pu* 9:20, 28-29 ‡ 26:23 *Kurai* (Kiri' maimu yau); miri pe pu'ra, *Me'saya* (Ipuru maimu yau), asa'ri ri

mari iyese, *Papa Nanumu'pu* ta e'kwa pe.

kota'mato' oton, miri tupo, iwito' oton, miripan te'mu'sa'ka ton teriku'pu apai iyeri'sa' kon e'mu'sa'ka tipiya pe Esuweru amu' miri awonsi'ki Esuweru amu' pen ni niri pika'tise'na to' weyu ekamai', tawon," ta'pu iya.

I'tupi'to' Si U'matu'pu

²⁴ Seri airi, Paarū wanu'tipa'pu kopuna Pesu'tas uya isekama koro'tau. Iki'pi'nūmu'pu, "Ta'kwaru ke pu'ra me'ai', Paarū!" tukai'. "Eke pe kuru iusenupasa' ayano'ma pi' man. Miri uya aya'kwaru pu'ra iku'sa' man," ta'pu iya.

²⁵ E'tane, "Uya'kwaru pu'ra esi pen seri, eke tūnamasen Pesu'tas," tukai' Paarū uya imaimu eiku'pu. "E'tane ukayai'ne' esi miri i'napairon pe kuru tato'ka'na'sen pe ri.

²⁶ Seri ton ukayai'ne' i'tu imiri, kin Akūri'pa uya miri; miri wenai, usauroku kuru ri, usauroku niri eta auya pe si'tuyai'. Sapuriyai' seri ton iye'ku'sa' Sises pi' i'tu auya tukai', apune pu'ra tu'kan kon uya Sises pi' iye'ku'sa' etasa' pi'," ta'pu iya.

²⁷ Miri tupo, Paarū uya kin Akūri'pa ekama'po'pu, "Pu'kena' ton nūmenuka'pu pe' mapuriyan? Apuri auya pe kuru ri si'tuyai'," ta'pu iya.

²⁸ "Inke pu'ra pe' Kūri'san pe enato' pe ukupu auya tukai' iusenuminka?" ta'pu Akūri'pa uya Paarū pi'.

²⁹ "Inke pu'ra ri, miri pe pu'ra inke ri, ipurema seri Papa pi', imiri riken pen e'tane tanporo kamoro uyeta pi' na'ne' nan ni mari seri pe, enato' pe uri

na'ne' kasa apurinin pe, a'sisa' pe p̄ra riken,” tukai' Paar̄ uya imaimu eik̄'p̄.

³⁰ Kin, kop̄na, Pones, miri awonsi'ki tanporon kon to' a'kiri te'san e'm̄'sa'ka'p̄.

³¹ Itau te'to' kon iuti nimi'p̄ to' uya, asaurok̄i'ma t̄tonpa kon am̄' pokon pe. “P̄se ri uya iri ri t̄wito' miri awonsi'ki ta'sito' iwenai ku'sa' p̄ra ri iyesei,” ta'p̄ to' uya.

³² Ak̄ri'pa uya ta'p̄ Pes̄'tas pi', “P̄se ri uya Sisa uya tekama'popi'to' pe tasa' p̄ra iyesei yau, inonka'p̄ nesii'no ri,” ta'p̄ iya.

27

Paar̄ Uti'p̄ Sisariya Apai Opa'w̄ K̄ri' Pona

¹ Ina utito' pe I'tari pona tukai' iye'ku'sa' pe iyesei'p̄ a'tai, Paar̄ miri awonsi'ki t̄ron kon a'sisa' kon nonka'p̄ to' uya soisa am̄' epuru, Isuriyas itese' ena', “tam̄' tawon kon Sisa Soisai Am̄',” tato' kon.

² Kanau epotor̄'p̄ ya' ina ekanwa'ti'p̄ pata At̄rami'tiyan, Eisa awon apai. Kanau t̄utisen pe te'sen ereutap̄i'p̄ Eisa awo'nan t̄ron ni ton ni pata ton yau. Aresta'kos, Sises apurinin Tesaroni'ka winon esi'p̄ ina tonpa pe, Ma'sitoniya apaino.

³ Miri ema'sa' yau, Saitan pata eporo'p̄ ina uya. Miri yau, Isuriyas uya Paar̄ auro'ka'p̄ mann̄' pe te'se, t̄tonpa ton ense'na itito' pe inonka'p̄ iya, i'se ri iye'to' ke to' uya ipika'tito' pe.

⁴ Miri apai, ina kanan uti'p̄ parau po Sai'p̄ras opa'w̄ pata winik̄i', miri airi t̄t̄ui pe iyesei pi', ap̄ne p̄ra pana' pe kuru a'setun uyee'p̄ ina winik̄i'.

5 Parau po Siri'siya miri awonsi'ki Panperiya poro iwa ri ina e'kwiritu'pu. Ina uya Maira eporo'pu Iri'siya awon.

6 Miri yau, soisa amu' epuru uya Arisantiriya pata apai kanau uye'sa' eta'pu. Utin pi' iyesi'pu I'tari winikui', miripan ya' ina kanwa'ti'pu iya.

7 Inke ri wai tenno'pi'se tinin pi' kuru ina uti'pu. Miri a'tai, Kunitas eporo i'se ina usi'tu'pu, e'tane pana' pe kuru a'setun uyee'pu; miri wenai, to'sa ri kanau uti'pu pen ina utito' ya'. Kari' opa'wu winikui' ina uti'pu, apune para a'setun para miri poro iyesi pi', Sarumone nono utisa' parau ka' woi.

8 Miri apai, ina utama'pu sa'man yau, pana' pe ri a'setun esi koro'tau. Miri tapo, ina uyee'pu Waku Peya' tato' ya', a'ko pe pata Raseya piya' ri.

9 Oko pe ina esi emapu'ti'pu isi pe a'setun esi uya. Seri a'tai'ne ri Esuweru amu' useruma weyu pata'pu pe* iyesi'pu. Miri wenai, Paar uya to' auro'ka'pu:

10 “Utonpa ton, isi yau kuru e'ni tukai' senyai'. A'setun uya kanau, apuru, uri'nokon ni niri ma'tanuku poken iyesi,” ta'pu iya.

11 E'tane Paar usauro'to' uya soisa amu' epuru ewankama'pu pen. “Kanau anin miri awonsi'ki kanau esa' uya auro'kan nito' awiri, utinpai'nokon,” ta'pu iya.

12 Kanau ereutato' pata esi'pu waku pe iyau e'ni poken para, komi' pe pata e'to' weyu e'seposa' a'tai, tu'kan kon uya, “Miyari ri utinpai'nokon

* 27:9 *Esuweru amu' useruma weyu pata'pu pe.* Miri esi'pu *Esuweru amu' ekonekato' iri pe tesi'pu kon apai weyu ru'pu pata'pu pe* (Yon Ki'poru), kanau epotoru'pu yau utin esi'pu sa'man pe kuru ri.

ni," ta'pu. Pini'kas itese' pata Kuri' pon eporo taya'nokon tukai' to' esi'pu, miri yau komi' pe pata e'to' weyu enno'to' pe taya'nokon. Seri Kuri' pata esi'pu miri asa'ron winipai isi'ratoi pe kanau ereutapi'to' pata'se' pe.

Isi Kuru A'setun Uya Kanau Ari'pu Ite'ma Tapai

¹³ Mararon A'setun e'sara'tisa' a'tai uye'ni pi', i'se te'ton kon uya teposa' kon pe to' uya ekama'pu. Miri a'tai, wa'ka pun kanau ku'nin peten anumu'pu to' uya, miripan uti'pu Kuri' ka'ta poro.

¹⁴ Inke kuru iye'sa' koro'tau para ri, pana'pan a'setun, kuranau warai uyee'pu opa'wu pata winipai kanau wise'na, Wai Enu Enuku Enwo'netu Winon A'setun tukai' tesa'sen.

¹⁵ Kanau wini'pu iya pana'pe, miyari ri itito' para ri iye'to' temapu'ti'. Miri pi', a'setun uya kanau epotoru'pu ato' pe ina uya inonka'pu.

¹⁶ Miri yau, wai enu enuku kamisi winikai' aiko Kauta opa'wari awiri ina uti'pu, a'setun para miri awiri iyese wena. Epika'tin nito' kanwa kupu poken para iyese pi'. Miri wena, ina uya anumu'pu kanau epotoru'pu ya'.

¹⁷ Kanau anumu'pu to' uya si'na' ke ewa'ti'pu kanau epotoru'pu pona. Enari'ke' to' esi'pu ta'muna kon Siritis wi'sipu pona tukai'. Kanau anin kareku nu'ti'pu to' uya, tinin pi' itito' pe.

¹⁸ Miyari ri pana'pe a'setun esi'pu uye'ni pi'. Miri ema'sa' yau, kanau puro'po te'sen ka'pon amu' apuruui ton ma'kiri'pu to' uya.

¹⁹ Itosorawano wai a'tai, kanau apuruui amu' ma'kiri'pu to' uya kanau yapai asi'ono pe pari kanau e'to' pe.

20 Inke kuru ewarupi pe pata esi'pu; wui enu e'wei'ti p̄ra, siriki am̄ niri usene p̄ra, ap̄ne p̄ra a'setun ni esi wenai uye'ni pi'. Inke ru'kwi ri wak̄ pi' te'ku'p̄it̄ kon t̄po, ina e'nonka'p̄.

21 Inke ina enta'nasa' p̄ra ina uko'mansa' koro'tau, Paaru e'm̄'sa'ka'p̄ to' pi' tase'na, “Utonpa ton, kanyauro'katant̄une' ut̄npai'nokon p̄ra K̄ri' pata apai ukataine' tetai' p̄ra iwesi'p̄ kon. Epika'tin ni nesii'no, apuru ton ni uma'ta p̄ra nesii'no.

22 E'tane seri pe ipi'nokon ta uya pana' pe aya'kwar̄ kon nesii, ap̄ne p̄ra in̄ ri uma'ta pe p̄ra iyese. Kanau riken uma'tato' oton.

23 Nesiine' ewarupi nau, Papa, uri na'ne' itiwano' pe miri awonsi'ki ipoit̄ru pe e't̄rawasomayai'ne' inser̄ui e'm̄'sa'ka'p̄ upiyau.

24 'Kenari'n̄m̄ui Paaru! Me'm̄'sa'kai' ri, iyekama'popi'to' Sisa uya yau. Papa uya niri t̄usentu'ma wenai kamoro kanau yau iye'sa' kon aya'kiri pika'tisa' miri.'

25 Miri wenai utonpa ton, kenari'n̄nt̄ui! Papa apurito' uya esi pi' iye'kup̄ ri inser̄ nekama'p̄ awiri. Miri kasa kuru inser̄ uya uyauro'ka'p̄ miri.

26 Miri e'tane ri, a'munan pe man opa'w̄ tonpa ton pona ri; kanau ri uta'mor̄ka," ta'p̄ iya.

Paaru Uya T̄tonpa Ton Pori'ma'p̄

27 14 kaisaron wui yau, parau At̄riyati' po ut̄n pi' ina e'tane, anom̄ra' kanau anin nan uya a'mun pata eporo tukai' i'tu'p̄.

28 Miri a'tai, i'tuto' si'na' ton ennasikap̄it̄'p̄ to' uya. Miri a'tai, to' uya eporo'p̄ 120 pi' i'nau iyese

tukai'. Emennu'pu iwa to' uya kanan i'tukaa'pu; 90 pi' i'nau iyesei tukai' kanan to' uya eporo'pu.

29 Ti' pona sipa'sipa uya ina ari tukai' to' enari'namu'pu. 4 kaisaron ton wa'ka pun kanau ku'nin peten eno'ma'pu to' uya, miripan kon enuriku'pu pata emaku i'se.

30 Tapurunto' kon pe kanau anin nan uya epika'tin nito' kanwa nu'ti'pu tuna ka', kanau a'sinin ton nu'ti taya'nokon pe itese'.

31 Miri a'tai, Paarū uya ta'pu soisa amu' epuru pi' miri awonsi'ki soisa amu' pi' ri, "Pusamo kanau yau te'turawasomasan esi a'tai riken kanau yau, iyepika'tito' oton kon miri," ta'pu iya.

32 Miri pi', soisa amu' uya si'na' ton aku'pitu'pu tuna ka' epika'tin nito' kanwa uta'mo'kato' pe.

33 Pata emaku rawiri ri, tanporo to' enta'nato' pe ta'pu Paarū uya. "14 kaisa ri wai iwe'sa' kon sa'man yau tenta'nai' pura," ta'pu Paarū uya.

34 "Seri pe si enta'nati' ta uya ipi'nokon, nurine iwesi kon pa. Inu' uya ri tikin ni ri ti'pai i'po' eno'mato' oton pen miri," ta'pu iya.

35 Seri ta'pu taya tupo, taya anamu'pu iya, tenki ta'pu iya Papa pi', miripan pi' iyenta'na'pu tanporon kon enu airi.

36 Tanporon kon pori'ma'pu iya, miripan kon niri enta'na'pu.

37 Tanporo 276 kaisa ri† ina esi'pu kanau yau.

38 Tanporo i'se te'to' kon pe tenta'na kon tupo, to' uya a'nai', wi' tato' tinarinu kon ma'kiri'pu parau ka' asi'ono pe kanau enato' pe.

† 27:37 Taron ni imenukasa' ton uya, 275 kaisa ri ta; taron kon uya, 76 kaisari ri nawon ta.

Sipa'sipa Uya Kanau Aure Ma'tanukꞌpꞌ

³⁹ Pata ema'sa' a'tai, a'mun pata eposa' tꞌuya'nokon to'ka'nukꞌ to' uya pꞌra iyese'pꞌ, e'tane ikupai yau ite'pi ene'pꞌ to' uya. Miyari ri kanau ari pi' to' e'ku'sa' pe iyese' a'tai, iyereuta nesii'no a'mun pona.

⁴⁰ Wa'ka pun kanau ku'nin peten ewa ton aku'pitu'pꞌ to' uya, miripan nonka'pꞌ to' uya parau ka'. Miri a'tai'ne ri, kanau a'sito' ike ewa ton amꞌ eukapitu'pꞌ to' uya. Miri tꞌpo, iputu pon kanau anin kareku i'mꞌsa'ka'pꞌ to' uya, a'setun uya tato' kon pe parau ka'ta pona.

⁴¹ E'tane kanau putu a'muna'pꞌ. Miri apai, iye'wꞌrꞌuka'pꞌ pen, pana' pe sipa'sipa e'wipitu' uya iyaure i'kwitu'pꞌ ipꞌra.

⁴² Soisa amꞌ e'kupꞌpꞌ a'sisa' kon wini pi' tꞌupinꞌanse to' apꞌamꞌ namai',

⁴³ e'tane soisa amꞌ epuru esi'pꞌ Paarꞌ inpika'tipai, miripan niri esi'pꞌ a'sisa' kon wini soisa amꞌ uya i'se pꞌra, miri pi' to' ereutanukꞌpꞌ iya. Kamoro tꞌupinꞌsan pi', "Ainꞌnti' tuna ka' iupinꞌ kon pa a'mun pona," ta'pꞌ soisa amꞌ epuru uya.

⁴⁴ To' tonpa ton nin si utito' pe to' pikiri iye'kwip'i'sa' ton paranka pi' tꞌuta'sipi'se, seri ta itepuru uya awiri ina e'sa' wenai, a'mun eporo'pꞌ ina uya wakꞌ pe ri.

28

Marꞌta Itese' Opa'wꞌ Po

¹ Wakꞌ pe kuru ina uya pata eposa' a'tai, ina uya Marꞌta itese' miri opa'wꞌ tukai' i'tu'pꞌ.

2 Patawon amu' uya waku pe kuru ina ereutanuku'pu. Apo' po'ti'pu to' uya, miripan kon uya ina ki'ma'pu a'nose'na, apune para tuna pe, ikomi' pe niri pata esi pi'.

3 Paarū uya apo' pe te'ton amuranu'sa' a'tai, isi kuru ikui esi'pu i'koro'tau. A'ne' uya enpa'ka'pu, miripan uta'si'pu itemiyatu pi'.

4 Patawon amu' uya ikui e'sinkasa' ene a'tai itemiyatu pi', to' uya ta'pu tiwano' kon pe, "Puse ri ka'pon esi pe man te'wisen pe, parau apai iyapuransa' e'tane, kuri ri Papa miri waraino kon poni'simanin uya si ima'tanuku pe man," ta'pu to' uya.

5 E'tane Paarū uya ikui eno'ma'pu apo' ya', miripan esi'pu e'ne' pe para ri.

6 Ka'pon amu' esi'pu iya'mamu enupikiri, miri tupo iyeriku tukai' itenupikiri to' esi'pu. E'tane inke ri itenupikiri tesi kon tupo, i'ri ri e'kupū para iyesi pi' ipi', teseru kon ensima'pu to' uya. "Papa pe man," ta'pu to' uya.

7 A'ko pe ri miri yau iyesi'pu umi, eke opa'wu pata epuru, Pa'piriyas itese' mainaru. Ina ereutanuku'pu iya tiwu' ta' osorawau wai e'to' airi.

8 Ikuipunu esi'pu e'ne' pe e'kii'man pi', miri awonsi'ki manaimi pi', miripan piya' Paarū ewomu'pu ipuremai', miripan uya temiyatu nonka'pu ipona, miripan epi'ti'pu iya.

9 Seri e'ku'sa' a'tai, taron kon e'ne' ton uyee'pu ipiya', miripan kon usepi'tipitu'pu.

10 Ina nama'pu to' uya tu'kan wini ri. Ina utito' e'seposa' a'tai, to' uya ina repaitu'pu tu'kan ke ri ina i'kiyari miri awonsi'ki i'se ina e'to' ton ni kanau

yau.

Paaru Uti'pu Maru'ta Apai I'tari Pona

¹¹ Osoruwau kapui tupo, kanau epotoru'pu yau parau po ina uti'pu iko'mansa' komi' weyu pe pata esi wenai. Arisantiriya winon pe kanau esi'pu. Kanau putu pi' Munui' Amu' Papa tato' ipi' pe yui ewa'pi'sa' ton esi'pu.*

¹² Ina uya Sire'kiyus eporo'pu. Miri yau, osoruwau wui ina uko'mamu'pu.

¹³ Miri apai, ina kanan uti'pu, Resiyan tepose. Miri ema'sa' yau, wui enu enuku kamisi winon pese'ti uyee'pu. Asa'ri wui pata'pu pe, Pu'tiyori eporo'pu ina uya.

¹⁴ Miri yau, tatonpa kon amu' eporo'pu ina uya, miripan kon uya ina ki'ma'pu tikin ni suntaaka e'to' poro ina uko'manto' pe tuiyau'nokon. Miri kasa ina uya pata Ron eporo'pu.

¹⁵ To' uya ina uyepu Ron pona tukai' etasa' a'tai, to' uye'sa' esi'pu innon A'piyas tepose ri, taron kon niri uye'sa' esi'pu Osoruwau Patatuse' tepose'ne ri ina e'matai. Pusamoro eposa' tuuya a'tai, Paaru uya Papa pi' tenki ta'pu, miripan pori'ma'pu to' uya miri yau.

Paaru Epa'ka'pu Ron Pona

¹⁶ Ina epa'kasa' a'tai Ron pona, tiwano' pe iko'manto' pe to' uya Paaru kupu'pu soisa tuku'se erasuntinin pe.

¹⁷ Osoruwau wui tupo, Esuweru amu' epuru ton ki'ma'pu Paaru uya. To' amurasa' a'tai, ta'pu iya

* **28:11** To' ese' ton esi Kastoru miri awonsi'ki Poros tukai', kanau yau tuiyau'pininsan ewakiri ton kuru.

to' pi', "Utonpa ton, i'ri ri ekaman miri pe para i'ri ri penaro' kon ukurunu kon amu' nekama'pu pen ni ku'sa' uya para iye'tane, a'sisa' pe e'ai'. A'sisa' ru'pu uri Surusiran po. Miri tupo, Ron pon kon ena' inonkasa' ru'pu uri.

18 To' uya uyekama'popitu'pu tupo, unonkapai to' esi'pu, apune para iri ku'sa' uya para iyesi'pu uwito' ipikiri.

19 Esuweru amu' esi'pu unonka i'se para, miri wenai enno'sa' uri Sisa uya uyeseru aimenkato' pe, i'ri ri ekaman tato' uya para ri iye'tane utonpa ton, Esuweru amu' pi'.

20 Miri wenai, iyento' kon pe uya, ayauro'kato' kon pe uya iki'masa' uya 'nokon miri. A'sisa' pe e'ai', apune para Esuweru amu' pika'tinin pe ekamasa' ru'pu ese' pi' esi pi'," ta'pu iya.

21 To' uya imaimu eiku'pu, "Kareta ri eposa' ina uya para man imiri ekamanin. Inu' yan ni uye'sa' miri apai uya iyaseru patakasa' para ri man.

22 E'tane anapurinu inetapai ina man, apune para seri emenna' iyamutu yau iwe'to' esi waku pe para tukai' tanporon kon usauroku pi'," ta'pu to' uya.

23 To' uya taweyu kon koneka'pu taron ni wui a'tai kanan etato' pe tuya'nokon, miripan kon uyee'pu tu'ke pari Paarua pata'se' ya'. Awanaku' si'kiri iko'mamu pona ri, Papa e'to' esa' wanni pe enpoika pi' iyesi'pu to' pana ya', i'ri tukai' miri ya' ewon nito' esi tukai' niri. Main, Mosi' winon apai miri awonsi'ki taron kon ni pu'kena' ton eseru apai'ne ri to' uya Sises apurito' pe ikupu i'se iyesi'pu.

24 Taron kon uya inekamanu apuri'pu, e'tane taron kon uya apuri'pu pen.

25 Isi'kaisa ri to' ekoneka para iyese'pu, miripan kon e'sara'ti'pu inimi pi', iu'matu pe ri se tawon ekama iya tupo, "Waku A'kwaru usauroku'pu ri i'napairon pi' ukairanu kon pi'. Ta'pu iya na'ne' Aisaya pu'kena' awiri:

26 " 'Enta kamoro ka'pon amu' piya' tase'na to' pi',
 "Tiwiri ri eta auya'nokon, miri e'tane ito'ka'nuku
 auya'nokon para ri iyese;
 tiwiri ri iyenu kon tuptu auya'nokon, miri
 e'tane ene auya'nokon para iyese,"

tawon.

27 Arane para pumamoro ka'pon amu' ewan enasa' sa'man pe,
 tupana kon a'kopi'sa' to' uya,
 tenu kon ni a'kopi'sa' to' uya.
 To' uya tenu kon ke ene nesii'no,
 to' uya eta tupana kon ke nesii'no,
 to' uya tewan kon ke ito'ka'nuku nesii'no,
 miripan kon era'ti uwiniku' nesii'no to' epi'ti uya
 nesii'no,'†
 tawon," ta'pu Paarpu uya.

28 "Miri wenai i'tu auya'nokon i'se e'ai', seri epika'tin nito' ekareei esi miri Esuweru amu' pen iwano' pe, miripan anunto' oton to' uya," ta'pu iya.

29 (Seri etasa' Esuweru amu' uya a'tai, tumiri'nokon pe ri e'sei'pitu'ima to' enna'po'pu.)‡

30 Asa'ri wuipiya e'to' airi, Paarpu uko'mamu'pu tane'manu iuti tau, tikin ni'ne tuuye'san ereutanuku'pu iya to' auro'kato' pe tuuya.

† 28:27 Aisaya 6:9-10 ‡ 28:29 Taron ni imenukasa' ton v. 29 para iyese.

³¹ Te'namai' p#ra, iwa'k#p#nin p#ra Papa e'to' esa' wanni pe p#' itekare ekama'p# iya, miri awonsi'ki Itepuru Sises K#rai p#' enupan n#'p# iya.

**Wakɛ Itekare: Emenna' Pe Ekonekan Nito'
New Testament in Akawaio (GY:ake:Akawaio)**

copyright © 2010 Wycliffe Bible Translators, Inc.

Language: Akawaio

Translation by: Wycliffe Bible Translators, Inc.

Akawaio

ake

Guyana

Copyright Information

© 2010, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Akawaio

© 2010, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-21

PDF generated using Haiola and XeLaTeX on 18 Apr 2025 from source files dated 29 Jan 2022

0a50da4e-768d-5472-9dd1-d9747ff5918f